





ԶՄԻԱԾԻՆ





ԼՂ
ՏԱՐԻ


ԷԶՄԻԱԾԻՆ



ՊԱՇՏՈՆԱԿԱՆ
ԱՄՍԱԳԻՐ
ՀԱՅՐԱՊԵՏԱԿԱՆ
ԱԹՈՌՈՒՅ
Ս. ԷԶՄԻԱԾՆԻ

ՔԻՆՔԻՐՈՍՈՐ

1977





ԲՆԱԿԱՆ

ՀԱՅԿԱՍՏԱՆԻ
ԿՐԹԱԿԱՆ
ՄԱՍԻՆԻՍՏՐԱԿԱՆ
ՍՈՑԻԱԼԻ
ԿՐԹԱԿԱՆ




ՀՐԱՄԱՆԱԻ

Տ. Տ. ՎԱԶԳԵՆԻ ԱՌԱՋՆՈՅ

ՎԵՀԱՓԱՌ ԵՒ ՍՐԲԱՋՆԱԳՈՅՆ ԿԱԹՈՂԻԿՈՍԻ
ԱՄԵՆԱՅՆ ՀԱՅՈՑ

1977





**ՎԵՀԱՓԱՌ ՀԱՅՐԱՊԵՏԻ ԿՈՆԴԱԿԸ ԼՈՆԴՈՆՈՒՄ
«ՀԱՅ ԵՐԱԺՇՏԱԿԱՆ ԻՆՍՏԻՏՈՒՏ»-Ի ՀԻՄՆԱԴՐՈՒԹՅԱՆ
ԱՌԹԻՎ**

**ԼՈՆՏՈՆԻ «ՀԱՅ ԵՐԱԺՇՏԱԿԱՆ ԻՆՍՏԻՏՈՒՏ»-Ի
ՅԱՐԳԱՐԺԱՆ ՀԻՄՆԱԴՐՆԵՐԻՆ ԵՒ ԱՆԴԱՄՆԵՐԻՆ
ՈՂԶՈՐՅՆ ՀԱՅՐԱԿԱՆ ԵՒ ՕՐՀՆՈՒԹԻԴՆ ՀԱՅՐԱՊԵՏԱԿԱՆ**

Հայ ժողովրդի ոգեկանության վաերական արտայայտություններից մեկն է հանդիսանում ազգային երաժշտությունը, որի գանձարանը բազում դարերի ընթացքում հարստացել է կրօնական և ժողովրդական ինքնատիպ ստեղծագործություններով, իսկ վերջին հարիւրամեակին՝ նաև հայ տաղանդաշատ երգահանների աշխարհին ծանօթ գործերով, որոնց մեջ լուսաւոր կատարների են հասել՝ մեր անմահ վարդապետը Կոմիտաս և մեր օրերի շնորհաշատ Արամ Խաչատրեանը, իրենց անկորնչելի վաստակով:

Մենք անհուն ուրախութեամբ ողջունում ենք՝ Լոնտոնում հիմնադրումը ձեր «Հայ երաժշտական ինստիտուտ»-ի և Մեր օրհնությունն ենք առաքում ձեր հայրենանուէր առաքելութեանը՝ մաղթելով, որ փայլուն յաջողութեամբ պսակուեն ձեր բոլոր ծրագրերն ու աշխատանքները՝ նուիրում հայ երաժշտութեան և առաջին հերթին հայ հոգևոր երաժշտութեան վերարժնորմանն ու տարածմանը աշխարհով մէկ:

Թող հայ երգի լոյսը աւելի ու աւելի տարածուի ու բաշխուի աշխարհին և մշտապէս ճառագայթի քաղաքակիրթ ազգերի երաժշտութեան տիեզերական համանուագի մէջ:

Ծառ սիրով ընդառաջում ենք ձեր 24 լույսար 1977 թուակիր խնդրանքին և Մեր անվերապահ համաձայնությամբ յայտնում Մեր հայրապետական օրհնութեամբ հովանաւորելու ձեր ինստիտուտը և միշտ նեցուկ կանգնելու ձեր ազնի իրագործումներին:

Հաւատում ենք ձեր ստեղծարար ոգուն, հաւատում ենք ձեր երիտաւարդական սուրբ եռանդին, հաւատում ենք ձեր ազգանուէր երազանքներին:


«Ողջ լերուք զօրացեալ շնորհօք սուրբ Հոգոյն և յաւետ օրհնեալ ի Տեառնէ և ի Մէնջ». ամէն:

Աստուծոյ Բնութեան

ԾԱՅՐԱԳՈՅՆ ՊԱՏՐԻԱՐԷ ԵՒ ԿԱԹՈՂԻԿՈՍ
ԱՄԵՆԱՅՆ ՀԱՅՈՑ

Տոաւ կոնդակս ի 20-ը փետրուարի
1977 փրկչական ամի,
էս ի տումարիս հայոց ՌՆԻԶ
ի մայրականս սրբոյ Էջմիածնի
ՀՄՐ. 878





ՎԵՀԱՓԱՌ ՀԱՅՐԱՊԵՏԻ ՈՂՋՈՒՅՆԻ ԵՎ ՕՐՀՆՈՒԹՅԱՆ
ԳԻՐԸ՝ ՈՒՂՂՅԱԼ ՄԻԱՅՅԱԼ ՆԱՀԱՆԳԱՅ ՀԱՅՈՑ
ԱՐԵՎԵԼՅԱՆ ԹԵՄԻ ՏԱՐԵԿԱՆ ԹԵՄԱԿԱՆ
ՊԱՏԳԱՄԱՎՈՐԱԿԱՆ ԺՈՂՈՎԻՆ

(1977 թ. փետրվարի 7)

Հարգարժան և բարեջան պատգամավորներ,

Հայաստանյայց եկեղեցին հայ ժողովուրդի եկեղեցին է: Հայ ժողովուրդը ինքը հայ եկեղեցին է, իբրև ինքնուրույն և անբաժան մեկ մասը Աստուծո ժողովուրդի: Եվ հայ եկեղեցին հավասարապես եկեղեցին է մեր ժողովուրդի հոգևորական և աշխարհական զավակներուն, որոնք հավասար իրավունք-ներով և պարտականություններով, աշխատանքի բաժին կստանձնեն պատասխանատվության տարբեր աստիճանավորումներով: Ահա այս ոգիով է որ, կիրթի՞նք, հավաքվա՞ծ եք դուք այսօր իբրև պատգամավորներ թեմա-կան-եկեղեցական ձեր կազմակերպությանց, հոգևոր իշխանությանը ներքև ձեր թեմակալ սրբազան առաջնորդի, քննարկելու անցնող տարվա՝ ձեր թե-մի և եկեղեցիներու գործնեության արդյունքները և մշակելու հառաջիկա տարվա ձեր աշխատանքներու ծրագիրները:

Հոգեկան անհուն մխիթարությամբ կհաստատենք թե եկեղեցաշինական ծավալումն փայլուն իրագործումներեն հետո, ձեր համայնքները լծված են այժմ նույնքան կարևոր կրթական գործնեության, այսինքն դպրոցաշինա-կան իրագործումներու, ամերիկյան բազմալեզու աշխարհի մեջ կենդանի ու վառ պահպանելու համար մեր մայրենի լեզուն և հայ դպրության ու մշակույ-

թի լույսը, որոնք անկորնչելի արժեքներ կհանդիսանան աշխարհի քաղաքակրթության հորիզոնին վրա:

Հպարտ եղեք մեր քրիստոնեական հավատքով: Հպարտ եղեք մեր ազգային լեզվով և մշակութային արժեքներով: Այսպես է որ դուք՝ ձեր սուսգնորդության հանձնված ժողովուրդը, պիտի պահպանեք իր հարազատ կրոնական ու մշակութային ոգեկանությամբ, այսպես է որ ինքնություն վավերական արժեք և իմաստ պիտի ստանա ձեր հավաքական ներկայությունը, ձեր հայկական գոյատևումը Ամերիկայի մեջ, որ դուք ամեն ազատություն կվայելեք նաև այդ տեսակետին:

Այս խոհերով և հորդորներով Մենք ձեզի կմաղթենք աշխատանքի անսպառ կորով, աննահանջ հավատք և պայծառ լավատեսություն ձեր առաքելության նկատմամբ և Մայր Աթոռ սուրբ Էջմիածնին ձեզի ամենուր կրեռենք Մեր սրտագին գնահատանքը և օրհնությունը հայրական:

«Հսկեցէք, հաստատուն կացէք ի հաւատս, ժրացարոյք, զօրացարոյք ամենայն ինչ ձեր սիրով լինիցի» (Ա. Կորնթ. ԺԶ. 13—14). ամեն:





ՎԵՀԱՓԱՌ ՀԱՅՐԱՊԵՏԻ ՈՂՋՈՒՅՆԻ ԵՎ ՕՐՀՆՈՒԹՅԱՆ
ԳԻՐԸ՝ ՈՒՂՂՅԱԼ ՄԻԱՑՅԱԼ ՆԱՀԱՆԳԱՑ ՀԱՅՈՑ
ԱՐԵՎԵԼՅԱՆ ԹԵՄԻ ՀՈԳԵՎՈՐԱԿԱՆԱՑ ՀԱՄԱԳՈՒՄԱՐԻՆ
(1977 թ. փետրվարի 7)

Սուրբ Էջմիածնեն և Մեր սրտեն ձեզի ամենուդ հայրական սիրո ողջույն և օրհնություն, բարի մաղթանքներով հանդերձ ձեր հոգեշեն աշխատանքներու լիակատար հաջողության համար:

Կհրճվի Մեր հոգին ամեն անգամ երբ գրիչը ձեռք կառնենք ձեր համագումարներուն առաքելու համար Մեր ողջույնը, Մեր սրտի խոսքը:

Կհրճվի Մեր հոգին, այո, որովհետև քաջ գիտենք թե ձեր համագումարներու նպատակն է հոգևոր շինությունը՝ Մեր ամերիկահայ զավակներուն և ամենց կյանքին մեջ անխառն պահպանումը հայկական ազգային ոգեկանության:

Հայոց Հայրապետը Իր հոգվո հսկացքը ձեր վրա սկեռած, լավատեսությամբ կապասե որ դուք բոլորդ՝ ուխտապահ սպասավորներ Հայաստանյայց եկեղեցվո, սուրբ Հոգիով լեցված, կարգապահ շարքերով նվիրվիք ձեր առաքելության՝ աներեի ու անշիտ, ղեկավարությամբ ներքև ձեր թեմակալ առաջնորդ սրբազան Հոր:

Ամուր կանգնած մեր նախնյաց լույս հավատքի վեմին վրա, լավատես դեպի հայ ժողովուրդի ապագան, մի տարվիք շփոթեցուցիչ մտածումներե և հոսանքներե: Վնիտ ու անաղարտ պահպանեցեք մեր ժողովուրդի հոգին, իր քրիստոնեական և հայկական ազգային արժեքներով, որոնք անցնող դարերու նվիրական ժառանգությունը կհանդիսանան մեր ազգին: Այս է, այս պետք է ըլլա ձեր բոլորի հիմնական և տևական մտահոգությունը, ձեր բոլորի հիմնական ու տևական մտասկեռումը, ձեր բոլորի հովվական գործնեության առանցքը:

Գիտենք թե այս ճանապարհը դժվարին է և հաճախ տատապակից, անհաղթահարելի թվացող արգելակիչ պայմաններու առջև, սակայն այս է որ կսպասվի ձեզմե, այս է ձեր աշխատանքի ճամփան, որով դուք պիտի կարողանաք փրկության ափին քերել մեր պանդուխտ ժողովուրդը: Այս է ձեր իրավ փառքի ճամփան:


Թող Աստված շեն ու լուսառատ պահպանե ձեր աղոթքի Տուները:

Թող Աստված անփորձ ու անվտանգ, մեկ ու անբաժան պահպանե համայն հայ հավատացյալ ժողովուրդը հԱՄԵՐԻԿԱ:

Թող Աստված նոր ներշնչումներ, հոգատարություն ու գործելու անսպառ եռանդ պարգևե ձեզի բոլորիդ, այժմ և միշտ:

«Ո՞վ իցէ իմաստուն և հանճարեղ ի ձեզ, ցուցցէ ի բարոք գնացից զգործս իր հեղութեամբ իմաստութեանն» (Հակոբ. առաք. Գ. 13). ամեն:





ՍՐԲՈՑ ՎԱՐԴԱՆԱՆՑ ԶՈՐԱՎԱՐԱՅ ՏՈՆԸ ԵՎ ՎԵՀԱՓԱՌ
ՀԱՅՐԱՊԵՏԻ ԱՆՎԱՆԱԿՈՉՈՒԹՅԱՆ ՏԱՐԵԴԱՐՁԸ ՄԱՅՐ
ԱԹՈՌՈՒՄ

Այս տարի ևս Մայր Աթոռում հանդիսավորությամբ նշվեցին «Սրբոց Ղևոնդեանց քահանայից» և «Սրբոց Վարդանանց զօրավարացն մերոց հազար երեսուն և վեց վկայիցն, որք կատարեցան ի մեծի պատերազմին» տոները և Հայոց Վեհափառ Հոր անվանակոչության տարեդարձը:

Փետրվարի 17-ին, հինգշաբթի օրը, Մայր տաճարում, ս. Վարդանանց տոնի առիթով, հանդիսավոր ս. պատարագ է մատուցում ս. Գեղարդ վանքի վանահայր տ. Վահան եպս. Տեղյալը: «Հայր մեր»-ից առաջ կատարվում է հոգեհանգիստ՝ «վասն համօրէն ննջեցելոց ազգիս հայոց»:

Հավարտ ս. պատարագի Իջման ս. սեղանի առջև օրվա տոնի եկեղեցասիրական և հայրենասիրական նշանակության մասին բովանդակայից քարոզ է խոսում պատարագիչ սրբազանը՝ որդիական երախտագիտությամբ և շնորհակալությամբ շնորհավորելով Վեհափառ Հայրապետի անվանակոչության տոնը: Ապա կատարվում է հայրապետական մատթանը:

Նույն օրը, ժամը 13-ին, ս. Վարդանանց տոնի առիթով, հոգևոր ճեմարանի հանդիսության դահլիճում տեղի է ունենում հանդես՝ նախագահությամբ Մայր Աթոռի դիվանապետ տ. Արսեն եպս. Բերքերյանի:

Նախագահության սեղանի շուրջ տեղ էին գրավել նաև լուսարարապետ տ. Հուսիկ եպս. Սանթրույանը, հոգևոր ճեմարանի տեսուչ տ. Հովհաննես ավագ քհն. Մարությանն ու փոխտեսուչ տ. Անանիա վրդ. Արաքաջյանը:

Հանդեսն սկսվում է Հայաստանի պետական հիմնի կատարմամբ, որին հաջորդում է «Ծեմարանի քայլերգ» խմբերգը:

Հանդիսության առիթով բացման խոսք է ասում հոգևոր ճեմարանի փոխտեսուչ տ. Անանիա վրդ. Արաքաջյանը:

Ապա ճեմարանի սաները ոգևորությամբ կատարում են «Նորահրաշ պապկաւոր» և «Արիացեալք» շարականները:

Օրվա խորհրդին նվիրված զեկուցումով հանդես է գալիս հոգևոր ճեմարանի հայ ժողովրդի պատմության դասախոս, դոցենտ Սիմոն Կրկյաշարյանը:

Հարգելի բանախոսը հակիրճ, քայքայման և զոհողական ձևով վեր է հանում Ղևոնդյանց և Վարդանանց կատարած հերոսական սխրանքը Ե դարի կեսին հայ ժողովրդի պատմության ճգնաժամային ու ծանր օրերին:

Վարդանանց պատերազմը միակ պատերազմն է եղել հայոց վաղ անցյալի պատմության մեջ, որին իր մեծ մասնակցությունն են բերել հավասարապես հայ ժողովրդի բոլոր դասերի ներկայացուցիչները: Այլ խոսքով՝ այդ կոիվը հայրենական պատերազմի բնույթ է ունեցել:

Հարգելի բանախոսը վերջում, որդիական երախտագիտությամբ շնորհավորելով մեր սիրելի Հայրապետի անվանակոչության տարեդարձը, ասաց.

«Վարդանանց ու Ղևոնդյանց այս տոնի առիթով պարտք ենք համարում հիշել, որ այսօր տոնն է նաև անվանակոչության ազգիս Հայրապետ Ն. Ս. Օ. Տ. Տ. Վազգեն Ա

կայողիկոսի: Ծնորհավորում ենք Վեհափառին և ի սրտե մաղթում, իր գահակալության 22-րդ տարեդարձի առթիվ, որ Տերը երկար կյանք պարգևի Նորին Սուրբ Օծությանը՝ ի փառս Հայաստանյայց սուրբ եկեղեցու և ի բարօրություն հայ ժողովրդի, որ ի Հայաստան երկրի և ի սփյուռն աշխարհի»:

Բանախոսությունից հետո գործադրվում է գեղարվեստական մի հայտագիր՝ հոգևոր ճեմարանի ուսանողության կատարմամբ:


Սուրբ Ղևոնդյանց և Վարդանանց հիշատակին նվիրված հանդիսությունն ավարտվում է տ. Արսեն եպս. հերթերյանի խոսքով: Նախագահող սրբազանը մի անգամ ևս ոգեկոչում է հայ եկեղեցու և հայ ժողովրդի մահադատների խնկելի հիշատակը, որոնք ընկան 451 թվականի մայիսի 26-ին Ավարայրում, 1036 հայ քաջերի հետ միա-

սին՝ «վասն Հիսուսի և վասն հայրենյաց» տղված անհավասար մարտում:

Սրբազանն իր խոսքում կոչ ուղղեց Մայր Աթոռի միաբանությանը և հոգևոր ճեմարանի ուսանողությանը՝ միշտ ոգևորվել և առաջնորդվել ս. Ղևոնդյանց պանծալի քահանաների գոհողության ոգով և Վարդանանց քաջամարտիկ հերոսների հայրենասիրական սիրանքով:

Իր խոսքի վերջում սրբազան հայրը որդիական երախտիքով, հանուն Մայր Աթոռի միաբանության, մի անգամ ևս շնորհավորեց Վեհափառ Հայրապետի անվանակոչության տոնը՝ մաղթելով Նրան երկա՛ր-երկա՛ր արևոտ տարիների կյանք Լուսավորչի դարավոր սուրբ զահի վրա՝ ի պայծառություն Մայր Աթոռ սուրբ Էջմիածնի, ի մխիթարություն հայ ժողովրդի, որ ի սփյուռն և ի հայրենիս, և ի բարօրություն հայրենյաց:





ԵԿԵՂԵՑԱԿԱՆ ԲԵՄ. ԼՈՒՐԵՐ

Փետրվարի 4-ին, ուրբաթ.—Այսօր Երևանում, հայրապետական վիլլայում, Վեհափառ Հայրապետի նախագահությամբ տեղի է ունենում Գերագույն հոգևոր խորհրդի հերթական նիստը:

* *

Փետրվարի 6-ին, կիրակի.—Այսօր Մայր տաճարում ս. պատարագ է մատուցում Ռուսաստանի և Նոր Նախիջևանի առաջնորդական փոխանորդ տ. Տիրան վրդ. Կյուրեղյանը: «Հայր մեր»-ից առաջ քարոզում է Վեհափառ Հայրապետը ս. Սարգիս զորավարի տոնի առիթով՝ «Պատուական է առաջի Տեսուն մահ սրբոց իւրոց» (Սաղմոս ԾԺԵ 15) բնաբանով:

* *

Փետրվարի 8-ին, երեքշաբթի.—Այսօր հոգևոր ճեմարանի ուսանողությունը տեսչության ղեկավարությամբ եռօրյա ձմեռային շրջապտույտի է մեկնում Աղվերան:

* *

Փետրվարի 18-ին, կիրակի.—Այսօր Մայր տաճարում հրաժեշտի պատարագ է մատուցում Անթիլիասի կաթողիկոսության միաբան տ. Անուշավան վրդ. Դանիելյանը, որը շուրջ երկու ամիս ուխտավորաբար գտնվում էր Մայր Աթոռում: «Հայր մեր»-ից առաջ քարոզում է Վեհափառ Հայրապետը՝ «Եթէ էք ծարաի իցէ, եկեցէ առ իս եւ արբցէ» (Հովն. Է 37) բնաբանով:

* *

Փետրվարի 18-ին, կիրակի.—Այսօր Մայր տաճարում, երեկոյան ժամասացությունից հետո, կատարվում է Տեառնընդառաջի նախատոնակ և անդաստան Վեհափառ Հայրապետի հանդիսադրությամբ:

Նույն օրը, երեկոյան ժամը 19.30-ին, հոգևոր ճեմարանի մարզադաշտում, Մայր Աթոռի միաբանության, հոգևոր ճեմարանի դասախոսների և ուսանողների ծախերի տակ Վեհափառ Հայրապետը վառում է Տեառնընդառաջի ավանդական խարույկը: Ժամը 19-ին Վեհափառ Հայրապետը վա-

նական սեղանատանը, օրվա մեծ տոնի առիթով, բարեհաճում է Իրեն սեղանակից դարձնել միաբանության անդամներին, հոգևոր ճեմարանի դասախոսական կազմին և ուսանողությանը:

Փետրվարի 14-ին, երկուշաբթի.—Տեառն-բնդառաջ, տոն քառասնօրեայ գալստեանն Քրիստոսի ի տաճարն.

Այսօր Մայր տաճարում ա. պատարագ է մատուցում տ. Հովհաննես ավագ քին. Մարտիանը:

Փետրվարի 16-ին, չորեքշաբթի.—Այսօր Մայր տաճարում, երեկոյան ժամասացությունից հետո, կատարվում է սուրբ Վարդանանց նախատոնակը՝ նախագահությամբ լուսարարապետ տ. Հուսիկ եպս. Սանթրոքյանի:

Փետրվարի 20-ին, կիրակի.—Բուն բաբեկենդան:

Այսօր Մայր տաճարում, փակ խորանի առջև, ա. պատարագ է մատուցում տ. Թորգոմ վրդ. Մուշեղյանը: «Հայր մեր»-ից ա-


ռաջ, օրվա խորհրդի առթիվ, քարոզում է տ. Անուշավան վրդ. Դանիելյանը՝ «Ընդ Ջրիստոսի պահելով յաղթող լիցուք գործողին եւ ընդ հրեշտակս երգեսցուք փառք ի բարձունս Աստուծոյ» (շարական) բնաբանով:

Փետրվարի 24-ին, հինգշաբթի.—Այսօր, երեկոյան ժամը 19-ին, հոգևոր ճեմարանի հանդիսությանց դահլիճում, ճեմարանի ուսանողների և միաբանության համար, «Աստուական աղբյուրները հայերի և Հայաստանի մասին» թեմայով իր երկրորդ դասախոսությունն է կարդում Երևանի պատմության ինստիտուտի գիտաշխատող, պատմական գիտությունների թեկնածու Հայկ Մելքոնյանը:

Փետրվարի 27-ին, կիրակի.—Արտաքրանան կիրակի.

Այսօր Մայր տաճարում, փակ խորանի առջև, ա. պատարագ է մատուցում տ. Նշան քին. Բեյերյանը: «Հայր մեր»-ից առաջ քարոզում է Վեհափառ Հայրապետը՝ «Արդ եղերոք դուք կատարեալք, որպէս եւ Հայրն ձեր երկնատր կատարեալ է» (Մատթ. Ե 48) բնաբանով:





ՍՈՒՐԲ ՂԵՎՈՆԴՅԱՆՔ

«Յիշատակ արդարոյ գոյութեամբ,
անուն ամպարշտաց շիջցի»
(Առակ. Ժ 7)

Մեր եկեղեցին ամեն տարի Մեծ պահքից առաջ, մի ամբողջ յոթնյակ, գեղեցիկ մտածումն է ունեցել մասնավոր կարևորությամբ համախմբելու ազգային հիշատակներին նվիրված տոները, որոնք սերտորեն կապված են Ե դարի հայ հավատքի, հայ ժողովրդի և հայրենիքի պատմության հետ: Այս կարգադրությունը եկեղեցական-հայրենասիրական մասնավոր նշանակություն ունի մեր հավատացյալ ժողովրդի կյանքում:

Այդ յոթնյակի առաջին տոնն է ս. Սահակ Պարթև Հայրապետի տոնը: Դրանով շեշտվում է, որ յոթնյակի երկու մեծ ու կարևոր տոնախմբությունները՝ ս. Ղևոնդյանց քահանայից ու ս. Վարդանանց քաջամարտիկ նահատակները, հարազատ սերունդներն ու աշակերտներն են մեծ լուսավորիչ Հայոց Հայրապետի, նահատակներ, որոնք «արդարությամբն ճոխացեալ, իմաստութեամբն պայծառացեալ, հեղին գարիմս իրեանց ի նորոգումն եկեղեցւոյ»:

Այս իմաստով Ղևոնդյանց նահատակությունը հերոսացումն է հայ եկեղեցու, իսկ Ս. Վարդայրը՝ հավաքական սրբացումը հայ ժողովրդի:

Ս. Ղևոնդյանց ոգով և Վարդանանց խորհրդով սերունդներ են դաստիարակվել և այսպես անցել են դարեր ու դարեր:

Փոխվում են ժամանակները, փոխվում են նաև հանուն հավատքի և հայրենիքի մղված պայքարի ձևերն ու կերպերը, քայց մնում է հայ ժողովրդի գիտակից վճռականությունը ապրելու, ստեղծագործելու, պահելու իր հոգու և մտքի անկախությունը, իր հայրենի սրբազան հողը:

Սուրբ Ղևոնդյանք Հազկերտի դավանափոխության պատասխան նամակը խմբագրողներից և Վարդանանց հերոսամարտը նախապատրաստողներից են. Հովսեփ կաթողիկոս Վայոցձորեցի կամ Հողոցմեցի, Ղևոնդ երեց, Սահակ եպս. Ռշտունեցի, Մուշե Աղբակեցի, Արշեն Բագրևանդեցի, Սամվել և Խորեն երեցներ, Քաջաջ և Արարահամ սարկավագներ, անուններ, որոնք ևս, ինչպես Վարդանանք, ընկան «վասն Յիսուսի և վասն հայրենեաց»: Հազկերտը քաջ գիտեր, որ հայ եկեղեցու այս սպասավորներն են, որ Վարդանի մահից ահա երեք տարի անց «Իմացեալ մահ» դրոշով դեռ շարունակում են ոգեշնչել Հայոց աշխարհը և մերժում են մագդեզը ու Հայոց երկիրը զապանակված պահում Պարսկաստանի դեմ: Այդ, նա գիտակցում էր, որ ստրկությունը մերժողների քարոյական հաղթանակի դրոշն առաջինը պարզողներն այս անհողորդ խումբն է՝ Ղևոնդյանք, Ավարայրը տեսած, մասամբ մասնակցած և իրենց հոգևոր-քարոյական աջակցությունը բերած:

Ավարայրին խաղաղություն չհաջորդեց, և այդ օրերին էլ այս քահանաների խումբը, գլխավորությամբ Ղևոնդ երեցի, ազգին առաջնորդեց իր ուղիղ ու փրկարար ճանապարհով, մեր ս. եկեղեցու և հայրենիքի ոգու շահերի համաձայն՝ միշտ մույն քաջ կեցվածքով:

Մեծ պատերազմը և հետագայի օրերը Ղևոնդյանց միջոցով ո՛չ հուսահատություն բերեց և ո՛չ էլ տեղատվություն, ուստի հետո էլ նրանք շարունակում էին իրենց ճշ-

մարիտ քարոզչությունը՝ հրավիրելով բոլորին համախմբվելու հայ եկեղեցու հովանու ներքո և ս. Վարդանի ու հայրենաշեն աշխատանքի շուրջ, և եթե անհրաժեշտ է՝ հասնառակվելու: Ս. Ղևոնդյանը շարունակում էին ուսուցանել, թե մեր գործն արդար է, և թե ուրեմն «Յիշատակ արդարոյ գոլորտեանք, անուն ամպարշտաց շիջցի»: Այսպես Ղևոնդյանը նորովի ամրապնդում են ժողովրդի ոգին քաղաքական-հայրենասիրական հողի վրա և նախապատրաստում հոգու ասրկությունը մերժելու հազվերտյան ամեն մի առաջարկի դեմ:

Հազվերտն իր թագավորության 18-րդ տարում պարտվում է քուշաններից: Ըստ նրա, այս դեպքում էլ իր պարտության պատճառը հայերն էին և մանավանդ Ղեմոնդյանը, որոնք Վարդանից հետո դեռ համատրեմ շարունակում էին երկրի առաջնորդության դեմն իրենց ձեռքում պահել: Ուստի ժամանակը չէ՞, մտածում էր նա, ստիպել մագդեզն ընդունել տալ և կարևոր վճռակառությունը ազատվել թե՛ նրանցից և թե՛ նրանց անեծքից, որ պատճառն էր իր պարտության՝ քուշաններից: Այս որոշման վրա քահանաները կանչվում են Պարսկաստան և աքսորվում: Ապար աշխարհի Նյու-Չապուն բերդում ստիպումներով և բռնությամբ նրանց դավանափոխությունը հանձնրվում է մոգպետին: Բայց Ղևոնդյանը բանտում էլ նույնն էին, ինչ որ իրենց տանը կամ Ավարայրի օրերին. «Յայսմ հաւատոց գմեզ ոչ որ կարէ խախտել՝ ոչ հրեշտակք և ոչ մարդիկ, ոչ սուր և ոչ հուր, ոչ ջուր, ոչ ամենայն գիւն և դառն հարուածք»: Լավ է աւակած՝ «Միրուն ունի բանականություն, որ բանականությունը չգիտէ» (Պատկալ): Սակայն Հազվերտի և նմանների համար ի՞նչ սիրտ և ի՞նչ բանականություն: Ամեն մի ժողովուրդ այս աշխարհում ազատ ապրելու իր իրավունքն ունի: Նրանք չգիտեին, որ մարդուն բանտարկելով կամ սպանելով նրա միտքն ու հոգին չես կարող վանդակի մեջ դնել, ու չէ՞ որ քրիստոնյաների համար կար նաև վերերկրայինը՝ հավիտենականը, որ նախ իմաստավորվում է այստեղ ապրելվածով և ապա անանցով:

Հայ բանտարկյալների նկատմամբ գործադրված անմարդկային չարչարանքները և դաժանությունները տևում են 23 օր: Դեմ-շապուհը, որի պարտականությունն էր հավատափոխության ստիպումը, համոզվելով իր ցանքերի ապարդյուն լինելը, նոր հրամանի համաձայն նվիրյալներին առաջնորդեց կառափնարան: Այստեղ էլ Ղևոնդյանը կրկնում էին ս. Վարդանի հավատամբ-խառքը. «Երկիրդ թերահաւատութեանն է

նշանակ, գրեթեհաւատութիւն մեր ի մեզն վաղ մեծեցաք»: Ուստի այս լինելու և չլինելու պահին իսկ Ղևոնդյանը քաջաբար մերժում էին ամեն մի փոխգիշում, որպեսզի չվտանգվեն հարազատ ժողովրդի և եկեղեցու նվիրական շահերը:

Ամեն բան վերջացած էր: Ի վերջո որոշվում է հաճառակել ս. Ղևոնդյանց քահանայից: Եվ քահանաները քաջությամբ հաճառակվում են: Նրանց սպանում են ամենաանմարդկային ձևերով. ոմանց զահավեժ սարերից ցած են նետում, ուրիշների ձեռքն են կոտրում, ոտքը կամ ականջը և հետո սպանում, իսկ մնացածներին էլ, քրաժեժ անելուց հետո, քարկոծում և հաճառակում:

Արժանին մատուցելու համար հիշենք նաև Ղևոնդյանց հետ և նրանց շարքին այստեղ հաճառակված նորադարձ պարսիկների՝ դեմպետի գլխավորությամբ:

Այսպես Վարդան Մամիկոնյանով սկսած հավատքի և հայրենասիրության պատերազմը շարունակվում է և պատկազարդվում մեր եկեղեցու այս սրբերի հաճառակությամբ: Այո՛, այսպես միշտ, երբ անհրաժեշտ է, հայ հոգևորականը գիտն թե՛ արտասանել իր քարոզչությունը և թե՛ խոսքը մերածել գործի՝ ասելով. «Ոչ եմ իրրև զայս ի մարդկանէ» (Ղով. ԺԸ 11): Իսկ մանավանդ եթե ս. Մահակի և ս. Մեսրոպի անմիջական աշակերտն ես, ինչպես Ղևոնդյանը, չես կարող մոլորյալ և հավատորաջ հանապարհով գնալ: Մեր ս. եկեղեցու այդ լուսավորիչները վստեցին լույսը մեր հոգիների և ս. Ավետարանով դարձյալ ու դարձյալ պահանջեցին. «Այս է պատուեր իմ, զի սիրեսցիք զմիմեանս, որպէս և ես սիրեցի զձեզ: Մեծ ես քան զայս սեր ոչ որ ունի, եթէ զանձն իր դնիցէ ի վերայ բարեխառաց խոց» (Հովն. ԺԵ 43):

Ղևոնդյանը՝ մեր եկեղեցու ուխտապահ և սուրբ զինվորները, հաճառակ քաջերը մեր հայրենիքի, իրենց անձր զոհեցին հանուն Աստուծո, հանուն հայրենիքի, որպեսզի ոչ միայն իրենց միջոցով հավետ ապրի մեր երկիրը և նրա ժողովուրդը, այլև մեր քրիստոնեական եկեղեցին, որի սպասավորությանն աղոյես անկաշատ ծառայեցին իրենք: Այսօր նրանք սրբացված են, «... և սուրբ հոգիք նոցա հոգևոր բարեխառութեամբն զԱստուած լողորմութիւն աշխարհի ածեն և նշխարք ոսկերաց նոցա փրկութեան շնորհ ընծայեն ի ժողովս հաւատացեղոց, որպէս ամենեցուն և քաջայայտ է զի երևեսցի սերն Աստուծոյ ի նոցա նշխարսն բնականայ» («Հաճախապատում» ԺԶ):

Պատմության ընթացքում միշտ էլ, երբ մեր երկրի երկրի վրա մուսլ ամպեր են

կուտակվել, և Վարդանով, Ղևոնդյանց ոգով և հավատքով մենք կարողացել ենք ի չիք դարձնել ամեն մի վտանգ: Այդպես չէ՞ր, որ մենք հաղթեցինք Սասունում և Զեյթունում, և այդպես չէ՞ր, որ Սարդարապատում և հայրենական մեծ պատերազմում մեր ազգի զավակները փայլեցին իրենց հերոսական, որ և նույնն է՝ Ղևոնդյանց ոգով: Սարդարապատում մերօրյա Ղևոնդ երեցներ դարձան Գարեգին եպս. Հովսեփյանցը՝ ս. Էջմիածնից, Զավեն արքեպ. Մահոնսի Բաբայանը՝ առաջնորդն Էրզրումի, Եզնիկ եպիսկոպոսը և Դանիել վարդապետը՝ Ադրամարի վանքից, Թադեոս վարդապետը՝ Մշո Առաքելոց վանքից, Հովհաննես քին. Տեր-Մինասյանը՝ Ապարանից, Հարություն քահանան՝ իր 250 մարդկանցով Կոտայքից, և շատ ուրիշներ, նաև աշխարհագրայիններ Հայաստանի զանազան շրջաններից:

Հովհաննես Իմաստասեր Սարկավազ վարդապետը գրել է ս. Ղևոնդյանց քահանայից հիշատակին նվիրված Օրհնությունը՝ «Որ յառաջագոյն սահմանեցեր», և Մանկունքը՝ «Պայծառացան այսօր սուրբ եկե-

ղեցիք»: Սարկավազ վարդապետն իր շարականներով աշխատել է Ղևոնդյանց կրոնաբույր և հայրենասեր ոգին զարթեցնել հայ ժողովրդի գաղթական բնկորների մեջ և ողջ հայությանը հավաքել հայ եկեղեցու հովանու ներքո:

Այս երկու շարականները խնդրանք ու աղերսանքներ են՝ ուղղված Աստծուն, որ «Աստված. հայ եկեղեցու ցրված մանուկներին, տրտմությամբ և հորդահոս արտասուքով բռնագաղթվածներին նորից ժողովի ուրախությամբ և փրկի» Հայոց աշխարհում: Հայրենի հողի վրա «ցրված հայ ժողովրդին հավաքելու այս տենչն ու ձգտումն ահա դառնում է մի նվիրական իղձ ու աղոթք և շատ վաղ՝ Սարկավազ վարդապետի ձեռքով մտնում են մեր ժամերգության մեջ» (Մ. Արեղյան):

Փա՛րք Ղևոնդյանց սուրբ հիշատակին և նրանցով մեզ ավանդված ճշմարիտ եկեղեցասիրությանն ու հայրենասիրությանը:

ՆԱՐԵԿ ԵՊԻՍԿՈՊՈՍ ԾԱԲԱՐՅԱՆ





ՄԵԾ ՊԱՀՈՅ ԽՈՂԵՐ

Ա.

«Դարձոն զերեսս քո ի մեղաց իմոց, և զամենայն անօրէնութիւնս իմ քանա լինեն: Սիրտ սուրբ հաստատես յիս, Աստուած, և հոգի ուղիղ նորոգես ի փորի իմում» (Սաղմոս Ծ 11—12):

Աստված, դարձրու քո երեսը իմ մեղքերից և իմ բոլոր անօրէնությունները ինձնից հեռացրու: Իմ մեջ հաստատիր սուրբ սիրտ և իմ էության մեջ նորոգիր ուղիղ հոգի:

Քարեկենդան է այսօր, և Հայաստանյայց եկեղեցին ու իր հավատացյալ զավակները կանգնած են նրա սեմին՝ դիմալորելու համար հոգևոր վերածննդի մի շրջան: Հաջորդ քառասուն օրերի ընթացքում եկեղեցին, երբև մեր խնամակալ մայրը, Աստվածաշնչի հոգևոր սննդով մեզ պատրաստում է ընկալելու Քրիստոսի հրաշափառ Հարությունը: Ծուռով սկսվող Մեծ պահքի շրջանը պետք է ամեն մեկիս համար դառնա մի շրջան հույսի ու լույսի, մի շրջան՝ վերստին ծնվելու և նորոգվելու, մի շրջան՝ մխիթարանքի ու հրճվանքի: Վերածնունդ ու վերանորոգում, հույս և լույս, մխիթարանք ու հրճվանք հոգեկան մաքառումների արդյունք են, որոնցում չարը ընդմիշտ հաղթվում է: Եթե մենք ցանկանում ենք մասնակից լինել Քրիստոսի Հարությանը ու Նրա շնորհած լույսին ու հույսին, եթե ցանկա-

նում ենք հրճվել ու մխիթարվել ի տես ոտնակոխ արված մահվան, եթե փափագում ենք իրապես վերածնվել ու վերանորոգվել ինչպես ինքը Քրիստոսը Զատիկ արշալույսին, ապա մենք մեզ պետք է գտնենք նախապատրաստվելու քաղցր պարտականության ներքո:

Ահա թե ինչու մենք Մեծ պահքը դիմափորում ենք սաղմոսերգոյի վերոհիշյալ աղերսանքով: Այստեղ պետք է ընդգծել Սաղմոսաց Գրքի կարևորությունը և անհրաժեշտությունը իբրև անարատ աղբյուր աստվածապաշտության, երբ քաղում դարեր, Հին Կտակարանի օրերից սկսած մինչև մեր ժամանակները, բյուրավոր մարդիկ հոգու խորքերից բխած այդ քաղցր ու համարձակ երգերի միջոցով կամեցել են հաղորդակցության մեջ մտնել իրենց Արարչի հետ: Ահա թե ինչու քրիստոնեական եկեղեցին ծառանգել ու խորթ չի գտել Հին Ուխտի այդ սովորույթը: Ահա թե ինչու Հայաստանյայց եկեղեցին լայն տեղ է հատկացրել իմաստուն սաղմոսերգոյին՝ հաճախ քաղելով նրա ջերմեռանդ բովանդակությունից հոգևոր սնունդ իր ամենօրյա պաշտամունքի ընթացքում:

Ինչքան հիանալի ու հաճելի կլիներ մեր կենցաղն ու ապրելակերպը, եթե մենք

նույնպես, ըստ մեր կարողության, նմանվեմք սաղմոսերգուին, որ դիմեց իր Արարչին սույն խնդրանքով:

«Աստված, դարձրու քո երեսը իմ մեղքերից և իմ բոլոր անօրենությունները ինձից հեռացրո՛ւ»:

Արդյոք այս չէ՞ իմաստը կյանքի, որ մենք մահկանացուներս բաղձանք ունենանք ընդմիջտ նորոգվելու ու վերածնվելու, հոգեպես մեզ մաքուր զգալու, հոգեպես ազատ լինելու ու անկաշկանդ, որ մեր կարճ երկրային կյանքն էլ ունենա մի խորունկ իմաստ ու պայմանավորված չլինի աշխարհիկ այլազան ու երբեմն այլանդակ արտահայտություններով:

Վերոհիշյալ բնաբանով մեղապարտ հոգին ուրիշ ոչինչ չի խնդրի Նախախնամությունից, եթե ոչ՝ փրկվել հոգեկան տագնապներից, եթե ոչ՝ ձերբազատվել մեղքի ճիրաններից: Ինչպե՞ս կարելի է ողջունել Քրիստոսի փառապանծ Հարությունը, եթե մեր ամբողջ էությանը գործակալները եղած լինենք խավարի իշխանի՝ կատարելով նրա հազար ու մեկ քմահաճույքները: Ահա թե ինչու սաղմոսների բոլոր աղաղակներն ու աղերսանքներն առ Աստված ազատագրական պոթելումներ են, որոնց շնորհիվ մենք կփութանք վերադառնալ երկնային անդաստանից ներս իբրև մաքուր ու անաղարտ հոգիներ՝ հրավիրելու Աստծուն, որ գա ու բնակվի մեր մեջ:

Մարդկության հատուկ ու բնական ակտագիրն հետևյալն է՝ լինել տաճարներ երեքսրբյան մի Տերության: Իմ ընտրած բնաբանը վկա է այս սքանչելագործ իրողության: Սաղմոսերգուն ոչ թե խնդրում է միայն ու միայն իր մեղքերի ներումն ու քավությունը, այլ շատ ավելին, այնիսքն այն, որ նա հանդգնություն է ունենում խնդրելու իր Արարչից, որ Նա իր տկար ու սահմանափակ էության մեջ սուրբ սիրտ հաստատի և այնտեղ նորոգի ուղիղ հոգի: Այլ խոսքով՝ նա ցանկանում է վերադառնալ այն հոգեվիճակին, երբ դեռ մեղքը գոյություն

չունեիր նրա մեջ, այսինքն լինել մի նոր ստեղծագործություն Աստծու պատկերով:

Ու դեռ շատ ավելին. նա խնդրում է, որ իր ստեղծողի պատկերն իր մեջ մնա առհավետ և այս իսկ պատճառով նա հայցում է սուրբ Հոգու ներգործությունը: Սուրբ Հոգին է, որ մեզ ու մեր կամքին գործություն է տալիս՝ դիմադրելու ամեն տեսակի փորձությանց ու մեր անձերը պահել կայուն ու հաստատ: Ահա սաղմոսերգուի հրաշալի խնդրանքը, խնդրանք, որ պետք է դառնա ամեն մեկիս անձնական ցանկությունը.— «Սիրտ սուրբ հաստատեա յիս, Աստուած, և հոգի ուղիղ նորոգեա ի փորի իմում...»:

Ցանկալի պիտի լինեիր, եթե բոլորս ջանալիք հաջորդ քառասուն օրերի ընթացքում ընթերցել ու վերընթերցել սաղմոսները՝ հասկանալու համար այնտեղ թաքնված գանձերի նպատակը: Վստահ ենք, որ բազում պատասխաններ պիտի գտնենք այնտեղ մեզ հուզող տարբեր հարցերի մասին: Սաղմոսներն արտահայտում են բազմազան հոգևոր տրամադրություններ ու վիճակներ և, չենք կարծում, որ գտնվի մարդկային հոգեկան մի ապրում, մի տեղյակ, որ Աստվածաշնչի այդ էջերում ներկայացված չլինեն վճիռ ու միշտ այժմեական բնություն:

Եկեք ուրեմն Մեծ պահքի նախապարտադրական շրջանին իմաստությունն ունենանք դիմելու մեր Աստծուն, որ մեր քարտեհն սրտերո մսի իր սիրով, ինչպես ասում է սուրբ Ներսես Ծմորհային: Սաղմոսները պիտի սովորեցնեն բոլորիս Աստված փնտրելու և փառաբանելու խորհրդորդ խոր ու հստակ ձևով: Ու մենք մաքուր հոգիներով հրավեր կարդանք, որ մեր մեջ մերոստին ծնվի աստվածային աստվեճող կենարար, որ մեր մեջ վերստին բնակվի Հալույալ Քրիստոսը Ջատկի լուսածագին:

Տե՛ր Աստված հարցն մերոց, «Ուրախ լինի ամենեքեան ուր յուսագեալ են ի քեզ, յաիտեան ցնծասեան. և բնակեցես դու ի նոսա» (Մաղմոս Ե 12). ամեն:

ՎԱԶԳԵՆ ՍԱՐԿԱՎԱԳ ԱՍՍՏՈՒՐՅԱՆ

Բ

«Ձանապարհս քո ցո՛յց ինձ, և զշափղս քո ուսո՛ ինձ. առաջնորդեա՛ ինձ ի ճրճարտութեան քում և ուսո՛՝ զիս, զի դո՛ւ ես Աստուած փրկիչ իմ» (Մաղմոսաց ԻԴ 5):

«Տե՛ր, ցո՛ւց տուր ինձ քո ճանապարհները և սովորեցրո՛ւ ինձ քո շափղները. առաջնորդի՛ր ինձ քո ճշմարտության մեջ և սովորեցրո՛ւ ինձ, որովհետև դո՛ւ ես Աստված՝ իմ փրկիչը»:

Դավիթ Մարգարեի «Սաղմոսաց գրքից» վերցված այս գեղեցիկ բնաբանը մի աղաչանք է, արտագին մի աղոթք առ Աստված, Որից մարգարեն օգնություն է խնդրում: Աստված էր Դավթի միակ հույսը, Աստված էր միայն ի վիճակի օգնել նրան, ինչպես նաև բոլոր մարդկանց: Եվ մեզանից ո՞ր մեկը, սիրելի հավատացյալներ, չի զգում կարիքն Աստուծո օգնության, չի կարոտում Նրա ողորմությունը:



«Աստուած, Աստուած իմ, նայեա՛ց առ իւ. ընդէ՛ր թողեր զիս» (Մաղմուս ԻԱ 1), բացակայում էր ողջ մարդկությունը մարգարեի բերանով: Հանգստի մարդը, Աստուծոց հետո, առանց հեռախոսի, մեկնել էր զգում իրեն՝ ճշող մեղքերի ծանր բեռի տակ: Անգոր էր նա մեկնել պաշարելու իր փրկության համար, անկարող էր գտնելու, ստանց Գերագույնի օգնությանը, առ Աստված տանող վերադարձի ճանապարհը:

Մահվան սարսափը սրտում, մարդը տագնապահար աչքերով որոնում էր փրկության ճանապարհը, որը սակայն թաքնված էր իր մեղքերի վիթխարի պարսպի ետևում: Անթափանցելի արգելքը գրկում էր մարդուն աստվածային լույսից, հենց այն պահին, երբ նա ամենից շատ Նրա՝ կարիքն էր զգում: Բայց խավարն էր իշխում, և խավարածածկ աշխարհում, մեղքի որոգայթները լարած, աստուծան փորձում էր հիմնովին խորտակել մոլորված մարդուն: Բոլոր մարդիկ զգացին մեղքերի սուր ժանիքների խայթը, Աստուծոց հետո անցկացրած կյանքի անցողիկությունը: Տառապում էր մարդկությունը՝ մեղանշելով, բայց այս տառապանքի մեջ զարթոնում էր նաև մեղքի գիտակցությունը, և խղճի խայթը հանգիստ չէր թողնում մարդուն: Մարդն սկսում էր փրկուել կորցրած երանությունը՝ զգալով հանդերձ իր անկարողությունը մեկնել հասնելու դրան: Իր մեղքերով նա հեռացավ Աստուծոց, բայց հիմա նա ուզում էր վերադառնալ առ Աստված: Սակայն ո՛ր էր այդ ճանապարհը: «Զճանապարհս քո, Տէր, ցո՛յց ինձ»,—աս էր խնդրանքն ամեն մարդու, որի հոգում կար Գերագույնի գոյության հավատը, ուրեմն և հույսը օգնության:

Մարդն զգում էր, որ միայն Աստված կարող է օգնել իրեն, և սկսեց ամեն ջանք թափել արժանանալու համար Աստուծո նորոգությանը, աստվածային այս արագին: Ամրապնդվում էին հավատքն ու հույսը, և մարդը, մահվան սարսափի քրտնքի մեջ լորած, աշխատում էր փրկել իր հոգին: Զոջման ուտն արտունքները մաքրում էին մարդու հոգին՝ հեռացնելով նրա միջից մեղքերի ցեխը: Եվ ահա հարտնվում է մարդու հոգում մինչ այդ ծածկված աստվածային ճամարտության լուսատու աղամանը: Գերբնական լույսի անսպառ աղբյուրով սկսում է իր ճառագայթներով լուսավորել մարդկանց ճանապարհը: Հավատքն ստիպում է խոսել մարդուն. «Տէր, առաջնորդեա՛ ինձ ի ճամարտության քում և ուտ՛ օհս, զի դո՛ւ ես Աստուած փրկիչ իմ»: Զաւի է դառնում նորից Աստուծո ներգործությունը, և մարդն անվախ ընթանում է լուսավորված այս ճանապարհով՝ համոզված

լինելով, որ կհասնի իր նպատակին. փրկության օրը մոտենում էր:

Մարդու հոգին ձգտում էր դեպի երկինք, դեպի Աստված, դեպի իր սկզբնական ապաստանը. բայց նրան շրջապատող մեղքերի վիթխարի պարիսպն արգելում էր նրան տեսնել իր թոշիքի նպատակը: Արդյոք հուսահատությա՞ն մեջ կընկնի մարդը: Ո՛չ: Անկեղծ հավատքով, իր նպատակին հասնելու հզոր կամքով զինված մարդն անհաջող էր: Իր հոգին ազնիվ դը չի նահանջում երբեք: Իր հոգին ազնիվ էր հիմա, մարդը, և կարոտում էր միայն աստվածային անորոշությանը, երանությանը: Եվ բազմադուրս Աստված, ցանկանալով մեղավորի դարձը և ոչ կործանումը, ողորկում է աշխարհ Իր միածին Որդուն՝ Քրիստոսին, որպես մարդկության փրկիչ: Աստուծո Օծյալը՝ Տէր Հիսուս Քրիստոս, ինչպիսիք աշխարհ՝ մարդուն օգնելու համար: Նա վերացրեց աշխարհի մեղքերը, խորտակեց վիթխարի պարիսպը: Քրիստոս երկրին իջած լույսն էր, որը հայտնվեց մարդկանց՝ իրենց փրկության համար, որպեսզի նրանք խավարում չմնան, այլ, հավատալով Նրան, շարունակեն իրենց ճանապարհը որպես լույսի որդիներ: Նա է «Լույսն ճշմարիտ», և Նրա ետևից գնացողները կհասնեն երկնավոր քաղաքությանը:

Հիսուս որպես մարդ պաշարեց մեղքերի դեմ՝ ցույց տալով մարդկանց ճշմարիտ ճանապարհը ոչ միայն խոսքով, այլև իր իսկ օրինակով:

Քրիստոսն է ճանապարհն ու ճշմարտությունը, Նա է Աստված՝ կատարյալ մարդու կերպարանքով մեզ հարոնված, որպեսզի մեզ առաջնորդի դեպի հավիտենական կյանք, դեպի երանություն տանող միակ ճանապարհը: Նա եկավ ցույց տալու համար, որ կյանքը մի աննպատակ երթ չէ դեպի մահ:

Մարդկային կյանքը պետք է լինի անդուլ մի ձգտում առ Աստված. հասնելու, որովհետև Աստված է մեռ կյանքի սկիզբն ու վախճանը: Բոլորս Աստուծո կողմից ենք ստեղծվել և բոլորս պետք է վերադառնանք Նրա մոտ:

Մեր Տէրը՝ Հիսուս Քրիստոս, բազեց մարդկանց վերադարձի ճանապարհը: Բայց է բոլորի համար այդ ճանապարհը, բայց միայն հավատքի լուսով զինվածները կարող են տեսնել այն և ընթանալ նրանով: Հավատքն է հարկավոր ի Քրիստոս և կամք՝ իր օրինակին հետևելու: Ծառերը, ընթանալով առ ճանապարհով, արժանաժան հավիտենական կյանքի դափնեապակին. անկեղծ հավատքը փրկեց նրանց:

Բայց, դժբախտաբար, մեծ է նաև նրանց թիվը, որոնք չեն կարող բայել այդ ճա-

նապարհով, որովհետև հավատքը պակասում է նրանց: Նրանք չեն զգում արդյոք իրենց տկարությունը, անկարողությունը, մարդկային ուժերի սահմանափակումը: Այս բոլորը բավական կլինեն, որպեսզի մարդկանց հոգիներում առաջացնեն Աստուծո գոյության ճշմարտության զգացումը: Աստված կա, կա բոլորի՝ համար, և միայն հավատալով Նրան՝ կարող կլինենք գտնել իմաստն ու նպատակը մեր կյանքի: Միայն հավատքի շնորհիվ ի վիճակի կլինենք իմաստավորել մեր կյանքը: Հավատքն է միայն, որ մեզ պարզևս է հույսը Աստուծո օգնության: Եվ ո՞վ չի զգում դրա կարիքը մանավանդ հիմա, երբ կյանքի փորձություններն ու վտանգները սպառնում են մեզ ամենուր: Կյանքի դժվարությունների դեմ պայքարելիս բոլորս զգում ենք մեր անզորությունը, որով և զգում ենք ամենագոր Աստուծո գոյության ճշմարտության հաշտությունը մեր հոգիներում: Զգալով այս, մեզանից ամեն մեկը բացականչում է. «Տեր, առաջնորդեա՛ ինձ ի ճշմարտության քում և ուսո՛ գիս, զի դո՛ւ ես Աստուած փրկիչ իմ»: Աստված կընդունի հավատացյալի հոգուց բխած այս աղոթքը և կօգնի նրան:

Համբերություն և ուժ կպարզվի նրան, կպարզվի բոլորին, որոնք հավատում են Նրան և հույս են կապում Նրա օգնությանը: Հավատալ Աստծուն, նշանակում է հավատալ Նրա Միածին Որդուն՝ Հիսուս Քրիստոսին, որին Նա ուղարկեց աշխարհ, մեզ՝ մարդկանց օգնելու և փրկելու համար, որպես պատասխան մեր սրտագին աղոթքների:

Աստված երբեք չի լքում մեզ, այլ հաճախ մենք ենք հեռանում Նրանից: Բաց է սակայն վերադարձի ճանապարհը: Ուրախացե՛ք, սիրեցյալ եղբայրներ ի Քրիստոս, բա՛ց է փրկության ճանապարհը, և Աստված սիրով է ընդունում իր մոտ եկողներին: Քայլե՛ք այս ճանապարհով՝ սփռելով բոլորին մեր հավատքի լույսը, վկայելով բոլորին Նրա մասին, որ փրկությունն ու լույսն է աշխարհի, մեր Տեր Հիսուս Քրիստոս:

«Փառք քեզ, Աստուած, որ պնդեցե՛ք մեզ, ճանաչել յերկրի զճանապարհս քո, յազիմս ամենայն զփրկութիւնս քո» (Սաղմոս ԿԶ 3):

ՍՈՐԻՆ ՍԱՐԿԱՎԱԳ ՄԱՆԴԱԼՅԱՆ





ՍՈՒՐԲ ԱԹԱՆԱՍ ՀԱՅՐԱՊԵՏ ԱԼԵՔՍԱՆԴՐԱՏԻ* (295—373)

Ժամանակաշրջանը

1974 թվականի հունիսի 20—25 օրերին Ալեքսանդրիայի և համայն Աֆրիկայի հույն օրթոդոքս եկեղեցու պատրիարքության նախաձեռնությամբ և գլխավորությամբ Ալեքսանդրիայի հունաց Էվանգելիստոս Մայր տաճարում, ս. պատարագի մատուցմամբ և սուրբ գիտական-աստվածաբանական յուրջ բանախոսություններով ու հոբելյանական այլ հանդիսություններով, նշվում է ընդհանրական եկեղեցու բազմավաստակ, եռամեծ վարդապետի և մեծահամբավ հայրապետի՝ սուրբ Աթանասի մահվան 1600-ամյակը:

Հանդիսությանը մասնակցում են հույն օրթոդոքս պատրիարքական ինքնագլուխ Աթոռների, ռուս պրավոսլավ եկեղեցու, ինչպես նաև քույր եկեղեցիների, այդ թվում՝ հայ եկեղեցու ներկայացուցիչները:

Ս. Աթանասն ապրել և ստեղծագործել է Դ դարում, եկեղեցու պատմության մեջ կրոնական, մշակութային, հասարակական ու քաղաքական մեծ վերափոխումներով և ի-

րադարձություններով հարուստ մի ժամանակաշրջանում, ժամանակաշրջան, որն իր անջնջելի հետքերն է թողել և՛ Ե դարի, և՛ հետագա դարերի քրիստոնեական մտածողության ու աստվածաբանական մտքի զարգացման վրա՝ որպես վերին աստիճանի մի քեղմնավոր և հույժ հետաքրքիր շրջան:

«Եկեղեցական աստվածաբանական գիտությունը չի ունեցել ոչ մի շրջան, որը մտքի ընդարձակությամբ և վսեմությամբ, բովանդակության խորությամբ, գաղափարական հարստությամբ և տեսությունների բազմազանությամբ, աստվածաբանական ստեղծագործության բազմազանությամբ կարողանար հավասարվել այն բանին, ինչ որ նա IV—V դարերում անցկացրեց»¹:

Բ—Ե դարերում անտիկ մշակույթի շրջանակներում հրապարակ իջավ **եկեղեցու վարդապետների և եկեղեցական մեծ հայրերի** մի փառավոր համաստեղություն, որի ստեղծած բազմաձևեր ու մեծարժեք եկեղեցական գրականությունը ծանոթ է Հայրաբանություն անվան ներքո:

Հայրաբանությունն ընդհանուր եկեղեցա-

* Սուրբ Աթանաս Հայրապետի ապրած ժամանակաշրջանի, նրա կյանքի և գործունեությանն ու մատենագրական վաստակին նվիրված սույն նյութը շարադրելիս հանգամանորեն օգտագործվել են թեմայի վերաբերյալ հայերեն և օտար լեզուներով գրված բազմազան աղբյուրներ ու ուսումնասիրություններ:

¹ Պրոֆ. Ն. Սագարդա, Հույն-Արևելյի հին եկեղեցական աստվածաբանական գիտությունը, յուր ծաղկման շրջանում (IV—V դդ.). ռուսերենից թարգմանեց Արտակ վարդապետ Սմբատյան, Վաղարշապատ, տպարան Մայր Աթոռ ս. Էջմիածնի, 1910, էջ 74:

կան մատենագրության հնագույն և կարևորագույն ժանրն է: Հայրաբանների ստեղծագործություններն ունեն քրիստոնեական և համամարդկային հնչեղություն: Հայրաբանական այդ գրականությունը «ստորգրված էր մի նոր շնչով, վերանորոգիչ, երիտասարդական ավյուրով և լույսով, որը մինչև այսօր էլ փոթորկահույզ ալիքներով ներթափանցում է ընթերցողի հոգու մեջ, հաճախ մարգարեական շեշտերով: Հայրաբանների խորիմաստ ու գեղեցիկ հումանիզմը հիմնվում էր Քրիստոսի մարդասիրության վրա, մի նոր աշխարհայաց, մի փիլիսոփայություն, որը հեղափոխեց հին աշխարհը սիրո և գոհաբերության ճանապարհով: Քրիստոսը հայրաբանների համար գերագույն բանականությունն էր, որն այրվում էր սիրո մեջ և սիրուց» (Պրոֆ. Ի. Կոման, Առաջին չորս դարերի հայրաբանական գրականության արժեքը անտիկ մշակույթի շրջանակներում, «Էջմիածին», 1971, նոյեմբեր, էջ 8—15):

Ընդհանուր եկեղեցու պատմության մեջ Դ—Ե դարերը հանդիսանում են ճշմարտապես աստվածաբանական մտքի զարգացման ժամանակաշրջաններ:

Այդ դարերին հաջորդող եկեղեցու աստվածաբանների բոլոր սերունդները կանգնում են Դ—Ե դարերի ստեղծագործությունների առաջ հարգանքով լի զարմանքով և այդ հարուստ հոգևոր գանձարանից են վերցնում ճշմարիտ, ուղղափառ հավատքի ու քրիստոնեական տիպար կյանքի համար սկզբունքներ և խրատներ:

Դ դարում հունա-հռոմեական կայսրության մեջ քրիստոնեության արտաքին դրության մեջ ստեղծված բարենպաստ պայմանները և հիմնական վերափոխումները լիակատար հնարավորություն տվեցին եկեղեցուն ոգեկան և մտավոր բոլոր իր ուժերը կենտրոնացնելու եկեղեցական կյանքի ներքին հարցերի լուծման և կարգավորման վրա:

Դ—Ե դարերում ընդհանուր եկեղեցու պատմության հիմնական հարցերը քրիստոնեական դավանության հարցերն էին կազմում, որոնցով խորապես հետաքրքրվում էին նաև ժամանակակից քաղաքակրթության բոլոր կենտրոններն ու անտիկ հասարակության բոլոր ներկայացուցիչները, մինչև իսկ խոնարհ դասակարգի մարդիկ: «Ամեն բան շարժման մեջ էր, ամեն տեղ վիճում էին, ամենքը հուզված էին»: Եվ դժվար չէ հաստատել, որ աստվածաբանական մտքի զանազան ուղղությունների և փիլիսոփայական դպրոցների կոիվ էր դա՞:

Ընդհանրական եկեղեցին չորս դար դիմացավ իր գոյության համար մղած պայքարում: Հայածանքները, դաժնությունները, այլ կրոնների պայքարը չկարողացան ջլատել եկեղեցու հոգևոր ու մշտանորոգ կյանքը: Եկեղեցին սկսեց ապրել, կազմակերպվել ու գործնալ իր ներքին կյանքով՝ որպես աստվածաբանատառ մի ընկերություն, մի ընտանիք:

Մեծն Կոստանդիանոս կայսեր (306—337) հաղթանակը Միլիանի (Իստալիա) ճակատամարտում և 313-ին Միլանի հրովարտակը եկեղեցու պատմության մեջ հանդիսացան շրջադարձային ճշմանկություն ունեցող իրադարձություններ: Վերջ տրվեց հեթանոս Հռոմի կայսրությանը և բացվեց քրիստոնեական կայսրության դարաշրջանը: Կայսրության մեջ քրիստոնեությունը 313 թվականին մյուս կրոնների կողքին հռչակվեց թույլատրված և ապա՝ նախընտրված պետական կրոն՝:

Այսպիսով եկեղեցին մտավ իր քարոզչական, մատենագրական առաքելության և գործունեության նոր ու խոստումնալից, արդյունավոր մի շրջան, զարգացրեց իր աստվածաբանական-գիտական մտածողությունը, իր ծեսն ու իր արվեստը, կազմակերպեց իր նվիրապետությունը:

Ազատվելով արտաքին հալածանքներից, եկեղեցին նվիրվեց քրիստոնեական հավատքի և ուղղափառ դավանության ու վարդապետական բանաձևերի ճշգրտմանը:

Այս ուղղությամբ Դ—Ե դարերը հանդիսացան եկեղեցու հայրերի և վարդապետների մատենագրական հակաճառական գործունեության ժամանակաշրջան, եկեղեցական մատենագրության և արվեստի ոսկեդար:

Սակայն, միաժամանակ պարզ դարձավ, որ թեև վերջ էին գտել եկեղեցու ներքին խաղաղությունն ու հանգիստ կյանքը վրդովող արտաքին հալածանքները, նո՛ր էր սկսվում այդ դարերում իսկապես ճշմանավոր և էական մեծ մարտերի, հակաճառությունների շրջանը: Այս իսկ պատճառով Դ—Ե դարերի ընթացքում ընդհանուր եկեղեցու պատմության այս նոր շրջանը բնութագրվում է որպես աստվածաբանական-քրիստոնաբանական մտածողության, հակաճառությունների և մեծ վեճերի շրջան:

Այս շրջանի Արևելքում եկեղեցու մեծ ու ուղղափառ հայրերի և վարդապետների աստվածաբանական երկերը ուղեցույց են հանդիսանում քրիստոնեական հաջորդ սերունդների համար: Մինչև այսօր էլ եկեղե-

² Պրոֆ. Ի. Սազարդա, նույնը, էջ 6:

³ Johannes Quasten, Patrology, vol. III, Utrecht (Antwerp), 1966, էջ 1—5:

ցական-աստվածաբանական միտքը, արվեստը ապրում են եկեղեցու այդ եռամեծ վարդապետների երկերի գաղափարական բովանդակությամբ և նրանց տիրական ուղղության ներքո:

Այդ ժամանակաշրջանում է, որ առաջացան և լուծվեցին աստվածաբանության և քրիստոսաբանության բոլոր հիմնական ու էական տարրերը, որոնք մինչև այսօր էլ պատմական և գործնական նշանակություն ունեն եկեղեցու կյանքի ու առաքելության համար: Նիկիայի (325), Կ. Պոլսի (381) և Եփեսոսի (431) առաջին երեք Տիեզերական ժողովներում վճռվեցին և Երրորդության, Մարդեղության և Փրկագործության մասին հավատալիքներն ու հավատո հանգանակները արիստակաճության, հոգեմարտ մակեդոնականության, սաբելականության, նեստորականության, եվտիքականության և այլ հերետիկոսությունների դեմ ուղղափառ եկեղեցու մղած պայքարում:

«Քրիստոնեական կրոնքին դավանաբանական հիմնական ճշմարտությունները, Երրորդության և Աստուծո Բանին տուրք կույս Մարիամեն Մարդեղության վերաբերյալ, սահմանված են Արևելքի մեջ գումարված Տիեզերական ժողովներե: Իսկ այդ հավատքը պահպանելու համար, անոնք կրած են ու կրեն տակավին ծանր նեղություններ»⁴:

Դ՛ե դարերում Արևելքում ասպարեզ իջան եկեղեցական մեծ հայրեր ու աստվածաբաններ, ինչպիսիք էին Ալեքսանդր Ալեքսանդրացին, և Աթանասը, կապադովկյան եկեղեցու երեք մեծ հայրապետները՝ և Բարսեղը, և Գրիգոր Նազիազանցին (Սքանչեղագործ), և Գրիգոր Նյուսացին, Հովհաննես Ոսկեբերանը (Անտիոքի եկեղեցի), և Կյուրեղ Ալեքսանդրացին և ուրիշներ: Եկեղեցու այս մեծ հայրապետների մատենագրական վաստակում «քրիստոնեական մի հյուսմանիզմ ծնվեց, որի մեջ եկեղեցական գրականությունը իր կատարելությանը հասավ»:

Այս շրջանում երբ եկեղեցին կայսրության մեջ հանդիսացավ գերակշռող մի ուժ, սույն մեծ հայրապետների ղեկավարության ներքո և նրանց վանական կանոնագրություններով, հատկապես Եգիպտոսում, Թեբայիտի մենաստաններում, կազմվեց տիպար, օրինակելի վանականություն, որը ստեղծեց իր գրականությունը, մեծ ու նշանավոր վանականների կյանքին ու գործունեությանը նվիրված, հանուն հոգեորականության կատարելության: Վանականությունը վճռական

դեր կատարեց Եգիպտոսում, աստվածաբանական-քրիստոսաբանական հակաճանդությունների ժամանակ՝ ի պաշտպանություն ուղղափառության:

Այս ժամանակաշրջանում հիմնվում են նաև նշանավոր աստվածաբանական դպրոցներ, իրենց յուրահատուկ ավանդություններով և ուղղություններով: Դրանք հանդիսանում են քրիստոնեական մտածողության, և Գրոց մեկնաբանության, մշակույթի ու արվեստի օջախներ, հատկապես հերետիկոսությունների դեմ մղված գաղափարական պայքարում:

Դ դարի դպրոցների մեջ աչքի էր ընկնում Ալեքսանդրիայի քրիստոնեական-աստվածաբանական դպրոցը, որ իր մասնագիտական կրթությունն ստացավ Աթանասը: Ալեքսանդրիան միաժամանակ դարձավ վտանգավոր բույնը հերետիկոսությունների: Այստեղ ապրում էր և գործում նաև Արիոսը:

Ալեքսանդրիայի քրիստոնեական-աստվածաբանական դպրոցը

Ալեքսանդրիան հիմնադրել է Մեծն Ալեքսանդրը, մ. թ. ա. 331 թվականին: Ալեքսանդրիան եգիպտական, հելլենիստական և հրեական մշակույթների հանդիպման կենտրոն էր հանդիսանում:

Արևելքն ու Արևմուտքը միացնող այս քաղաքը միաժամանակ հին աշխարհի մշակույթի, գիտության և կրթության կենտրոնն էր: Քաղաքը նշանավոր էր նաև պատմական, ճարտարապետական իր գեղեցիկ հուշարձաններով, հարուստ իր մատենադարաններով, կուսապաշտական իր տաճարներով, փիլիսոփայական իր դպրոցներով: Այստեղ տիրող փիլիսոփայական ուղղությունը նոր պղատոնականությունն էր:

Ալեքսանդրիայում կատարվեց նաև Հին Կուսկարանի Յոթնասունից կոչված հունարեն թարգմանությունը, Պտղոմեոս թագավորի օրոք, մ. թ. ա. Գ դարում (285—247):

Ալեքսանդրիայում էր ապրում և ստեղծագործում Ա. դարում նաև հրեա մեծ բարքի ու փիլիսոփա Փիլոն Եբրայեցին, որի մեկնողական գրքերը Ե դարում մեր թարգմանիչ վարդապետները վերածեցին հայերենի:

Ահա այս քաղաքում էր, որ քրիստոնեությունը երբ Ա. դարում մուտք գործեց, և Մարկոս Ավետարանի քարոզչությամբ, մեծ չափով քան Արևելքի մի այլ քաղաքում, եկեղեցին սերտ շփման մեջ մտավ հելլենիզմի, նոր պղատոնական փիլիսոփայության, եգիպտական և հրեական գաղափարախոսությունների հետ:

Ալեքսանդրիայում Գ. դարում ստեղծվեց

⁴ Վալերաթուրթեր Վատիկանյան Բ Տիեզերական ժողովի, Վենետիկ, և Դազար, 1967, էջ 155:

⁵ Quasten, նույնը, էջ 1:

քրիստոնեական-աստվածաբանական առաջին դպրոցը, որը հնագույն կենտրոնը հանդիսացավ «սրբազան գիտության քրիստոնեության պատմության մեջ»⁶:

Ալեքսանդրիայում սկսվեց նաև բուռն պայքար քրիստոնեության և հելլենիզմի միջև:

Այս պայքարի դրական կողմն այն էր, որ հունական անտիկ մշակույթի իմացական ուժն օգնեց, որ քրիստոնեությունը դառնա ոգեկան հզոր ու վերանորոգիչ մի ազդակ կրոնական, փիլիսոփայական, ընկերային և նույնիսկ քաղաքական ու տնտեսական գաղափարախոսության բնագավառում:

Հունական մշակույթով սնած ու զարգացած մարդիկ գոհացում էին գտնում քրիստոնեական ուսմունքի մեջ և ընդունում էին այդ նոր կրոնը որպես իրենց իմացական ու հոգեկան հետաքրքրություններն ու որոնումները բավարարող մեծագույն ճշմարտություն, որպես ճշմարիտ ոգեկանություն, բարձր բարոյականություն, որպես մի նոր, ավելի մարդկային կրոնական մի ըմբռնում, որը կոչված է վերանորոգելու, վերափոխելու մարդկային սիրտն ու միտքը⁷:

Քրիստոնեությունն այսպիսով ողջ կայսրության մեջ համարվում էր մարդկության համար մի նոր կյանքի սկիզբը, իսկ Քրիստոսը՝ «կյանքի հաց», հոգիների և ձգտումների առաջընթացի կենարար ջրի աղբյուրը. «Ես եմ Ճանապարհ, Ծնարտություն և Կեանք» (Հովհ. ԺԴ 6), աշխարհը Քրիստոսով և Ավետարանով վերանորոգելու կրոնական, ոգեկան ու բարոյական մի անխորտակելի և կենսունակ ուժ:

Քրիստոնեության պատմության առաջին չորս դարերում անտիկ աշխարհի հասարակությունն ապրում էր հոգեկան անստուգության ու որոնումների մեջ, ընկերային իր բոլոր շերտավորումներով, ու ծարավն ուներ ճշմարիտ հավատքի:

Իսկ այդ ճշմարտությունը, այդ հավատքը գտնվում էր միայն եկեղեցու մեջ, և միայն եկեղեցում կարելի էր հասկանալ հավատքն ու ճշմարտությունը:

Ալեքսանդրիայի աստվածաբանական դպրոցն իր առաջին ծաղկման բուռն շրջանն ապրեց Գ դարում: Այս դպրոցի առաջին և մեծ դեկավարները հանդիսացան Կղևես Ալեքսանդրացին (150—215) ու նրա տաղանդավոր աշակերտ Որոգինեսը (180—253), որոնք եղան հետագայում քրիստոնեական մտածողության մեծագույն ներկայացուցիչները:

Որոգինեսն առաջինն էր քրիստոնյա

մտածողների մեջ, որ քրիստոնեական-աստվածաբանական գիտության հայր դարձավ և սահմանեց եկեղեցական գիտական աստվածաբանական հիմնական սկզբունքներն ու դասական գիտությունը և փիլիսոփայությունը «եկեղեցականացնելու առաջին քայլը առավ»: ...Այդպիսով «Որոգինեսին հաջողվեց հաշտեցնել գիտությունը քրիստոնեական հավատքի հետ, բարձր քաղաքակրթությունը՝ Ավետարանի հետ եկեղեցական վարդապետության հողի վրա»⁸:

Սակայն, Ալեքսանդրիայի դպրոցի մեծ ուսուցիչները կանգնել էին հիմնականում Աստվածաշնչի այլաբանական մեկնության և եկեղեցու ավանդական հավատքի պաշտպանության դիրքերում:

Որոգինեսն այս ուղղությամբ իր մեկնողական և աստվածաբանական մեծարժեք ու գիտական աշխատություններում, իր ստացած դասական փիլիսոփայական ընդարձակ կրթության պատճառով, հավատարիմ և «ավանդապահ չմնաց» եկեղեցու հին ավանդությանը, հավատքի ու «ընդհանուր եկեղեցական գիտությանը»: Որոգինեսի աստվածաբանական մեկնողական ուսմունքի վրա հիմնվում էին միմյանց բոլորովին հակառակ դավանաբանական հայացքների տեղ մարդիկ: Որոգինեսը աստվածաբանական-դավանաբանական այդ սայթաքումների համար «այնքան հակաճանաչող անձնավորություն դարձավ»⁹ և զրկվեց եկեղեցու սուրբ ու մեծ հայր լինելու լուսապսակից, թեև նրա ազդեցությունը շատ մեծ և տիրական էր և՛ Ալեքսանդրիայի, և՛ Անտիոքի, և՛ Ասորիքի, և՛ Կապադովկիայի աստվածաբանական դպրոցների վրա: Որոգինեսի հավատարիմ և մեծանուն աշակերտն էր ս. Գրիգոր Նազիազանցին:

Ալեքսանդրիայի դպրոցն իր ծաղկման փայլուն երկրորդ շրջանն ապրեց ս. Աթանասի օրով (328—373): Ս. Աթանասը վրձնական դեր խաղաց Դ դարում քրիստոնեական մտածողության մեջ՝ ընդդեմ արիտականության մղած իր պայքարում, հանուն հավատքի ուղղափառության: Այս պայքարում «Աթանասը առաջնակարգ դիրք էր զբաղում Ալեքսանդրիայի եպիսկոպոսների մեջ»¹⁰:

Սուրբ Աթանաս Հայրապետի կյանքը և եկեղեցական գործունեությունը

Մեր ձեռագիր Ճառքնախոսների հիշատակարաններում, պատմական և վարքագրական աղբյուրներում, ինչպես նաև օտար

⁶ Quasten, II հատոր, էջ 21:

⁷ Quasten, III հատոր, էջ 4, 6:

⁸ Պրոֆ. Ն. Սազարյան, նույնը, էջ 17, 18:

⁹ Նույնը, էջ 22:

¹⁰ Quasten, III հատոր, էջ 20:

եկեղեցական գրականության մեջ կան մեծ Հայրապետի կյանքին ու գործունեությանը նվիրված ընդարձակ և հետաքրքիր տեղեկություններ¹¹:

Ս. Աթանասի կյանքի և գործունեության մասին հայերեն առաջին ու հնագույն երկու ձեռագրական և ապա տպագիր աղբյուրներն են¹²:

1. Վարք և քաղաքավարութիւն (նգնութիւն) արքայն մեծի Աթանասի Ալեքսանդրացոյ եպիսկոպոսի և

2. Ի պատմութենէ վարոց Տիմոթէի ս. Աթանասի, գոր առաջեալ է Տիմոթէի աշակերտի նորին և արժանակցի Ալեքսանդրացոյ:

Ս. Աթանասը ծնվել է 295 թվականին Ալեքսանդրիա քաղաքում, ուր և «սնեալ, ուսեալ և աշակերտեալ ի գնացս առաքինսւէր կրօնից, ըստ միայնական վարոց մեծին և արքայն Անտոնի, որ և զնորայն իսկ շարադրեաց զվարսն»:

Ալեքսանդրիայի քրիստոսաբանական-աստվածաբանական դպրոցում նա ստանում է իր եկեղեցական մասնագիտական կրթությունը. «Հոգովն յառաջադիմանայր և սնանէր խրատու և իմաստութեամբ Տեառն, վարժեալ գրոց արքոց և հոգեպատում տաւից մարգարէից»:

Ս. Աթանասի ծնողներն են եղել հավատացյալ ու բարեպաշտ Մարկելոսը և Սալոմեն, որոնք ապրում էին «օրինօքն Աստուծոյ յԱստուած» և փոքր տարիքից նրան նվիրել էին «ի պաշտօն Աստուծոյ, որպէս Աննա զՍամուէլ», ինչպէս նշված է Հին Կտակարանում (Ս. Թագ. Ա. 26):

315 թվականին Աթանասը սարկավագ է ձեռնադրվում Ալեքսանդրիայի Աթոռի հայրապետ Ալեքսանդր Ալեքսանդրացոյց, լինում է նրա քարտուղարը և իր այդ հանգամանքով էլ մասնակցում 325-ին Նիկիայի առաջին Տիեզերական ժողովին, ուր «եղև իսկ ախոյեան ընդդէմ Արիոսի չարափառութեան և ամբարշտութեան... և յաղագս գիտութեանն և սուրբ վարուցն այնպէս փայլեաց որպէս արեգակն ի մէջ մեծի Սիւն-հողոսին և մեծարեցաւ և փառաւորեցաւ յամենեցուն»:

328-ին Աթանասն արդեն որպէս եպիսկոպոս հաջորդում է Ալեքսանդր Ալեքսանդրացուն Ալեքսանդրիայի պատրիարքական Աթոռի վրա, Կոստանդինուս կայսեր հա-

վանությամբ. «կացուցանել զնա յԱթոռ սուրբ Անտարանչին Մարկոսի»:

Հեշտ ու խաղաղ չի անցնում, սակայն, ս. Աթանասի հայրապետությունն Ալեքսանդրիայում, Մարկոս Ավետարանչի պատրիարքական Աթոռի վրա:

Նիկիայի ժողովում թեև դատապարտվել և նզովվել էր արիոսականությունը, բայց այն դեռ շատ ուժեղ, ազդեցիկ էր և՛ Ալեքսանդրիայում, ուր գործել և քարոզել էր Արիոսը (256—336)՝ լիքիացի այդ նեղը, և թե՛ ամբողջ կայսրության մեջ:

Արիոսը պաշտպանվում էր արքունիքի կողմից: Արքունիքն ընկել էր արիոսականների ազդեցության տակ: Կայսրը եկեղեցու ծոցում պատակտումը վերացնելու բարեմշտությամբ, Նիկիայի ժողովից հետո Աթանասին թելադրում էր Արիոսին վերընդունել ողորպիստ եկեղեցու գիրկը և նրան հատկացնել Ալեքսանդրիայի եկեղեցիներից մեկը:

Աթանասը մերժում էր կայսեր վտանգավոր և անխոհեմ առաջարկը: Սրվում էր հակամարտությունը Աթանասի և արիոսականների միջև, մինչև իսկ Ալեքսանդրիայում: Այնուհետև, «արիոսական վեճի պատմությունն Աթանասի կյանքի պատմությունն է դառնում»¹³:

Աթանասը զրկվում էր իր Աթոռից և արտրվում հակառակորդների զրուպարտությունների և չարախոսությունների պատճառով: Արիոսականներն Աթանասին համարում էին իրենց ամենավտանգավոր և անհաշտ հակառակորդն ու նրան կործանելու համար դիմում էին ամեն ստոր միջոցի: Եթե նրանց հաջողվեր տապալել Աթանասին, ապա «Նովա ամենայն ողորպիսաց յաղթել վարկանէին»: Արիոսականները նրան ամբաստանում էին սարքավանության, կայսեր ու կայսրության դեմ հակառակության մեջ, թե նա պատակտում է եկեղեցու միությունը, խանգարում ներքին անդորրությունը ու խոտվում խաղաղությունը պետության մեջ:

Աթանասն Ալեքսանդրիայի պատրիարքական Աթոռի վրա մնաց 45 տարի, 328—373-ը, մինչև իր մահը, որը տեղի ունեցավ 373 թվականի մայիսին:

Այս փոթորկալից ժամանակաշրջանում նա հինգ անգամ այրոհագրվել և 17 տարի անցկացրեց աքսորավայրերում:

¹¹ Հ. Ս. Անաչյան, Հայկական մատենագիտություն, Ե—ԺԸ դդ., հտք. Ա, Երևան, 1959, էջ 321—322:

¹² Ս. Աթանաս Ալեքսանդրիոյ Հայրապետի ճառք, քոլոքք և ընդդիմադրութիւնք, Վենետիկ, 1899, էջ 1—23 և 24—26:

¹³ Երվանդ վարդապետ Տեր-Մինասյանց, ընդհանուր եկեղեցական պատմություն, Մայր Աթոռ ս. Էջմիածին, 1908, էջ 257:

Տես նաև Quasten, III հատոր, էջ 66. IV դարում «ողորպիսության պաշտպանության պատմությունը Աթանասի կյանքի պատմությունն է»:

Բոլոր այս հալածանքներն ու բռնությունները, սակայն, չկարողացան ընկճել սուրբ Աթանասի մեծ ու արի հոգին, մարել նրա անսպառ եռանդը, «Նա ոչ ողորձանաց լսել և ոչ սպառնալեացն զարհուրէր»: Աքսորավայրերից նա իր թղթերով ու գրվածքներով շարունակում էր պայքարը արիության հետ, հոգեմարտ և աստվածամարտ Մակեդոն Կ. Պոլսի պատրիարքի չարափառ հետևորդների դեմ:

Ս. Աթանասն իր ողջ կյանքում անկոտրում վճռականությամբ և կրքոտությամբ «գստուներ եկեղեցույ հալածեաց և բազում քաջութիւնս եցուց» բոլոր տեսակի հերետիկոսական մոլորությունների դեմ. «Խրատել և ուսուցանել զվարս վարդապետութեան և հաստատել զամենեւեան ի հաւատքս...: Ամենայն հալածանաց և վշտաց համբերեաց, բազում նեղութիւնս կրեաց վասն եկեղեցեացն Աստուծոյ և անշարժ և անդրդուելի մնայր ի վերայ հիման ասանդութեան և առաքելոց և մարգարէից»:

Այս իսկ պատճառով նա կոչվեց «Հայր ուղղափառութեան» և «Սիւն եկեղեցույ», ինչպես նրան բնութագրել է ա. Գրիգոր Նազիազանցին: Աթանասի նկարագրի հիմնական գծերն են եղել՝ աննահանջ քաջությունը, վստակությունը դիմագրավելու անվերելությունն ու հաստատամտությունը, և պայքարում՝ սկզբունքայնությունը¹⁴:

Եթե ա. Աթանասը գոյություն չունենար, քրիստոնեությունն արիության հետևանքով կդադարեր կրոն լինելուց, իսկ եկեղեցին ու հավատացյալները, ինչպես նշում են նրա վարքագիծերը, «իրև Սողոմ լինէին և Գոմորայ նմանէին»: «Եթե արիության հետևանքով հունական աշխարհում հաղթող հանդիսանար, նա ամենայն հավանականությամբ ամբողջ քրիստոնեությունը կոչնչացներ, այսինքն տիեզերաբանություն և բարոյականություն կդարձներ այն, և կրոնը կկորչեր ըստ էության», նշում է գերմանացի մեծ գիտնական Ադոլֆ Հաունակը¹⁵:

Ս. Աթանաս Հայրապետի կյանքի և գործունեության հիմնական աղբյուրները հանդիսանում են նրա գրվածքները՝ ճառերը, թղթերը, մեկնությունները:

Ս. Աթանաս Հայրապետի մատենագրական վաստակը

Ս. Աթանաս Հայրապետը թողել է հարուստ և բազմաժանր մատենագրական վաստակ. «Եթող բազում ճառս շարադրեա-

լըս՝ յաղագս ուղղափառ հաւատոյ և սուրբ վարուց և մեկնութիւն սաղմոսաց և այլոց գրոց, զի յամենայնի մեծախորհուրդ էր այրն Աստուծոյ, և բանի կատարեալ և հոգով լցեալ»:

Ս. Աթանասն իր մատենագրական վաստակով առաջնակարգ ու տիրական դեմք է հանդիսանում Դ դարի եկեղեցական հայրերի շարքում:

Ջարմանակի է, որ ա. Աթանասն իր այնքան փոթորկոտ կյանքի և եկեղեցական պաշտոնավարության, այնքան վերիվարումների, հալածանքների և հակառակությունների մեջ ժամանակ է գտնում զբաղվելու ման գրական աշխատանքներով, որոնք առանձնահատուկ և կարևոր տեղ են գրավում քրիստոնեական մշակույթի ոսկյա գանձարանում:

Ս. Աթանասի մատենագրական վաստակը սերտորեն առնչվում է Նիկիական Հանգանակի պաշտպանության և հերետիկոսների դեմ պայքարի հետ:

Ս. Աթանասն իր գրականության մեջ հանդես է բերում Աստվածաշնչի բազմակողմանի հմտություն, խորամուխ իմացություն, վիճելու կոտ տրամաբանություն, հանճարեղություն, համոզմունքների անկեղծություն ու հետևողականություն, տեղատեղ՝ կարծրություն, հատկանիշներ, որոնց մասին հետագա քրիստոնեական սերունդները հիացմունքով և երախտագիտությամբ են խոսում:

Ս. Աթանասն իր գրական վաստակի մեջ տեղեցնում է եկեղեցական մատենագրության նոր ձևեր և արտահայտչական միջոցներ:

Հստ բովանդակության և ժանրի ա. Աթանասի գրական հարուստ ժառանգությունն ընդունվել է բաժանել հետևյալ մասերի.

1. **Ջատագովական - դավանաբանական գործեր**, 10 աշխատություն: Այս գործերի մեջ նշանավոր է ա. Աթանասի «Յաղագս մարմնաւորութեան Որդոյն և սրբոյ Երրորդութեան» ճառը:

2. **Պատմա-վիճաբանական գործեր**, 4 աշխատություն: Սույն աշխատության մեջ կարելիորագույնն է. «Ընդդիմաւացութիւնք սրբոյ Աթանասի եպիսկոպոսի Աղեքսանդրացոյ ուղղափառի և Արիոսի հերձուածողի, Յաղագս աստուածութեան Որդոյ» (հարց ու պատասխանների ձևով):

3. **Մեկնողական գործեր**, 7 աշխատություն, Մեկնութիւն Սաղմոսաց, Ծննդոց, Երգերոց, Յոբայ, Մատթէոսի, Ղուկասի, Կաթողիկէայ թղթոց և այլն:

4. **Վարքագրական գործեր**, 4 աշխատություն, որի մեջ պատմական ու եկեղեցական մեծ արժէք է ներկայացնում «Վարք երանելոյն Անտոնի (250—356) Եգիպտաց-

¹⁴ Quasten, III հատոր, էջ 20:

¹⁵ Երվանդ վարդապետ Տեր-Մինասյանց, նույնը, էջ 258:

ույ միայնակեցի և մահ նորին սուրբ ծերունույ և աստուածասիրի, թողթ Աթանասի: Սույն վարքագրությունը և Աթանասի ընդարձակագրույն գրական աշխատասիրությունն է: Աթանասը եղել է մեծ վանականի աշակերտ և նրա վարքը գրել է 357-ին, և Անտոնի մահից (356) մեկ տարի հետո, Թեբայիտի վանականների խնդրանքով: Աթանաս Հայրապետի սույն «վարքագրությունը» ընդհանուր եկեղեցու պատմության մեջ կոչվել է «Վանական կյանքի մի կանոնադրություն, պատմվածքի ձևով տրված»¹⁶:

Ս. Աթանասի գրած և Անտոնի «վարք»-ը բնած ազդեցություն է գործել արևմտյան վանականության կազմակերպման բնագավառում: Այս գործը թարգմանվել է լատիներենի: Օգոստինոսը վկայում է իր «Խոստովանություն» աշխատության մեջ, որ Ս. Աթանասի «վարք»-ը վճռական ազդեցություն է գործել ինչպես իր անձնական, այնպես էլ ուրիշ զարգացած հեթանոսների դարձի վրա:

Ս. Աթանասը գրել է նաև բազում

5. Ժառեր, ցեղբորդաններ, խրատներ:

6. Թղթեր:

Ինչպես հայտնի է, Ս. Աթանասն ունեցել է լայն թղթակցություններ ժամանակի եկեղեցական ու քաղաքական մեծ դեմքերի հետ:

Ս. Աթանասի թղթերը ոչ այնքան անձնական բնույթ են կրում, որքան ընդհանուր եկեղեցական, աստվածաբանական-քրիստոսաբանական, ջատագովական ու վիճաբանական և շատ կարևոր են որպես փաստաթուղթ՝ ժամանակաշրջանի պատմության համար:

Ս. Աթանասի մատենագրական վաստակի մեջ են մտնում նաև.

7. Կանոններ¹⁷,

8. Պատարագամատուց¹⁸:

Ս. Աթանասի հունարեն և լատիներեն մատենագրական լրիվ վաստակի մասին տեսնել Quasten patrology, III հատոր, էջ 23—66:

Սույն հոդվածի նպատակից դուրս է հանգամանորեն խոսել Մենն Աթանաս Հայրապետի աստվածաբանական-քրիստոսաբանական ուսմունքի առանձնահատկության և կարևորության մասին:

¹⁶ Ս. Գրիգոր Նազիազանցի:

¹⁷ Ներսես վրդ. Մելիք-Թամազյան, Հայոց եկեղեցական իրավունք, գիրք Ա, Եռշի, 1903, էջ 249—250: Վազգեն Հակոբյան, Կանոնագիրք հայոց, Ա, Երևան, 1964, էջ 282—328, 603—612 (Ծանոթություն):

¹⁸ Լ. Լ. Գաբրիելյան, Սրբազան պատարագամատուց հայոց, Վիեննա, 1897, էջ 217—318:

Այս ուղղությամբ գիտական լուրջ և ամբողջական ուսումնասիրություն է հրատարակել նյույի հիմա մասնագետ Quasten-ը, III հատոր, էջ 66—79:

Սակայն անհրաժեշտ ենք համարում համառոտակի խոսել Արիոսի մոլորության և Ս. Աթանասի ուղղափառ դավանության մասին:

Ինչո՞ւմ էր կախվում Արիոսի մոլորությունը: Արիոսը, ինչպես հայտնի է, ծխում էր Բանին-Քրիստոսի աստվածությունը և դրանով իսկ վտանգում Մարդկության ու Փրկագործության խորհուրդը: Նա ասում էր. «Միակ Աստված մը կա, ոչ ծնյալ, հավիտենական: Այդ Աստվածը միշտ Հայր չէ եղած. կար ժամանակ մը, երբ Հայր չէր Անիկա: Ան ծնալ որդի մը իր ազատ կամքով. ոչինչէն ստեղծեց զայն: Որդին արարած է, որովհետև ծնած է ժամանակի մեջ և Հորը մեկ ստեղծագործությունն է. հավասար ու համագո չէ Հորը. մասնակից չէ Անոր ո՛չ էությունը և ո՛չ ալ հավիտենականությանը, որով հետո ծնած ըլլալու բնություն ունի:

Որդին բնությամբ կատարելապես անըման է Հորը և Անոր բնութենն տարբեր գոյացություն մը ունի և իբր արարած՝ փոփոխություններու ընդունակ բնություն մը ունի. կար ժամանակ մը, որ Որդին չկար: Որդին «կրտսեր է քան զՀայր», Հայրը անըմբռնելի է Որդիին, վասնզի Որդին «արարած է և անգետ ատուր կատարածի»:

Ինչպես կ'տեսնվի, հակասություններու հյուսվածք մըն է ամբողջ Արիոսի վարդապետությունը, ապարդյուն փորձ մը՝ հաշտեցնելու կրոնական շահերը տրամաասացության պահանջներու հետ» (Թորգոմ պատրիարք Գուշակյան, Հերձվածողներ, անտիպ, Երուսաղեմ, «Արիոս», էջ 1—6):

Մեր եկեղեցին ընդհանրական եկեղեցու հետ դատապարտում է պաշտոնապես Արիոսի մոլորությունը, և պատարագի ընթացքում, «Հաւատամք»-ից հետո արտասանված հետևյալ քանակով.

«Իսկ որք ասեմն, Էր երբեմն յորժամ ոչ էր Որդին, և կամ Էր երբեմն յորժամ ոչ էր Ս. Հոգին, կամ թէ յոչեից եղեն, կամ յայմէ էությունէ անեն լինել զՈրդին Աստուծոյ և կամ զսուրբ Հոգին, և թէ՛ փոփոխելիք են կամ աղալելիք, զայնպիսիսն ճշովէ կարողիկէ և ատարելական և եկեղեցի» («Քրիստոնեական», Անթիլիս, 1971, էջ 21):

Արիոսի այս մոլորությանը հակադրեց Ս. Աթանասն իր աստվածաբանական քրիստոսաբանական ուղղափառ ուսմունքը, որը հիմնաքար հանդիսացավ Նիկիական Հանգանակին:

Աստվածաբանական - քրիստոսաբանա-

կան իր ուսմունքի մեջ ու Աթանասի «մեծագույն արժանիքն ու ծառայությունը մընում է այն, որ նա պաշտպանեց առաքելական, ավանդական քրիստոնեությունը հելլենացման վտանգի դեմ, վտանգ, որը թաքնված ձևով հանդես էր գալիս Արիոսի և նրա հետևորդների հերետիկոսության մեջ» (Quasten, III հատոր, էջ 86): Ս. Աթանասն իր ուսմունքի մեջ գործածում է հունական մտածողության ձևերն ու գաղափարները, եկեղեցու ուղղափառ հավատքը հստակացնելու համար, բայց դրանց հաղորդում է քրիստոնեական Հայտնության միջոցով ստացված բովանդակությունն ու խորք: Նա հատկորեն գիտի տարբերել հունական մտածողությունն ու քրիստոնեական Հայտնությունն այնտեղ, ուր վտանգ կարող էր լինել Ավետարանի ճշմարտության մթազմամանը և կամ սխալ հասկացմանը:

Ս. Աթանասը պաշտպանում է ոչ միայն Որդու համագոյակցությունը Հոր Աստծու հետ, այլ նա ձեռնհաստրեն է բացատրում Ծնունդն ու Բնությունը Բանին-Քրիստոսին, քան մի այլ աստվածաբան այդ ժամանակաշրջանում:

Ս. Աթանասի ճառերի, թղթերի նպատակն է եղել՝ ապացուցել ընդհանրական եկեղեցու «հնագույն ավանդությունը, ուսուցումը և հավատքը, ինչ որ Տեղը ավանդեց իր եկեղեցուն, ինչ որ առաքյալները քարոզեցին և հայրերը պահեցին»:

Ս. Աթանասն իր հակառակորդների ուղիղափառական-բանապաշտական մտածողության դեմ հակադրում էր հավատքի գերակայությունը, կամ առաջնությունը: Հետո նրան բանականությունը միայն չի կարող դատավոր լինել բնագանգական հարցերի մեջ: Հավատք է հարկավոր: Բանականությամբ մարդը չի կարող խորանալ ո՛չ իր և ո՛չ էլ երկրավոր իրերի բնության մեջ, ո՛չ էլ խոսել աստվածային, անճառելի բնության մասին:

Ս. Աթանասի աստվածաբանական-քրիստոսաբանական ուսմունքը հիմնաքարն է հանդիսանում եկեղեցու ու Երրորդության և քրիստոսաբանական վարդապետության, ինչպես բանաձևված է Նիկիական Հանգանակում:

Ս. Աթանասն Արիոսի դեմ հակաճառում է, որ Որդին արարած չէ, այլ Ծնունդ, հավագո Աստուծո հետ, լրիվ աստվածությամբ. «Աստուած յԱստուծոյ, Լոյս ի Լուսոյ, Աստուած ճշմարիտ, յԱստուծոյ ճշմարտէ, նոյն ինքն ի բնութենէ Հօր, Ծնունդ և ոչ արարած»:

Որդին հավիտենական է, ինչպես Հայրը: Հայրը և Որդին երկու առանձին անձեր են,

բայց աստվածային նույն բնությունն ունեն, որով Աստուծո հանդեպ Որդու ստորակայության հարց չի կարող լինել:

Ս. Աթանասի մոտ Բանին Մարմնառության և կամ Մարդեղության վարդապետությունը Փրկագործության վարդապետություն է միաժամանակ:

Ս. Աթանասին է պատկանում թեալոր, բայց շատ գեղեցիկ ու խորիմաստ այս բանաձևը. «Աստված մարդացավ, որպեսզի մարդն աստվածանա»: Քրիստոս իրեն ունայնացրեց, որ մենք անմահությունը ժառանգենք:

Առանց Քրիստոսի Մարդեղության և Մահվան, չկա փրկություն մարդու համար. Քրիստոս հաղթեց մահվան, ոչ միայն Իրեն, այլ նաև ողջ մարդկության համար. «Վասն մերոյ փրկութեան իջեալ ի յերկնից, մարմնացաւ, մարդացաւ, ծնաւ կատարելապէս ի սրբոյ կուսէն, հոգւովն սրբով, որով էառ զմարմին, զհոգի և զմիտս և զամենայն ինչ որ է ի մարդն ճշմարտապէս և ոչ կարծեօք» (Ժամագիրք, Բեյրութ, 1968, էջ 113):

Ս. Աթանաս Հայրապետի գործերի հայերեն թարգմանությունները

Մեր եկեղեցական-թարգմանական գրականության մեջ մեծ թիվ են կազմում ու Ս. Աթանասի գործերից և ուղղակի հունարեն բնագրերից կատարված թարգմանությունները, որոնց մի քանիսի «սկզբնագրերը դեռ չեն հայտնաբերված հունական գրականության մեջ»¹⁹:

Անհրաժեշտ է շեշտել այն հանգամանքը, որ Ե դարի մեր թարգմանական գրականությունն այնքան ընդարձակ է եղել, և կատարվել է այնպիսի ընտրությամբ, որ ընդհանուր եկեղեցական մատենագրության շատ կարևոր երկեր, այդ թվում նաև ու Ս. Աթանասի գործերից մի քանիսը, մնացել են միայն հին հայերեն թարգմանությամբ, և այսօր գիտության համար մատչելի են հայերեն այդ թարգմանությունների հրատարակությամբ:

Ս. Աթանասի աշխատություններն էլ թարգմանվել են Ե դարում մեր թարգմանիչ վարդապետների կողմից:

Բայց դժվար է հստակորեն որոշել, թե «յորդում ժամանակի և յումմէ՝ փոխեալ իցեն ի հայ լեզու» այդ թարգմանությունները²⁰:

Մատենագրական և մանավանդ ձեռագիր Ծառնոցիների վկայությամբ մեր թարգ-

¹⁹ Հ. Ս. Անասյան, նույնը, էջ 828:

²⁰ Ս. Աթանասի Աղեքսանդրացոյ Հայրապետի ճառք, նույնը, «Զեկուցումն», էջ Ե:

մանիշ վարդապետները Ե դարում հայերենի են վերածել և Աթանասի հետևյալ գործերը.

1. Ի Հոգին սուրբ, 2. Ընդդէմ Արիանոսաց, 3. Ի սուրբ Երրորդութիւնն և մարմնաւորութիւն Բանին, 4. Առ Եպիստեմոն եպիսկոպոս Կորնթացոց, 5. Առ Փելագեղոս եպիսկոպոս, 6. Առ Լիբերիոս Հռովմայ, 7. Յաղագս սրբոյ Երրորդութեան, 8. Ընդդէմ ամենայն հերձուածողաց, 9. Յաղագս Հոգւոյն սրբոյ հայնդողաց, 10. Ընդդիմադրութիւն ընդ Արիոսի, յաղագս աստուածութեան Որդւոյն, 11. Դարձեալ առ նոյն՝ Յաղագս սրբոյ Հոգւոյն, 12. Ընդդէմ Զաքեոսի Հրէի՝ յաղագս աստուածութեան Որդւոյ, 13. Յաղագս խորհրդածութեանց մկրտելոց, 14. Յաղագս կոստութեան, 15. Ի չարչարանս և ի յարութիւն Տեան, 16. Աղօթք²¹:

Այնուհետև, Ը դարում Ստեփանոս Սյունեցին (680—735) հայերենի է թարգմանել և Աթանասի հետևյալ հինգ ճառերը. 1. Յաղագս մարմնաւորութեան Աստուծոյ Բանին, 2. Առ Յովսէփանոս թագաւոր՝ Յաղագս հաւատոյ, 3. Ընդդէմ Պաղոսի Սամոսատցոյ՝ թէ մի է Աստուած, 4. Յաղագս թէ Անձն իմ խոովեալ է. 5. Յաղագս յայտնութեան Տեան:

Ստեփանոս Սյունեցին և Աթանասի սույն հինգ ճառերը հունարենից հայերենի է թարգմանել և Հովհանն Օձնեցոյ (650—720) հրամանով. «կատարեցաւ հրամայեալս ի քէն, ո՛վ վեհ, երիցս երանեալ րապոմապետ, անուանակից և շնորհընկալ մեծի Ամբողջոյն»²²:

Ջեռագրական հիշատակարաններում և Աթանասի գործերը բնութագրվում են որպէս «հրաշապատում և լուսագարդ վարդապետութիւն աստուածագեաց առնն, գլոխ և հիմն ամենայն ողղապիտաց, որ էլ հաւքաւ հաւատոյ նորա ընդ բնաս ամենայն»:

Ս. Աթանասի գործերի հայերեն թարգմանության 1899-ի հրատարակության մեջ մտել են նրա հետևյալ ճառերը, թղթերը, մեկնությունները.

1. Յաղագս մարմնաւորութեան Որդւոյն և սրբոյ Երրորդութեանն (էջ 27—56):

2. Մառ վասն հաւատոյ թէ մի է Քրիստոս, ընդդէմ Պաղոսի Սամոսատցոյ (էջ 56—63):

3. Յոր՝ թէ այժմ անձն իմ խոովեալ է (էջ 64—67):

²¹ Մատենադարան, Հայկական թարգմանութեանց նախնեաց, Վենետիկ, 1889, էջ 278—288:

²² Մատենադարան, նույն տեղ, էջ 287—288, և Նորայր եպիսկոպոս Պողոսյան, Հայ գրողներ, Երուսաղեմ, 1971, էջ 113:

4. Յաղագս փրկական Յայտնութեան Տեան մերոյ Յիսուսի Քրիստոսի, ընդդէմ Մարկիոնի (էջ 68—88),

5. Թուղթ առ Սրապիոն եպիսկոպոս, Յաղագս Հոգւոյն սրբոյ (էջ 88—116):

6. Թուղթ առ Լիբերիոս եպիսկոպոս Հռովմայ (էջ 117—118),

7. Յաղագս սրբոյ Երրորդութեան (էջ 119—123),

8. Թուղթ առ Փիղաղեղիոս եպիսկոպոս, (էջ 124—133),

9. Ընդդիմաւացութիւն սրբոյն Աթանասի եպիսկոպոսի Աղեքսանդրացոյ ողղապիտի և Արիոսի հերձուածողի Յաղագս աստուածութեան Որդւոյ (էջ 134—182):

10. Նոցունց խնդիր դարձեալ, վասն Յաղագս սրբոյ Հոգւոյն (էջ 182—190),

*11. Սրբոյն Աթանասի եպիսկոպոսապետին Աղեքսանդրոս և Զաքեի առն Հրէի Հարցումն և պատասխանիք և սուր և սուր վիճմանց (էջ 191—234),

12. Տեանն Աթանասի առ Արիոս, զի աւեր եթէ կրսեր (կրտսեր) է Որդի քան զՀայր, արարած և տգէտ արարն կատարածի (էջ 235—238),

*13. Երանելոյն Աթանասի ասացեալ Յասենասուրբ Երրորդութիւնն (էջ 239—242),

14. Սրբոյն Աթանասի Աղեքսանդրի եպիսկոպոսի ի Հոգին Աստուծոյ (էջ 243—257),

*15. Սրբոյն Աթանասի Աղեքսանդրոս Հայրապետին, ի Ծնունդն Քրիստոսի (էջ 258—263),

*16. Սրբոյն Աթանասի եպիսկոպոսապետին Աղեքսանդրոս, ասացեալ ի վերացումն Տեան մերոյ Յիսուսի Քրիստոսի (էջ 263—280),

17. Աթանասի ասացեալ Արտադրութիւն, (քացատրութիւն), առաքելական (Առաքելական հաւատամք, վարդապետութիւն), Յաղագս Աստուածայնոյն մարմնաւորութեան Աստուծոյ Բանին (էջ 281—283),

*18. Երանելոյն Աթանասի Աղեքսանդրի եպիսկոպոսի խօսք ի սուրբ Աստուածածինն և յողջոյն Եղիսաբեթի (էջ 284—291),

*19. Սրբոյն Աթանասի Աղեքսանդրի Հայրապետի ներքողեան ի սուրբ Աստուածածինն ասացեալ և ի միշտ կոյսն Մարիամ (էջ 292—311),

*20. Սրբոյն Աթանասի եպիսկոպոսի Աղեքսանդրոս ասացեալ ներքողեան ի սուրբ Խաչն աստուածընկալ (էջ 312—323),

21. Թուղթ սրբոյ Աթանասի եպիսկոպոսի

* Աստղանիշով մատնացուցված ճառերի բնագրերը պակասում են և Աթանասի հունարեն լեզվով հրատարակված գործերի մեջ: «Մատենադարան հայկական թարգմանութեանց», էջ 281:

Աղեքսանդրացույ առ Եպիկտետոն եպիսկոպոս Կորնթացոց, զոր ապականեալ էր ի հերձուածողաց, յորմէ զգուշացոյց զԱմտիոքացիս սուրբ Կիրիլ (էջ 324—343),

22. Սրբոյն Աթանասի եպիսկոպոսապետի Աղեքսանդրացու առ Յովթիմոս թագաւոր վասն հաւատոյ (էջ 344),

*23. Թուղթ Աթանասի եպիսկոպոսի առ Յուստինէ յԱփրիկէ (էջ 345—346),

24. Երանելոյն Աթանասի ասացեալ Հարցմունք վայելուչք և պատասխանիք հոգեշահք (Մի շարք այլ ժողովոյն հետում այս ճառը հետևյալ վերնագրով է. «Երանելոյն Աթանասի արքեպիսկոպոսի Աղեքսանդրացու, հարցմունք վայելուչք և պատասխանիք Կիրիլի Երուսաղեմի Հայրապետին, յաղագս մակագրութեան (գիտութեան) և հանճարոյ», էջ 347—477),

25. Դատաւորիւնսս Աթանասի (Այլ օրինակում՝ «Դատաւորիւնսս ուղղափառ հաւատոյ, ասացեալ մեծին Աթանասի գերագանց վարդապետի Աղեքսանդրոս», էջ 478—481),

26. Յաղագս Մելքիսեդեկի, ի գրոց սրբոյն Աթանասի (էջ 482—488),

27. Վասն սքանչելեաց պատկերին Քրիստոսի, պատկեր ի տախտակի զՔրիստոսի խաչելութիւնն, ի պատմութեանէն սրբոյն Աթանասի Աղեքսանդրացու (էջ 489—492),

*28. Տեսիլ սրբոյն Աթանասի (էջ 493—499),

29. Սրբոյն Աթանասի Աղեքսանդրոս Հայրապետի ներքողեան ի սուրբ Ստեփանոս յառաջաւարկաւա և նախավկայն Քրիստոսի (էջ 500—515),

30. Վկայութիւնսս սրբոյն Միմասի և Երմոգինի և Գրասիոսի (էջ 516—532):

31. Վարք Երանելոյն Ամոնի Եգիպտացու միայնակեցի և մահն ընդին սուրբ ծերունոյ և աստուածասիրի, թուղթ Աթանասի (էջ 532—614),

32. Յառաջաբան Դալթի (սաղմոսաց) մեկնութիւնսս առաքեալ Աթանասի եպիսկոպոսապետի Աղեքսանդրացու (էջ 615—643):

Սույն հատորի մէջ չեն մտել.

33. Կանոնն Աթանասի գլոխք ութսուն և եօթն (Կանոնագրքերում Աթանասի կանոնների թիվը տատանվում է 87-ից մինչև 90-ը)²³.

34. Պատարագամատոյց Աստուծով, զոր

²³ Մատենադարան, Հայկական թարգմանութեանց, էջ 285: Վահան վրդ. Բաստամեանց, Յառաջաբանութիւն Դատաստանագրոց Միլիթարայ Գոշի, էջ միածին, էջ 1—180: Ներսէս վարդապետ Մելիք-Թանգյան, նույնը, էջ 249—250: Հ. Մ. Անապան, նույնը, էջ 359—380, Վազգեն Հակոբյան, նույնը, էջ 282—328 և 603—612:

առաքեալ է ի սրբոյ Հօրն մերոյ Աթանասի ու պատրիարքին Աղեքսանդրոս²⁴,

«Սույն Պատարագամատոյցի հունարեն բնագիրը ծանոթ չէ»²⁵:

35. Օրինակ բարեպաշտութեան, ճառ:

Մայր Աթոռի միաբան Կարապետ եպիսկոպոս Տեր-Մկրտչյանը խոսում է «ս. Աթանասի անվան հետ կապված գործերի մի քանիսի վավերականության մասին, օգտվելով էջմիածնի մատենադարանի անտիպ նյութերից»²⁶:

Սուրբ Աթանասին են վերագրվում նաև «անհարազատ և երկրորդական» այլ աշխատություններ, որոնց մասին այստեղ չի խոսվելու: Ս. Աթանասի թշնամիները և հատկապես արիտակամները, ինչպես վկայում է ս. Կիրիլ Աղեքսանդրացին Մելիթինե քաղաքի Ակակիոս հույն եպիսկոպոսին ուղղած իր նամակում, «ապականեալ են զգիրս ս. Աթանասի»²⁷:

Կարապետ եպ. Տեր-Մկրտչյանն իր Հառաջաբանում գրում է, որ Աթանասի «հայերեն թարգմանությամբ ընդ աւանդուկոյ գրվածքների մի մասն էլ անվավերական է»²⁸:

«Կնիք հաւատոյ» ժողովածուում տպագրվել են նաև ս. Աթանասի տարբեր գործերից հետևյալ հատվածները և վկայությունները.

1. Երանելոյն Աթանասի Աղեքսանդրոս եպիսկոպոսին՝ ի Բանէն որ յերգս երգոցն. Նորին՝ ի Բանէն, որ ի Չարչարանս (էջ 247—248).

2. Երանելոյն Աթանասի, եպիսկոպոսի Աղեքսանդրոս ի թղթոյն, ոտ առ Եւսեբիոն և Դուկիսիէնէ և Աստերոն (էջ 264).

3. Երանելոյն Աթանասի, եպիսկոպոսի Աղեքսանդրոս՝ ի Բանէն որ յաղագս խաչին. Նորին՝ ի ծնունդս և ի չարչարանս (էջ 304—306).

4. Երանելոյն Աթանասի, եպիսկոպոսին Աղեքսանդրոս, որ ի Տօնականէն՝ ի յերևոորդ գլխոյն, որ առ Դեոկետիանոս, ի յերրորո Տանականէն. Նորին Գ. Դիոկլիտանէ ի ԺՄ. Տօնականէն, ոտ աղագս խաչին, որ յԱրիանոսացն (էջ 345—348):

Երևանի ս. Մեսրոպ Մաշտոցի անվան ձեռագրերի Մատենադարանում էլ պահվում են ս. Աթանաս Հայրապետի մատենա-

²⁴ Մատենադարան, Հայկական թարգմանութեանց նախնեաց, էջ 255: Հ. Հովսեփ Գաթըրճյան, Սրբազան պատարագամատոյցը հիմնդրորդ դարում վերջերը, Վիեննա, 1897, էջ 217—318:

²⁵ Հ. Մ. Անապան, նույնը, էջ 357—358:

²⁶ Նույնը, էջ 368:

²⁷ Կնիք հաւատոյ, էջ LXII:

²⁸ Նույնը, էջ LXIII:

գրական վաստակն ամփոփող բազում ձեռագրեր²⁹: Այդ ձեռագրերի մասին խոսելը նույնպես կարող է մի այլ ուսումնասիրության նյութ հանդիսանալ, որը դուրս է մղում սույն շարադրանքի նպատակից:

Մեր եկեղեցին տարին երկու անգամ տոնում է հիշատակը ս. Աթանաս Հայրապետի: Առաջինը՝ հունվար ամսվա մեջ Կյուրեղ Ալեքսանդրացի Հայրապետի տոնի հետ³⁰, իսկ երկրորդը՝ հոկտեմբերի մեջ, «Սրբոց երկուտասան վարդապետացն՝ Ռեթեոսի, Դիոնեսիոսի, Սեդեքտորոսի, Կիրեղ Երուսաղեմացու, Եփրեմ Խուրին Ասորու, Բար-

սեղ Կեսարացու, Գրիգոր Նիսացու, Գրիգոր Աստուածաբանի, Եպիփան Կիպրացու, Յովհաննէս Ոսկեբերանի և Կիրեղ Ալեքսանդրացու»՝ ընդհանրական եկեղեցու կողմից որպես անհերքելի հեղինակություններ ընդունված այս մեծ հայրապետների և վարդապետների տոնի հետ³¹:

Ս. Աթանասը եղել և մնում է քրիստոնեական եկեղեցու մեծահանձար հայրապետներից մեկը, «որոյ մեծութեան ոգոյ և սնաց զհաւասարեաց թերևս ոչ որ ի հարց եկեղեցոյ», իսկ նրա գրական վաստակը հանդիսանում է քրիստոնեական մշակույթի արժեքավոր և մեծագույն գանձը:

Ա. Հ.

²⁹ Ցուցակ ձեռագրաց Մաշտոցի անվան Մատենադարանի, 1965, հատոր Ա, էջ 1252, «Աթանաս», հատոր Բ, 1970, էջ 1444:

³⁰ Օրացույց, ս. Էջմիածին, 1977, էջ 23:

³¹ Նույնը, էջ 132:





ՎԱԶԳԵՆ Ա. ՀԱՅՐԱՊԵՏ ՀԱՅՈՑ

Գ ի ր

Մուգ կապույտ լաթակազմ, մեծադիր այս գիրքը, որի ոսկեդրոշմ խորագիրն է **Վազգեն Ա. Հայրապետ Հայոց—Գիրք երրորդ**, պատիվն ունեցաւ անձամբ նվեր ստանալու Վեհափառի ձեռքից երկու օր առաջ՝ այն հիշարժան երեկոյին, երբ ինձ էլ բախտ էր վիճակվել լինելու գրողների մի խմբի մէջ, որ կաթողիկոսի հրավերով եկել էր Վեհարան՝ ընդունելության:

Այդ երեկոն «հիշարժան» եմ կոչում նախ այն պատճառով, որ Էջմիածնի կաթողիկոսական 1700-ամյա գահին նստած մերօրյա Հայրապետի հրավեր-ընդունելությունը, պատմականության խորունկ զգացումն ունեցող մարդու համար, մանավանդ հայ մարդու, անկախ կրոնի հանդէպ իր կեցվածքից և քաղաքական ու փիլիսոփայական համոզմունքներից, ինքնին արդէն հիշարժան երևոյթ է՝ Վեհարանի շէմից իսկ պատմա-մշակութային և ազգային-հայրենասիրական ապրումներ հարուցող. ապրումներ, որոնք միշտ հարազատ են մարդկային հոգուն և թանկ:

Բայց կար նաև մի հատուկ հանգամանք, որով այդ երեկոն ավելի քան հիշարժան դարձաւ: Մի իրադարձություն կատարվեց այդ երեկո: Մի գեղեցիկ իրադարձություն, այսպէս ասած՝ գեղարվեստական լիցք ունեցող նշանակալից մի դէպք. այն դէպքերից, որոնք անցնելիորեն տպավորվում են հիշողության մէջ ու հետզհետեւ, ժամանակի ընթացքում, հոգեկան իրողության ուժն ստանալով, մարդու ներաշխարհից ճառագայթում են իրենց խտացած իմաստի լույսը և թրծում, ամրացնում հոգին, առանց որ մարդ նույնիսկ գիտակցի դրան:

Այս հատուկ հանգամանքն արդէն կապված էր ոչ թէ սոսկ գահակալ կաթողիկոսի, այլ բուն իսկ Վազգեն Ա. Հայրապետի՝ Նրա անձնավորության, Նրա գործունեության հետ: Մենք տեսանք մի վեհիմաստ ստեղծագործություն, որ ծնունդ է առել Վեհափառի մտահղացմամբ և ի կատար ածվել

Նրա ուղեցույց հսկողությամբ: Այստեղ «լուսանաճան» բառն են արտասանում շրթներս, առանց ճոռում լինելու մտահոգության, որովհետև իրոք լուսանաճան է այդ ստեղծագործությունը՝ թե՛ իր նյութերն են բովանդակությամբ, թե՛ իր գեղարվեստական կատարումով և թե՛ մանավանդ իր քարոշական իմաստով ու խորհուրդով:

Անակնկալ էր հրավիրյալներին համար:

Զգում էինք, որ Վեհափառը մի հաստով ստիթով պետք է հրավիրած լինի: Ընդարձակ, բարեզարդ, խաղաղալետ ընդունարանում, ջահի մեղմ լույսի տակ, Վեհափառի դիմաց երկար ու կանաչ սեղանի շուրջ նստած, Նրա գահակալության վերջերս տոնված քսանամյակը շնորհավորելուց հետո զրուցելով Նրա հետ հավուր պատշաճի նյութերի մասին, որոնք հայրենական ու մշակութային հարցերի շուրջ էին պտտվում անկաշկանդորեն, արժանալիք էլ ու ջերմ մթնոլորտում, լցված էինք սպասողական մի տրամադրությամբ, որ բնականաբար աճում էր ու, չգիտես ինչու, գուցե Վեհափառի զվարթ դեմքից ճառագայթող ներքին խաղաղ գոհունակության շնորհիվ, խոստումնալից էր թվում: Ու երբ, վերջապես, տարիներ առաջ Պոլիս կատարած Իր հայրապետական այցելությունից մի քանի հուզիչ դրվագներ պատմելուց հետո, Նա մեզ առաջարկեց երկրորդ հարկ բարձրանալ՝ «մի բան» ցույց տալու համար, թաքուն սպասումը արտահայտությունն գտավ հետաքրքրված, ժպտուն մի աշխուժությամբ: Նա համեստորեն «մի բան» ասաց, բայց բնական է, որ մի կարևոր բան տեսնելու նախագագցումը համակեց բոլորին:

Այս նոր, շքեղ Վեհարանի երկրորդ հարկը վերջին տարիներին դարձել է հոգևոր-մշակութային գանձերի պատկառելի թանգարան:

Լայն, կարմրագորգ սանդուղքով բարձրանալուց հետո, նախ կանգ ես առնում մի հրաշալիքի առջև, որ վարդագույն մարմարե պատվանդանի վրա հատնում է դիմացո. քարեղեն մի տեսիլք՝ հսկարտ, ամրակոտ և միաժամանակ արտակարգորեն նրբին: Մոմիկ վարդապետի քանդակած նշանավոր խաչքարն է դա՝ այդ բնիկ հայկական արվեստի գլուխ-գործոցներից մեկը, ստեղծված 1308-ին, որ Նորավանքից քերվել ու կանգնեցվել է այստեղ, գտնելով իր արժանի և հավերժական պատվանդանը: Եվ այդ պատվանդանի վրայից նա դիմավորում է այստեղ բարձրացող բազում ու բազում հայորդիներին ու օտար հյուրերին՝ բոլորի աչքին պարզելով միասնությունն իր այդ երեք հանդիսությունների, որոնք խորհրդանշական են թվում. հսկարտություն, ամրություն, նրբություն:

Այնուհետև, մի քանի հաջորդական դահլիճներում, ցուցադրված են բազմաթիվ սրբապատկերներ ու կերպարվեստի այլ գործեր՝ առավելապես հոգևոր բովանդակությամբ. մեծ մասամբ գեղանկարչական երկեր են՝ հին և նոր, հայկական, ռուսական, արևմտաեվրոպական: Անցյալ և ժամանակակից, հայրենիքում և արտասահմանում ապրող հայ նկարիչների նվիրատվություններից բացի, որոնց մեջ քիչ չեն արժեքավոր գործերը, կան նաև այնպիսի կտավներ, որոնք վերջին տարիներին այստեղ են քերվել տարբեր եկեղեցիներից: Մայր Աթոռի նկարչական արվեստանոցում մաքրված, վերանորոգված և իրենց վերջին ապահով հանգրվանը գտած այս գունանկարները, անտարակույս, հայ մշակույթի իսկական արժեքներ են, անարատ ներշնչումով և միամիտ վարպետությամբ կատարված արտահայտիչ ստեղծագործություններ: Եկեղեցիներում հալոնաբերված և, ճիշտն ասելով, հետագա անստույգ ճակատագրից փրկված այդ արժեքների մեջ կա նաև եվ-

րոպական Վերածննդի շրջանին պատկանող մի անհայտ նկարչի կտավ՝ այդ ժամանակների համար ընթացիկ սյուժեով. Հիսուսի մարմինը խաչից իջեցված...

Մեզանից շատերի, գուցե և բոլորի համար նորություն էր այս նորաստեղծ թանգարանը. և հատուկ հետաքրքրությամբ կանգ էինք առնում հայկական հին արվեստի մի քանի ինքնատիպ նմուշների առաջ, որոնց հնության շունչը, գեղարվեստական արժեքի հետ միասին, մեր մեջ հարուցում էր այն պատկառանքը, որ միշտ զգում է մարդկային հոգին իր նախնիների ոգեկան ներկայությունը թելադրող այդ վկայությունների առջև: Ու վերջապես տեսանք այն «մի քան»-ը, մեր օրերին և այս հարկի տակ ստեղծված այն գործը, որի առաջ, անկասկած, նույնպիսի պատկառանքով կանգ են առնելու հետագա սերունդները, որոնց համար մենք դարձած կլինենք նախնիներ:

Դահլիճներից մեկում Վեհափառը մեզ հրավիրեց մի կապույտ վարագույրի առջև, 16-րդ դարի գործ, սպիտակ, ոճավորված պատկերներով զարդարված: Մի երիտասարդ սքեմավոր սարկավագ բարձրացրեց վարագույրը, բացվեց պատի մեջ տեղադրված մի անխորտակելի ամրապահարան, որի մեջ էնկտրական անտեսանելի լամպեր վառվեցին, և շողշողաց... լուսանաճանց Այբուբենը հայոց՝ ոսկեհուն տառերով:

Մի քանի վայրկյան լուռ էին մեր շրթները, և հայացքները՝ հմայված: Հետո տասնմեկ գույզ ձեռքերի ծափահարությունը հնչեց դահլիճում, արձագանքելով Վեհարանի լուռ, խորհրդավոր կամարների տակ:

Ձեռքերս գրեթե մեքենաբար ծափ էին տալիս, մինչ ներսից, ասես մանկությանս խորքերից, մի տաք ու սարսուցնող ալիք բարձրացավ ու մի պահ մշուշեց աչքերս. և այդ մշուշի մեջ ծփում էին իմ հեռավոր այրբենարանի խոշոր Այբը, պատանեկությանս օրերի «Ով մեծաքան»-ը Թարգմանչաց տոնի իր հանդիսավոր ու սրտահույզ մեղեդիով, երկաթագիր արձանագրության մի պատառիկ վանքերի հնաբույր պատերից, մագաղաթյա ձեռագիր մի էջ մանրանկար նախշազարդ խորանով, իմ անվան հարազատ մեծատառ Կենը՝ ինքնությանս խորհրդանիշն արևի տակ,— և այս բոլորը պսպրում էին, ընդելուզվում իրար, թավալվում միգամածի մման, մինչև որ աչքերիս մշուշը պարզվեց ու թանկագին հիշատակների այդ միգամածից կարծես վերստին գոյացավ այս ոսկեգիր Այբուբենը:

Օհիքսե մեծադիր տախտակի վրա, վերևից ներքև չորս շարքով, նախաստեղծ երեսունմեկ տառերը Ա-ից մինչև Ք, յուրաքանչյուրը խոշոր ու ոսկեձուլլ, բնիկ հայկական նախշաձևերով նրբորեն զարդաքանդակված, գույնըզգույն թանկագին քարերով դրվագազարդված: Եվ ամեն մի տառ մի անհատականություն կարծես, իր ուրույն բնավորությամբ, իր կենդանի արտահայտությամբ. և ամեն մի տառ մի խորհրդանիշ՝ ապրումների և խորհուրդների, որոնցով մեր երևակայությունը դեռ մանկության օրերից օժտում է բոլոր տառերը, երբ դրանց շնորհիվ, քալլ առ քալլ, աշխարհաճանաչման հրաշքը դառնում է ոգեկան իրականություն, անուն են ստանում իրերն ու զգացողությունները, հույզերն ու գաղափարները, իրար են կապվում ժամանակներն ու տարածությունները, անտեսանելին դառնում է տեսանելի, անծանոթը դառնում է ծանոթ, անհուն աշխարհը դառնում է անհուն ներաշխարհ:

Մի պահ թվաց, թե Մաշտոցի հանճարեղ տեսիլքն է բուն իսկ՝ անհաչքիս առաջ:

Լուսաճաճանշ տեսիլքը:

Հայացքս դարձավ Վեհափառին: Իր սև սքեմով ու գլխաբաց, կաթողիկոսական պանակեն կրծքին, Նա նույնպես ոսկեգիր Այբուբենին էր նայում՝ Իրեն հատուկ ուղիղ, պարթև կեցվածքով կանգնած, գլուխը մի թեթև առաջ ու կողմնակի հակած: Խոհական աչքերի մեջ մի մեղմ ժպիտ կար, արդար գոհունակության ժպիտը ստեղծագործ հոգու, որ վսեմ ու զուսպ, մի քիչ էլ թախծոտ բերկրանքով ընդունում է իր կատարած գործի արժանի գնահատությունը:

«Մեր սերնդի համար հարազատ դարձավ այս հայրապետական դեմքը,—անցավ մտքովս:—Հարազատ դարձավ Վեհափառի խորապես հայրենասիրական ոգով ու գործերով, Նրա անմնացորդ նվիրումով»: Պատմությունը պիտի հիշի ու արժեքավորի այդ ոգին ու գործերը, իսկ մենք կենդանի վկաներն ենք այժմ: Մեզ համար առօրյա են այդ գործերը, իսկ առօրյան կարճատես է, դժվար է նկատում որևէ գործի ամբողջական տարողությունն ու արժեքը: Բայց սիրտը միշտ էլ, առօրյա տարակույսների և նախապաշարմունքների խորքում, կամաց-կամաց կուտակում է մոռացվող տպավորությունները, պահպանում դրանք հիշատակների իր թաքուն, նվիրական գանձարանում, և մի օր էլ հանկարծ ճշմարտության զգացումն է ճառագայթում այդ գանձարանից: Սիրտը բնագործին խորատես է ու ճշմարտատես: Եվ սիրտը, առանց մեր կամքի ու գիտակցության կարծիքը հարցնելու, հաճախ նույնիսկ հակառակ մեր տարակույսներին, սխալանքներին ու աշտությանը, բնագործին համակրում է մեծագործ մարդուն, ապա և հարգում ու սիրում է նրան, ճիշտ այնպես, ինչպես հակակրում է անբանին կամ չարագործին և խորշում նրանից:

Մեր սիրտը վաղուց արդեն հարգում ու սիրում է Վազգեն Ա Հայրապետին: Մեր սերնդի աչքի առաջ սպիտակեցին այս կարճ ու բարեձև մորուքը և ալեգանգուր մագերը: Այս լայն ու բարձր ճակատին դրոշմված է իմաստություն և խիզախություն. գործունյա իմաստություն և հանգիստ խիզախություն: Եվ հակառակ տարիքին, ոգու և մարմնի առողջության վարդագույնն է շողում այս դեմքից...

Այբ, Բեն, Գիմ, Դա, Եշ, Զա... Նայում էի տառ առ տառ, ըմբռնելով ամեն մի տառի ոսկեշող, ադամանդազարդ գեղեցկությունը: Տասնվեց դար առաջ, հենց այս վայրում, այս Մայր տաճարի կողքին, Վաղարշապատ մայրաքաղաքի սրտում, մի ուրիշ պալատի մեջ, գուցե այսպես ահա դիտում էին նորաստեղծ երկաթագիր Այբուբենը, ու այսպիսի մի դահլիճում հնչում էր ներշնչյալ ու գործնական ձայնը Մեծն Մաշտոցի, ու ներկա էին Սահակ Հայրապետն ու Վոսվապուհ թագավորը, և իշխաններ, դպիրներ, զորականներ: Հայոց պատմության կես ճանապարհին մի նոր ու մեծ սկիզբ էր դա, սկիզբը հայ դպրության. և «սկիզբն դպրութեանս հայոց եղև սկիզբն մեծի գիտութեան և անպայման ուրախութեան»: Եվ այդ «անպայման ուրախությունը» մեզ էլ համակել է այսօր, բոլորիս սրտերն ու մտքերը միացրել նույն ապրումի մեջ, ուր ներկա են նաև **նրանք՝** այո՛, այստեղ, այս պահիս, մեզ հետ: Թվում է՝ նրանք գիտեին, կանխագգում էին, որ տասնվեց դար հետո, այս նույն սրբազան հողի վրա, այս Վեհաբանում, որպես ոսկեգիր Այբուբեն շողշողալու է այս մեր Սրբություն սրբոցը՝ երեսունվեց տառերով կառուցված աննյութական ու անխորտակելի Տաճարը հայ ժողովրդի. այն հավերժական Տաճարը, որ մեր ազգային գիտակցության ծննդավայրն է ու ապաստանը, մեր մշակույթի աղոթատեղին ու հանդիսավայրը, մեր ինքնության ձևն ու

բովանդակությունը ճարտարապետյալ, և որ մնալով միակն ու անփոխարինելի՝ վերստին ու վերստին կառուցվել է միշտ և կառուցվելու է ամեն մի հայ մանուկի հոգում—անպայման ուրախությամբ:

«Սրբություն սրբոցը չի կարող թանգարանային մոտ լինել, առօրյա դիտման առարկա,—անցավ մտքովս:—Նվիրական խորհուրդին պետք է մոտենալ ծեսով, հանդիսավորության զգացումով, և նա պետք է մի պահ երևա հայտնության մեան ու փակվի դարձյալ վարագույրի ետև»:

Երբ մի ժամ հետո դուրս եկանք Վեհարանից, հրաժեշտի պահին նվեր ստանալով Վեհափառի այս գիրքը, դեկտեմբերի մեղմ, անձյուն, լուսնկա գիշեր էր, լուռ ու խորհրդավոր. և հանկարծ տեսիլքի մեան թվաց Մայր տաճարի ուրվատվերը՝ արծաթավուն երկնքի վրա հստակ գծագրված իր արածայր կաթողիկեներով, որոնցից մեկի կատարին կարծես կանգնել էր լուսինը՝ կլոր, սպիտակ: Մի րոպե հայացքս չկարողացա կտրել այդ պատկերից. դարերի վկան, ուրիշ աշխարհների հետ հոգիդ կապող, ու միաժամանակ կենդանի իրականություն. քարեղեն շոշափելի կառուցվածք և ոգեղեն խորհուրդների մարմնացում. դեռ մանկությունից մտքումդ տպավորված հարազատ կերպարանք, որի առաջ ամեն անգամ կանգնում ես խորհրդավորության զգացումով, մի տեսակ զարմացած ներքուստ, ասես ժամանակների խորքում թաղված մի գաղտնիք կուսեղու խոռվքով:

Այդ րոպեին մտքումս պատկերացավ այն պառավ կինը, որի մասին Վեհափառը պատմել էր զուսպ հուզմունքով, երբ դեռ կանգնել էինք ոսկեգիր Այբուբենի առաջ: Մեկը հարց տվեց, թե ի՞նչ միջոցներով է ստեղծվել այս ոսկեծույլ թանկարժեք գործը: Վեհափառը պատասխանեց՝ տարիների ընթացքում խնայված ու պահպանված նվիրատվություններով: Եվ բերեց այդ կնոջ օրինակը: Վերջերս արտասահմանից հայրենադարձած՝ նա ուխտի է գալիս Էջմիածին, ունկնդրություն խնդրում կաթողիկոսից: Փոքրամարմին, ազագուն, սևազգեստ՝ կոտորածի և տարագրության ճամփաներին վշտից ու զրկանքներից մաշված, նա տասնամյակներ շարունակ, մեր բոլոր մայրերի ու մեծ մայրիկների մեան, պահել-պահպանել է իր հույսն ու հավատքը և այս ուխտը կատարելու երազանքը փայփայել: Վեհափառի Աջը համբուրելուց և օրհնությունն ստանալուց հետո, նա իր ծոցի խորքերից հանում է մի փոքրիկ հեռախոսի փաթեթ, և բաց անելով ծալքերը իր մոմե մատներով՝ մի ոսկյա իր է ընծայաբերում: Պարզվում է՝ դեռ եղեռնի օրերից,—իր երիտասարդության՝ օրերից,—նա իր ծոցում պահել է դա սրբությամբ, հուռությամբ մեան, ամենածանր զրկանքի օրերին անգամ չի փորձվել ծախսել այդ իր փոքրիկ հարստությունը, որովհետև «ուխտած էի, Վեհափառ Տեր, ուխտս ի կատար»:

Ուրեմն՝ ժողովրդի ուխտամատուց լուծանքով է ձուլված Վեհափառի տեսական այս մտահղացումը, և կատարված է դարձյալ ժողովրդի մարդու՝ ոսկերիչ վարպետ Ժիրայրի հավատավոր, շնորհալի ձեռքերով, ճարտարապետ Բաղդիկ Արզումանյանի նախագծով:

Մ Ա Տ Յ Ա Ն

Մուգ կապույտ լաթակազմ, մեծադիր այս գիրքն ահա բաց է հիմա սեղանին լամպի տակ, երեկոյան այս ժամին: Հայրապետի գահակալության քսանամյակին նվիրված այս մատյանում մեծ ու փոքր հատընտիր հատված-

ներ են ամփոփված Վեհափառի կոնդակներից, քարոզներից, ճառերից, ելույթներից, ճամակներից, ինչպես նաև այն գրքույկներից ու հոդվածներից, որոնք Նա հրատարակել է դեռ վաղուց, երբ աշխարհական էր՝ լուսամիտ ազգային-հասարակական գործիչ ու հրապարակագիր, խոհուն մտավորական ու մանկավարժ, և այնուհետև վարդապետ ու եպիսկոպոս՝ Ռումինիայի հայոց առաջնորդ:

Գիրքն սկսեցի կարդալ անցյալ գիշեր, Էջմիածնից վերադառնալուց հետո, և իսկույն գրավեց ինձ, առաջին իսկ էջերից: Թվում էր՝ Վեհափառի կենդանի ձայնն է հնչում շարունակ ականջներիս մեջ, իսկ մտքումս կանգնած էր ոսկեգիր Այբուբենին հայոյ Նրա դեմքը՝ իր առողջ վարդագույնով, ճակատը՝ բարձր, և աչքերը՝ խոհաժպիտ: Եվ ընթերցման այս երկու օրերի ընթացքում, մինչև վերջին էջը, գրքի գրավչությունը չթուլացավ: Ընդհակառակը. ամեն ու խորացավ: Ինչո՞ւ: Որովհետև, ինչպես ամեն մի լավ գիրք, այս մեկն էլ իր ուրույն ու հմայիչ աշխարհն ունի, և մտնելով այդ աշխարհը՝ ականա ու սիրով հանձնվում ես նրա մթնոլորտին: Այսինքն՝ գիրքը հուզում է սիրտդ ու միտքդ, թանկագին ապրումներ է տալիս, մղում է լուրջ խորհրդրդածությունների, գոհացնում է գեղագիտական զգացումդ, մի խոսքով՝ հարըստացնում է հոգիդ, որովհետև հաղորդվում ես մի ուժեղ ու մեծ անհատականության ներաշխարհին, ուր հարահուլով մի կշռությամբ, ամուր առանցքի շուրջ և անխախտ ծիրերով թավալվում են ու կերպարանք ստանում գաղափարներ ու հույզեր, որոնք հարազատ են քեզ իրենց խոր մարդկայնությամբ, իրենց ազգային (հայկական) աշխարհագրագիտության շնչով ու գույներով:

Այո, ճիշտ է, այստեղ մեծ մասամբ պաշտոնական բնույթի և այն էլ խիստ յուրահատուկ (կրոնական ու կանոնական) նյութեր են իրենց տարագով՝ կոնդակներ, քարոզներ, ճառեր, կաթողիկոսական բարձր Աթոռից գրված ճամակներ: Բայց խնդիրն էլ հենց այն է, որ եթե նման դեպքերում պաշտոնական տարազն առհասարակ իր դիմագրկող կնիքն է դնում բովանդակության ու ձևի վրա, այստեղ, ընդհակառակը, անհատականությունը իրեն է ենթարկել տարազը բնականորեն, առանց բռնազբոսիկ ճիգի և միտմի, մնալով իր կաթողիկոսական բարձր հանգամանքի պատշաճության ու պարտադրանքների շրջանակում, բայց արտահայտելով իր ներաշխարհը, իր բովանդակությամբ ու ձևով, որովհետև դա ստեղծագործ, տաղանդավոր անհատականություն է և իդեալ ունի: Գրականության պատմության մեջ հազվադեպ չեն նման օրինակները, երբ ստեղծագործ անհատականությունը կյանք է ներշնչում այդպիսի կանոնական տարազներին: Հիշենք տասնյութերորդ դարի եպիսկոպոս Բույուեին, որի քարոզներն ու դամբանական խոսքերը ակնառու տեղ գրավեցին ֆրանսիական գրականության մեջ: Կամ հին ռուսական գրականության դասականներից՝ ավագերեց Ավվակումին: Եվ կամ մեր Ներսես Լամբրոնացուն, որին «նոր Կիկերոն» կոչեցին ժամանակակիցները:

Վազգեն Ա Վեհափառը հոեաորական արվեստի վարպետ է. առանց այդ հին արվեստի դասական կանոններին խստորեն հետևելու, Նա ինքնուրույն կառուցումներ է անում, անսպով իր սեփական ներշնչման թելադրանքներին, բայց և իր մտքի աչալուրջ կարգապահությամբ ենթարկելով դրանք, ինչպես նաև ազատորեն օգտագործելով իր արտահայտչական միջոցները, բայց միշտ չափն ու կշիռը պահպանելով՝ հանում մտքի հատկության ու ձևի գուսպ գեղեցկության:

Նրա լեզուն ճոխ է և ճկուն, հարուստ է կշռությամբ և բարձր ոճի պատկերավոր արտահայտություններով, հաճախ զարմանալիորեն զուգակցում է ումանտիկ հուզականությունը դասական ջինջ մաքրության հետ. և իր բոլոր շքեղություններով հանդերձ, երբեք ճոռոմ չէ այդ լեզուն, այլ միշտ մնում է մտքի գործիք՝ ոգի և իմաստ մարմնավորող:

Մկուն է նաև ոճը, որ խորքում միշտ լինելով հոետորական-հրապարակախոսական՝ երբեմն նկատելիորեն տարբերակվում է ըստ, այսպես ասած, ժանրի և նպատակադրման. կոնդակներում ավելի հանդիսավոր է, հորդորական և վեմաշունչ. ճառերում ու ելույթներում ավելի տիրապետում են աշխույժ, մի տեսակ ներքուստ դիպտագային շեշտերը, որով հոետորի խոսքը թողնում է իր լսարանի հետ երկխոսության մեջ լինելու տպավորություն. մամակների ոճը ավելի գործնական է ու անմիջական, մուլցիսկ գիտականորեն ճշգրիտ, երբ վերլուծում է կարևոր հարցեր ու իր տեսակետը հայտնում. իսկ քարոզներում ավելի բաբախում է հուզական շունչը, և մտքերն ու զգացումները հաճախ զգեստավորվում են այնպիսի ոճով, որի արտահայտչական ուժը մոտենում է գեղարվեստականի, մուլցիսկ բանաստեղծականի:

Բայց բոլոր դեպքերում վեհափառի խոսքը լուսավորված է մտքի հրատակատես պայծառությամբ, ջերմացած է սրտի անկեղծ ներշնչումով, ամբողջական է իր բարոյա-գաղափարական ու հայրենասիրական կեցվածքի շրջանկատ ու իրատես կայունությամբ: Նրա լուսամիտ դատումները շաղախված են անկեղծ ու ազնիվ ապրումով, որի խորքում զգացվում է խորունկ մտորումների կշիռը՝ տարակուսանքի և ճշմարտության մծարներով, մեծ պատասխանատվության զգացման ու խղճի անկաշառ հայացքի տակ. մի բան, որ հենց ստեղծագործ անհատականությանն է հատուկ: Եվ դատումի ու ապրումի այդ միաձուլումն է անշուշտ, որ գրքի գրավիչ աշխարհն է ստեղծում՝ հեղինակային ամբողջականության ինքնուրույն դրոշմը դնելով յուրաքանչյուր տողի, յուրաքանչյուր հատվածի և ամբողջ գրքի վրա:

Այս ստեղծագործ անհատականության լայն մտահորիզոնը, եռանդուն ու բազմաշան Հայրապետի գործունեության լայն շրջանակի հետ, գիրքը դարձրել է նաև բովանդակությամբ հարուստ ու բազմակողմանի: Ավելի ճիշտ՝ բովանդակության բազմակողմանի հարստությունը հենց այդ մտահորիզոնի և գործունեության լայն ընդգրկումներն է արտացոլում: Վեհափառի մտածողությունը հակված է ավելի հորիզոնական, տարածական, այսպես ասած էպիկական ընդգրկման: Նա ձգտում է հարցերը դիտել տարբեր կողմերից և վերլուծել ոչ այնքան տեսական-հայեցողական, որքան գործնական-կիրառական տեսանկյունով, քարոյական և նյութական իրագործումների հասնելու մղումով:

Նրա մտածողության առարկա եղող հարցերը կարելի է բաժանել երեք ոլորտների, որոնք թեև սերտորեն առնչված են իրար հետ, բայց նաև որոշակիորեն զատորոշվում են իրենց բնույթով. և համապատասխանորեն՝ նրա գործունեության մեջ էլ կարելի է զատորոշել իրար հետ սերտորեն առնչված երեք ասպարեզ:

Առաջինը, բնականաբար, կրոնական-աստվածաբանականն է:

Որպես աշխարհական, այսպես ասած՝ «դուսի» մարդ, որ հեռու է աստվածաբանական խնդիրներից, ես ինձ, անշուշտ, ի վիճակի և իրավասու չեմ համարում որևէ դատում անելու Հայրապետի մտածողության ու գործունեության այս ոլորտի վերաբերյալ: Բայց որպես ընթերցող, որ սիրում է կարդալ ու մտածել հասարակական-փիլիսոփայական հարցերի մասին և ի մասնավոր-

րի հետաքրքրվում է կրոնի փիլիսոփայությամբ, հարկ եմ համարում արտահայտել իմ տպավորությունն այս գրքի որոշ հատվածներից:

Նկատելի է, որ Վեհափառը, լինելով բարձր իմացականության տեր հոգևորական և պայծառամիտ ու իրատես անձնավորություն, ոչ միայն տուրք չի տալիս այսպես կոչված «բյուզանդական» դոգմատիկ, սխոլաստիկ մտայնությանն ու վեճերին, այլև գիտակցորեն կոչ է անում խուսափել դրանցից՝ այդպիսի մտայնությունը համարելով մեր դարում ծանանակալիչ ու վնասակար: Նա տեսնում է կրոնական գիտակցության տագնապը այսօրվա աշխարհում և, որպես հնագույն եկեղեցվո Հայրապետ, բնական է, մտահոգվում է դրանով: Սակայն լինի էկումենիկ շարժման քննարկ, լինի հայ և օտար բարձրաստիճան կղերականներին ուղղած Իր նամակներում և խոսքերում, Նա համարձակորեն և աներկբայորեն հայտարարում է Իր տեսակետը, թե «գիտության և փիլիսոփայության զարգացման մեր դարաշրջանին» եկեղեցիները պետք է «քացվեն աշխարհին» կրոնական, գիտական, մշակութային, ընկերային-սոցիալական, քաղաքական մակարդակների վրա՝ նկատի առնելով դարաշրջանի հրատապ խնդիրները և հենվելով քրիստոնեական ուսմունքի ընկերային-բարոյական անարատ ակունքներին: «Չմոռանանք երբեք,—ասում է Նա մի առիթով,—որ քրիստոնեական ուսմունքը մաս մի աշխարհայացք է երկրային կյանքի վերաբերյալ»: Իսկ անօգուտ վեճեր հարուցող դավանաբանական հին հարցերի, հին կաղսպարների մասին մի այլ առիթով ասում է. «Այսօրվան մարդոց համար, այդ հարցերը դատարկված են իրենց նախնական, հուզական բովանդակությունեն և դարձած են լոկ վերացական մտածման առարկա»:

Արդարև, ի հաստատումն դրա, թող ինձ թույլ տրվի ասել, որ «այսօրվան մարդու» իմ բանականության համար, օրինակ, իրոք որ վերացական, երբեմն էլ տարօրինակ են թվում այդ հարցերը և առ առավելն պատմական հետաքրքրություն են ներկայացնում, որքան հասուն տարիքում կարողացել եմ ծանոթանալ դրանց՝ աշխատելով ըմբռնել բուն իմաստը. ոչ էլ իմ սիրուն են հուզել դրանք այնպես, ինչպես հուզում էին աստվածաշնչական կենդանի, բանաստեղծական պատմություններն ու խրատները մանկությանն ու պատանեկությանն օրերին, երբ կրոնագիտություն էի անցնում: Միևնույն բոլորովին տարբեր է բուն Ավետարանի բարոյական բարձր սկզբունքների պարագան: ամբողջ երկու հազար տարի այդ սկզբունքները քաղաքակրթական ազդակ են դարձել և, գիտակցենք կամ ոչ, որպես քաղկացուցիչ տարր մտնում են «այսօրվան մարդու» հոգեբանության մեջ մանավանդ քրիստոնեական աշխարհում, ինչպես մտնում են մաս քրիստոնեական (և ոչ միայն քրիստոնեական) դոգմաների և առասպելաբանության բանական քննադատությունները՝ Դեկարտից ու Սպինոզայից, Կանտից ու Հեգելից, իմասնությունդ դարի ֆրանսիացի դեիստ ու աթեիստ փիլիսոփաներից հետո, մանավանդ որ Էյնշտեյնի «տիեզերական կրոնական զգացման» ըմբռնումն էլ, որպես տիեզերքի անհուն ներդաշնակության խորհուրդի ապրում, սկսել է մտածող մարդկանց գիտակցության մեջ տեղ գրավել գիտական հեղաշրջող հայտնագործությունների այս օրերին, երբ մարդկությունը հաղթահարել է նույնիսկ երկրի ձգողական ուժը և դուրս եկել տիեզերք:

Մտածող ու անաչառ մարդու համար, լինի հավատացյալ կամ ոչ, ողջունելի է մեր Հայրապետի նման կեցվածքը, որ ճշմարտորեն շեշտը դնում է քրիստոնեական ուսմունքի բուն բարոյական էության վրա, մանավանդ երբ մտաբերում ենք (և Վեհափառը ինքն էլ հիշեցնում է Իր գրքում այդ

մասին), որ այլևայլ կարգի «քուզանդական» հարցերը նույնիսկ արյունահեղ բախումների առիթ են տվել քրիստոնեական աշխարհում՝ քաղաքական շահերի գործիք դառնալով ի հեճուկս Քրիստոսի բուն վարդապետության, դառնալով նվաճողական քաղաքականության գործիք մանավանդ մեր ժողովրդի նկատմամբ:

Հետաքրքրական է նշել, որ մեզնից կեցվածքից բխում են մասնավորապես հարյուրյա-փիլիսոփայական ինքնատիպ, խորունկ ու գեղեցիկ մեկնությունները, որ Նա բազմիցս տալիս է, օրինակ, Հիսուսի Ծննդյան ու մանավանդ Հարության խորհուրդներին՝ ձգտելով այդ «երկինք և երկիր հաշտեցնող» խորհուրդների իմաստը բացահայտել հավերժ վերածնվող կյանքի և մարդկային ազատ ու ստեղծարար հոգու խորքերից, ասես ջանալով զուգորդել, եթե կարելի է այսպես ասել, մարդկային հոգեբանության երկու տարբեր երեսները՝ առասպելագործությունն ու իրապաշտությունը: Եվ հաճախ այդ մեկնությունները հանգում են բարոյագիտական շինիչ պատգամների. «Հսկեցե՛ք և արթո՛ւն մնացե՛ք, որ հարության հույսը չմարի ձեր հոգիներեն ներս: Հավետ ապրելու տեղն է, որ մարդ կգերազանցե ինքն իրեն, կդառնա շինող, ստեղծագործող, կդառնա արարիչ, կդառնա ամսմահ: ...Առանց հավետ ապրելու հույսին, մարդ կմեռնի մահեն իսկ առաջ. այդ հույսով, սակայն, ան կապրի մահեն ալ անդին»:

Երկրորդ ոլորտը մշակութային-ստեղծագործականն է ու ազգային-հայրենասիրականը:

Մայր Աթոռի տպարանի հաստատման 200-ամյակի առթիվ արտասանած Իր ճառի մեջ Վեհափառը հետևյալ միտքն է հայտնում. «Մեզ թվում է, թե սխալված չենք լինի, եթե ասենք, որ այս հարցում հայ հոգևորականները երկնից արքայության տեսիլքը իրենց սրտերում վառ պահած, առավել քան այլ եկեղեցիների սպասավորները, շեշտը դրել են երկրային իրագործումների վրա, ստեղծարար աշխատանքի վրա այս կյանքում»:

Երբ կարդում էի այս տողերը, ներքին հայացքս վայրկենապես տեսավ մեր մեծերին, Մաշտոցից սկսած, և հայտնի ու անհայտ բազում մշակների անցյալում, բոլոր նրանց, որ մեր բազմադարյան մշակույթն են ստեղծել՝ պատմիչներ, բանաստեղծներ, փիլիսոփաներ, գիտնականներ, երաժիշտներ, ճարտարապետներ, ծաղկողներ, գրիչներ, բժիշկներ, նույնիսկ պետական գործիչներ,—բոլորն էլ հոգևորականի սքեմով, ամենամեծերը «սուրբ» կոչմանն արժանացած, և մի ներքին ձայն, ճշմարտությանն արձագանքելու գոհունակությամբ, ասաց. «Ծիշտ է»: Հայ իրականության մեջ սրբության լուսապսակը ոչ այնքան նահատակության, որքան ստեղծագործական սիրանքի վկայությունն է եղել: Պատմական այս ակնհայտ իրողության վրա է հիմնված Հայրապետի այդ հաստատումը: Իսկ հաջորդ վայրկյանին, տեսնելով 1972 թվականն այդ տողերի տակ, Վեհափառի գահակալության 17-րդ տարին, մտածեցի. «Այդ հաստատումը, գուցե անգիտակցորեն, գալիս է մասնավորապես անձնական փորձառությունից, գուցե հոգու թաքուն ինքնաճանաչման մի պահի դրսևորումն է դա»:

Այս գիրքը կարդալիս, զուտ ընթերցողական հաճույքից բացի, որ պատճառում են դրա ինքնաբերական արժեքները՝ հեղինակի հարուստ մտքերն ու ճոխ լեզուն, զգում ես մասնավորապես հոգևորական, և հանկարծ անդրադառնում ես՝ գիրքը առարկայականորեն դարձել է մասնավորապես ժամանակագրությունը այնպիսի իրագործումների, որոնց ականատես ես եղել քսան տարվա այս շրջանում, և որոնք հիմա, ոգեկոչվելով մտքիդ առաջ իրենց լինելության ընթացքով

ու ավարտված իրողությամբ, պատմական մեծ իրագործումների կերպարանը ու իմաստ են ստանում. էջ առ էջ՝ կարծես լսում ես կառուցման մի սիմֆոնիա, ուր թեմաները ներքին տրամաբանությամբ բխում են իրարից և ճարտարապետում մի ներդաշնակ ամբողջություն: Եվ այդ սիմֆոնիայի հեղինակը նույնանում է գրքի հեղինակի հետ: Նրա խոսքերի խորքում տեսնում ես կառուցվող գործը: Եվ խոսք ու գործ դառնում են մի մարմին, դառնում են մի դեմք, որի անունն է Վազգեն Ա Հայրապետ Հայոց:

Արդարև, հիշողությանդ խորքերում տեսնում ես էջմիածինը քսան տարի առաջ՝ մի պատկեր, որ կարծես մոռացել էիր արդեն. հողաշեն, անձրևներից ու քամուց քայքայված պարսկական պարիսպներ, սիրտ տխրեցնող հիշատակների մի օղակ, որի կենտրոնում կանգնած էր Մայր տաճարը կարծես սևահոն, մոայլ մի հպարտությամբ, իր նեղ ու խղճուկ շրջափակից անգոհ, իր հեռավոր փառքի խոկման մեջ ամփոփված, այսօրվա աշխարհից մոռացված մի մենավոր, որին այցելության էին գալիս ամենահավատարիմ զավակները միայն՝ հավատացյալներ, ոխտավորներ և կամ պատմության ու դարավոր մշակույթի սերն ունեցող մարդիկ:

Այդ պայմաններում նոր կաթողիկոս է ընտրվում Ռումիհայի հայոց առաջնորդ Վազգեն եպիսկոպոս Պալճյանը: Նա «ահիլ և երկյուղիլ» մոտենում է Լուսավորչի գահին՝ «քաջ գիտնալով քաղում դժվարությունները». մոտենում է «ծանր լուծ» ընդունելու գիտակցությամբ: Դա նշանակում է, որ մեծ պատասխանատվության զգացումով էր մոտենում, իսկ մեծ պատասխանատվություն կզգա այն մարդը, որ իր առաջ մեծ նպատակ է տեսնում և հոգեկան թաքուն ուժեր ունի դժվարությունները հաղթահարելու համար: Ես հիշում եմ Վազգեն եպիսկոպոսի դեմքն այն ժամանակ՝ սևամորուս և լըրջախոհ:

Հազիվ մեկ տարի հետո, հայրենի պետության քարոշական աստարով ամրացած, Վեհափառի ձայնը հնչում է վստահորեն. «Այժմ ստուգապես կարելի է ընել, թե Հայաստանյայց եկեղեցին և իր Մայր Աթոռը իրավ վերածնունդի շրջան մը պիտի սկսին»: Ու Մայր տաճարի կամարների տակ, «խոր իմաստներու, իրավ արժեքներու, անկորնչելի գեղեցկություններու» հազարյոթհարյուրամյա նվիրական մի աշխարհի շնչով տոգորված, Հայրապետի Իր քարոզում արտասանում է խոսքեր, որոնք երդումի նման են հնչում.

«Եվ անա այս հազարամյա սրբատաշ քարերու վրա կանգնած ենք մենք՝ այսօրվաններս: Մենք ենք տերը և պահապանը այս քարերուն: Կանգնած անոնց վրա, մենք պիտի չշարժինք և պիտի չտկարանանք երբեք, այլ աներկյուղ ու համարձակ, սրբությամբ պիտի պահենք, պահպանենք մեզի հանձնված այս սրբազան ավանդը, ոխտելով մեր կյանքի գործերով հավատարիմ մնալ անոր պատգամին: Մեր հավատքին, մեր մտորումներուն, մեր հույզերուն, մեր երազներուն, մեր կյանքին ստուգությունն են այս քարերը: Անոնց վրա պիտի հիմնենք ու պիտի կառուցենք մեր նոր կյանքը, պիտի կերտենք մեր պայծառ ապագան»:

Ու գրքում, մտքիդ առաջ, վերստին լսում ես Վեհափառի խոստումներն ու ծրագրերը այդ տարիներին, ապա և տեսնում ես, թե ինչպես քայլ առ քայլ իրագործվում են դրանք ներշնչումով ու հաստատակամությամբ, իրատեսության ուղեցույց սկզբունքով, որ հույակապ է ձևակերպում Վեհափառն Ինքը. «Կյանքի մեջ լավագույնը՝ հնարավորն է»:

Տեսնում ես՝ ինչպես է պայծառանում Մայր տաճարի դեմքը ներքուստ և արտաքուստ, քարոյապես և նյութապես:

Տեսնում ես՝ ինչպես ընդարձակվում և բարեզարդվում է շրջափակը, մայրավանքին պատշաճ կերպարանք ու կյանք ստանալով:

Տեսնում ես՝ ինչպես չքանում են հողե կիսավեր պարիսպներն իրենց տխուր հիշատակներով, և բարձրանում են նորակերտ սրբատաշ պարիսպներ՝ վերակենդանացնելով Անիի մեծ մուտքի ոճը վանքի գլխավոր դարպասին:

Տեսնում ես՝ ինչպես վերստին կանգնում է Տրդատա դուռը տուֆաշեն, և նրա լայնադեղ կամարի տակով մի նոր հորիզոն է բացվում Մայր տաճարի առաջ՝ Նոր Վեհարանով:

Տեսնում ես՝ ինչպես Նոր Վեհարանը դառնում է շքեղ ու անդորրավետ պալատ, մարմարակերտ գահասրահով, ու Վեհարանի ճանապարհին կանգնում են անհայտ անկյուններից կյանքի կոչված խաչքարեր՝ իրենց հնաշունչ գեղաքանդակ արժանապատվությամբ:

Ու տեսնում ես, թե ինչպես կատարվում են հիշատակության արժանի բազում այլ գործեր: Հիմնվում է նկարչական արվեստանոց՝ «սրբազան նկարչության հայկական ոճ և դպրոց ստեղծելու» նպատակով, որպեսզի «մեր եկեղեցիները օժտվեն այնպիսի սրբապատկերներով, որոնք իրենց ոճով ու գեղարվեստական արժեքով մոտենան գեթ մեր փառավոր ճարտարապետության և մեր քարակերտ զարդաքանդակներու անճառ ձևերուն»: Հաստատվում է նոր տպարան, ուր տպվում են բազմաթիվ արժեքավոր գրքեր, ըստ որում նաև այս գիրքն ահա: Վերանորոգվում են հայ ճարտարապետության գլուխ-գործոց Հոփսիսմեն և այլ հնավանդ կոթողներ: Նորոգվում ու բարեզարդվում է Մաշտոցի նվիրական դամբարանը, և որմնանկարներով ու մեարդատառ պատմական ասույթներով զարդարվում Օշականի եկեղեցին դամբարանի վերև: Կառուցվում է Եղեռնի նահատակաց հուշարձանը Մայր տաճարի մոտ՝ նորակերտ խաչքարերի միաձույլ մի համադրություն: Արդիականացվում և հարստացվում է հոգևոր ճեմարանն իր ուսումնական ծրագրով և նպատակադրումներով: Վերստին աշխարհաբար թարգմանվում է Նոր Կտակարանը արևելահայերեն և արևմտահայերեն: Առաջին անգամ հրատարակվում է հայ խաչքարային արվեստն աշխարհին ներկայացնող շքեղ մի ալբոմ: Ու դեռ բազում են այն իրագործումները, որոնց շնորհիվ էջմիածինը, հոգևոր ու մշակութային հնագույն կենտրոններից մեկը աշխարհում, այսօրվա իր կերպարանքն ստացավ. պատկառելի կերպարանք՝ իր արտաքին տեսքով ու բարոյական էությամբ:

Այո, այս բոլորը մշակութային-ստեղծագործական իրագործումներ են ամենից առաջ, այդ է դրանց մարդկային ու ազգային բուն իմաստը, որովհետև, ինչպես ճշմարտորեն ասում է Վեհափառը, «մարդու գաղափարը առավելապես և էապես բնորոշողը մշակույթն է՝ իր ամենալայն իմաստով, կրոնքն ալ մեջը առնված: Այսօր Հայաստանի ժողովուրդը, աննախընթաց կերպով, մշակութային նոր արժեքներ կստեղծե գիտության մեջ, գրականության մեջ, արվեստներու մեջ: Այդ բոլորը մեր ժողովուրդի ստեղծագործություններն են, որոնք կուգան և առավել կհարստացնեն մեր ազգային-մշակութային գանձարանը: ...Մեր ժողովուրդը, եթե ապագա մը ունի և պիտի կարենա ունենալ, իրեն տեղ մը ապահովելով այս արևին տակ, այդ կարելի պիտի ըլլա իրագործել շնորհիվ իր հին ու նոր մշակութային արժեքներուն»: Այլ կերպ չի էլ կարող լինել այսօրվա և ապագայի աշխարհում, որովհետև, Վեհափառի խոսքերով նորից՝ «նյութական տիեզերքի առավել խոր ճանաչողությանը և նորանոր օրենքների հայտնաբերմանը պիտի համապատաս-

խանեն նոր իմացումներ, նոր որոնումներ, նոր հայտնություններ մարդկային ոգե-քարոյական աշխարհում»:

Պայծառանալով այսպես՝ Էջմիածինն սկսեց բացվել աշխարհին ու բաշխվել հորիզոնից հորիզոն, վաճառի, Վեհափառի դիպուկ ու գեղեցիկ արտահայտությամբ, Էջմիածինը «ինչքան բաշխվի՝ այնքան կշատնա, ինչքան լույս սփռե՝ այնքան կշողա»:

Հայրապետն Իր կոնդակներով ու քարոզներով ու ճառերով արձագանքեց հայ կյանքի բոլոր կարևոր երևույթներին Հայաստանում և Սփյուռքում՝ ամեն անգամ պատմական լայն հայացքով իմաստավորելով դրանք: Ու միաժամանակ, առաջին անգամ պատմության մեջ, Հայրապետն անձամբ տարավ այդ լույսը երկրե երկիր, կատարելով բազմաթիվ հովվապետական ուղևորություններ, օվկիանոսներ կտրելով անխոնջ, հասնելով Սփյուռքի ամենահեռավոր անկյունները երկրագնդի վրա: Եվ տարագիր հայությունը որդիական ջերմությամբ պատասխանեց այդ հոգեկան միախառնությանը՝ նույնպես իր քարոյական ու նյութական սատարը մատուցելով Էջմիածնի վերածնունդին:

Բայց ավելին. որպես «ամենալայն իմաստով» հայ մշակույթի բարձր պատգամավոր, հնագույն եկեղեցվո պետի Իր հանգամանքով, Հայոց Հայրապետը միջազգային աննախընթաց հեղինակություն բերեց Էջմիածնին. ոչ միայն օտար եկեղեցական, այլև պետական իշխանություններն ամենուրեք Նրան դիմավորեցին ու ընդունեցին կառավարական մակարդակով իբրև Գերարգո Հյուրի: Ու փոխադարձաբար սկսեցին այցելել Էջմիածին բարձրաստիճան հյուրեր, պատգամավորներ, պաշտոնատար անձինք, եկեղեցական ու աշխարհական, գիտնականներ, գրողներ, արվեստագետներ աշխարհի տարբեր կողմերից, և Մայր տաճարի դարեր տեսած, հին լեզուներ լսած կամարները մեր դարի դեմքերը տեսան, մեր դարի հնչյունները լսեցին:

Վեհափառն Իր մի քարոզում ասել է. «Մեծ անձնավորություն մը ուրիշ բան չէ; եթե ոչ կորովի մեկ պատասխանը՝ տրված ժամանակի պայմաններում, իրադարձությանց, և մանավանդ ժողովուրդի պահանջներում՝ քարոյական, հոգևոր իդեալի մը շուրջ կազմակերպված»:

Վազգեն Ա, Հայրապետի ամուր, նախաձեռնող, բեղմնավոր հայրենասիրությունը կառուցված է իրապաշտ հիմքերի վրա, ժամանակի պայմանների և պահանջների ճիշտ գնահատման վրա:

Այս գիրքը կազմող տասը բաժիններից ամեն մեկում նյութերը դասավորված են ժամանակագրական կարգով, և ամեն մի բաժնի սկզբում ծանոթանում ենք մտքերի, որ Վեհափառն արտահայտել է Իր երիտասարդության օրերին՝ 1937—38 թվականներին Բուխարեստում Իր խմբագրած «Հերկ» ամսագրում, ինչպես նաև կաթողիկոս օծվելուց առաջ հրատարակած մի շարք գրքույկներում՝ «Անձնավորության գաղափարի մասին» (1938), «Մուսա լեռան հայերը Ֆրանց Վերֆելի վեպին մեջ» (1940), «Խրիմյան Հայրիկ որպես դաստիարակ» (1943), «Խուրբ հայրենիքի մասին» (1945), «Մեր պատարագը» (1945), «Հայրենի արևին տակ» (1954):

Այդ մտքերը ինքնին արդեն հետաքրքրական են՝ որպես գիտական հակումներ ունեցող և ինքնուրույն մտածելակերպ մշակած հրապարակագրի ստույգներ, որոնք ընկերաբանական, հոգեբանական, մանկավարժական, քարոյագիտական, գեղագիտական խնդիրներ են շոշափում, ըստ որում որոշակիորեն արտահայտված մի հիմնական մտահոգությամբ—ազգային առողջ ու լայնախոն ինքնագիտակցություն զարգացնել գաղութահայ երիտասար-

դուրյան մեջ, համոզիչ վերլուծումներով զգուշացնել ալլասերման վտանգից՝ թե՛ ազգային սահմանափակվածության, թե՛ ուծացնող օտարամոլության առումով, գտնել ազգային և համամարդկային միջև այն ներդաշնակ գույնի շրջան, որ օտարության մեջ ապրող հայ երիտասարդին կօգնի մշակութային ու քաղաքական ուրույն դիմագիծ ունենալու այս աշխարհում, ոչ միայն չկորցնելով, այլև խորապես ճանաչելով իր բուն էությունը՝ հարազատ ժողովրդին ու հայրենիքին կապող իր արմատները:

Այդ մտքերը առավել ևս հետաքրքրական են հենում այս գրքի մեջ: Տեսնում ես այն նախադրյալները, որոնց հիման վրա է բարձրանում կաթողիկոսի մտածողության ու գործունեության ամբողջ շենքն իր գաղափարական ամրությամբ ու ոգե-բարոյական ձևակերտումներով, որոնք սկզբունքայնության գեղեցկությունն ու համոզիչ ուժն են հստակորեն խոր մտքերով հարուստ և դաստիարակչական ավյունով լի Նրա խոսքին, նպատակասլաց ու արդյունավետ Նրա գործին: Տեսնում ես մանավանդ Նրա ազգային-հայրենասիրական գործունեության իրատեսության բուն արմատները, երբ կարդում ես, օրինակ, 1937-ին «Հերկ» ամսագրում տպված այս մի տեսակ առհավատչյան.

«Նույնանալ ժողովուրդին հետ որպես կենսաքանական էակ, նույնանալ ազգին պատմության և մշակույթին հետ որպես բարոյական հոգևոր էակ, նույնանալ հայրենիքի հողին ու ջուրին հետ որպես աշխատող-ստեղծագործող էակ, վերջապես նույնանալ հայ պետությունը ամբացնող և անոր ապագան պսակող իդեալներուն հետ որպես կամեցող և կառուցանող քաղաքական էակ: Ահա՛ մեր կարծիքով ճշմարիտ պատկերը ամբողջական հայուն»:

Հայրենասիրության այս հավատո հանգանակն ավելի է ամբողջանում՝ նույն օրերին նույն ամսագրում տպված հետևյալ մտքով. «Ժողովուրդ մը այնքան ներս է կուլի, ինչքան բազմաթիվ ու բազմազան մտքի ու հոգիի կապեր կմշակե արտաքին աշխարհի ու ժամանակի խնդիրներուն հետ: Մեր ջերմ ու բուռն տենչանքն է ազգովին մնա՛լ ու ապրի՛լ»:

Այս հիմքի, այս ամրապինդ բունի վրա բարձրանում է Հայրապետի ազգային-հայրենասիրական մտածելակերպի և գործունեության փաթեթավոր ծառը՝ իր երեք մայր ճյուղերով—Էջմիածին, Հայրենիք, Սփյուռք:

«Մենք մեր քրիստոնեությունը կհռչակենք ս. Էջմիածնով: Մեր սուրբ հավատքը անհայրենիք չէ, ոչ ալ թափառական»,—հայտարարում է Վեհափառը Իր գահակալության հենց սկզբից: Եվ քսան տարի շարունակ, ամենայն հստակությամբ, անառարկելի և անհողորդ տրամաբանությամբ, հավաստում և պաշտպանում է մեր հնագույն եկեղեցվո ազգային ինքնուրույն դեմքը քրիստոնեական աշխարհում: Ողջունելով եկեղեցիների եղբայրական միության էկումենիկ շարժումը, որին անդամակցում է նաև Հայաստանյայց առաքելական եկեղեցին, նա իրավամբ և ճշմարտորեն պնդում է միջոց, որ պատմական օրինաչափ զարգացումով սեփական ավանդույթներ ստեղծած հայ եկեղեցին կպահպանի և կպաշտպանի իր ինքնուրույնությունն ու անկախությունը այդ միության մեջ, մանավանդ որ այդ «բազմադարյան ինքնուրույնությունը նաև ինքնապաշտպանության վահան մըն է ազգային տեսակետով». և չի մոռանում հիշեցնել միջոց, որ հայ ժողովուրդը, դեռ հիմնդրորդ դարից սկսած, իր հավատքի հետ պաշտպանելով իր ազգային գոյությունը մեծագույն զոհողություններով ու հերոսությամբ, պաշտպանել է նաև քրիստոնեության սահմանները արևելքում: Վեհափառը շեշտում է, որ այդ «ինքնապաշտպանության վահանը» հատկապես կարևոր է այսօր, երբ մեր ժո-

դոլորդի կեսը, 1915-ի ողբերգության հետևանքով, ցրված է ի սփյուռս աշխարհի. իսկ պատմությունը վկայում է՝ անցյալում հայ տարագիր զանգվածները, որոշ գաղթօջախներում, իրենց ազգային դիմագիծը կորցրել ու ձուլվել են հատկապես այն պատճառով, որ դավաճափոխ են եղել ու կտրվել մայր եկեղեցվո ազգային ավանդույթներից:

Այս ևույն մտահոգություններից են քիտում նաև Ամենայն Հայոց Հայրապետի վշտալից, համբերատար ու աննկուն ջանքերը՝ կասեցնելու Անթիլիասի կաթողիկոսական Աթոռի ոտնձգությունները հայ եկեղեցվո նվիրապետական կարգի դեմ, ոտնձգություններ, որոնք, ինչ-ի՜նչ անխոհեմ դրդումներով, ձգտում են պատակտել Հայաստանյայց առաքելական եկեղեցին, անջատել Սփյուռքի հայությունը Էջմիածնից, փաստորեն ի չիք դարձնելով «Հայաստանյայց» բառի բուն իմաստը այստեղ: Արդարև, այդպիսի պատակտումը նշանակում է ճեղքել ինքնապաշտպանության վահանը վերից վար: Իսկ ճեղքված վահանը կոհիմանա՞ թշնամու հարվածներից, մանավանդ նենգ հարվածներից: Ի՞նչ է նշանակում հայ եկեղեցի առանց Էջմիածնի: Անհեթեթություն: Ծառ՝ առանց արմատի: Նալ՝ առանց դեկի: Մարդ՝ առանց հայրենիքի: Իսկ հայ եկեղեցվո համար Էջմիածինն արմատ է, դեկ է, հայրենիք է՝ իր դարավոր ավանդություններով ու կենդանի իրականությամբ: Էջմիածինը հայ եկեղեցվո հիմքն է, իսկ Էջմիածնի հիմքն է Հայաստանը:

Հայաստանը հիմքն է նաև Սփյուռքի հայության: Առանց Հայաստանի և Էջմիածնի՝ Սփյուռքը կկորցնի իր գոյության իմաստը: Իսկ Սփյուռքի գոյության իմաստը կենսականորեն կարևոր է ոչ միայն իր, այլև ամբողջ հայ ժողովրդի համար, Հայաստանի համար, Էջմիածնի համար, հայոց պատմության համար: Ահա թե ինչու Ամենայն Հայոց Հայրապետի մշտական մտահոգության առարկան է Սփյուռքը, ահա թե ինչու Վեհափառը մշտապես կոչ է անում.

«Ով որ իսկապես կհավատա հայ ժողովուրդի կենսունակության և անոր ապագային, պետք է հավատք ունենա դեպի Հայաստանի ներկան, այո՛, դեպի ներկա Խորհրդային Հայաստանը: Այլևս ներելի չէ մեզի մնալ պատրանքներու և ճառերու մշուշին մեջ: Պետք է գիտնանք ուղիղ դիտել ու հրստակ տեսնել մեր երկրի աշխարհագրական դիրքը, մեր ժողովուրդի համբանքը, մեր սեփական ուժը և այն, թե ինչ կկատարվի մեր շուրջ միջազգային կյանքին մեջ: Մեր օրերուն, մեր երկրի ու ժողովուրդի համար անհրաժեշտ է ամեն բանե վեր՝ ապահովություն, խաղաղություն և շինարար աշխատանք»:

Մեր պատմության բարդ էջերից քամված իմաստություն է սա:

Երրորդ ոլորտը Վեհափառի մտածողության ու գործունեության՝ խաղաղության պաշտպանությունն է:

Իր գահակալության առաջին իսկ օրերից Հայոց Հայրապետն ամբողջ հոգով նվիրվում է մարդկության սրբազան այդ դատին: Նա հայտարարում է Մայր տաճարի քեմից, որ Իր մտածումը, Իր գործունեությունը, ապագայի բոլոր Իր ծրագրերի իրագործումը հիմնում է «համայն աշխարհի խաղաղության, ժողովուրդներու բարեկամության, պետություններու համերաշխ գործակցության» վրա: Եվ Իր ելույթներում միշտ ու միշտ հնչում է «խաղաղություն» բառը՝ շեփորաձայն լեյտմոտիվի նման:

Այդ բառը հատուկ խորհուրդ ունի մանավանդ հայ մարդու համար, և ոչ միայն այն պատճառով, որ նա իր եկեղեցվո քեմից ամեն կիրակի, պատարագի ժամին, լսել է այնքա՛ն հայկական ու անորժալուր «խաղաղություն

ամենեցուն»-ը: Երևի շատերը կհիշեն մանկությունից, որ այդ պահին հառաչանքի մման մի ալիք էր անցնում բազմության վրայով. մեր տատիկները հոգոց էին հանում խաչակնքելով, մեր պապիկներն ու հայրիկները գլուխ էին շարժում մտախոհ: Խաղաղությունը մշտական իղձ է եղել հայ ժողովրդի համար, որի հայրենիքը, գտնվելով Արևելքի և Արևմուտքի սահմանագծին, շարունակ պատերազմի թատերաբեմ է եղել այդ երկու աշխարհների միջև՝ դարերի սկզբից մինչև այս քառերորդ դարը. և հայ ժողովուրդը շարունակ ստիպված է եղել պաշտպանական մարտեր մղել չորս կողմից, իսկ երբ շունչ քաշելու ժամանակ է գտել՝ նվիրվել է բուռն ստեղծագործության, կարծես շտապելով հագեցնել կառուցելու, արտահայտվելու ծարավը: Երբ կարդում ես մեր պատմիչների, անընդհատ տեսնում ես ժամանակների ու դեպքերի նույն հոլովույթը. թե ինչպես կառուցեցինք, թե ինչպես եկան ու ավերեցին, թե ինչպես կովեցինք ու դուրս արեցինք, թե ինչպես կառուցեցինք դարձյալ: Եվ այդ հոլովույթի մեջ միշտ հնչում է խաղաղության իղձը՝ շեփորածայն լեյտմոտիվի մման:

Խաղաղության իղձը լոկ բարոյա-փիլիսոփայական հայեցողությունն է եղել հայ ժողովրդի համար, այլ եղել է ուղղակի կենդանի ապրում, տեղ-չանք: Եթե հնարավոր լիներ այդ իղձը գործի վերածել, պայքարել այդ գործի համար, հայ ժողովուրդը, անշուշտ, պիտի հանդես գար պայքարի առաջապահ գծում:

Եվ բնական է, պատմականորեն տրամաբանական, որ Հայոց Հայրապետը եղա՛վ առաջապահ գծում, երբ խաղաղության պաշտպանությունը դարձավ համաշխարհային գործ: Նրա ձայնը, որով անհամար անգամներ հնչել էր «խաղաղություն ամենեցուն»-ը եկեղեցվո քեմից, լսելի դարձավ նաև ամբողջ աշխարհին որպես հայ ժողովրդի դարավոր իղձը՝ հնչելով իբրև Խաղաղության կոչ աշխարհին, իբրև Ուղերձ Ստոկհոլմի խաղաղության համաշխարհային կոնգրեսին, իբրև Ուղերձ ՍՍՀՄ Մինիստրների սովետի նախագահին և ԱՄՆ-ի պրեզիդենտին, իբրև Խոսք խաղաղության պաշտպանության Պրագայի կոնգրեսում, իբրև Ելույթ ընդհանուր զինաթափման և խաղաղության հարցի շուրջ Զագորսկում, իբրև Ծառ Հելսինկիի համաշխարհային խաղաղության համաժողովում, իբրև Ծառ Բեռլինի խաղաղության համաշխարհային համագումարում, իբրև Ուղերձ ՄԱԿ-ում ընդունելության առթիվ, իբրև Նամակ Քենտրբերիի արքեպիսկոպոսին, իբրև Նամակ Հոմի Պապին, իբրև աղոթք, մաղթանք ու կոչ՝ Մայր տաճարում և ամենուրեք...

Եվ բնական է ու տրամաբանական, որ Նրա խոսքի մեջ, միշտ և ամենուրեք, սև խաչի մման, աշխարհի հայացքի առջև կանգնում է մեր ժողովրդի մեծագույն ողբերգությունը: Քարի վրա արձանագրության մման կոտ ու ծանրակշիռ, առանց ավելորդ զգայնության, և դրանով էլ ազդու, հայտարարում է Նա Բեռլինում. «Պատերազմը բոլոր ոճիրների համագումարն է: Այսպես է, որ առաջին համաշխարհային պատերազմի ընթացքում, 1915 թվականին, Արևմտյան Հայաստանում կայսերական Թուրքիայի կառավարության հրամանով տեղահան եղան ու բնաջնջվեցին շուրջ երկու միլիոն հայեր: Դա մեր դարաշրջանի առաջին ցեղասպանությունն էր»:

Բեռլինում: Ինչպե՛ս չհիշես Խրիմյան Հայրիկին այդ նույն Բեռլինում մեկ դար առաջ՝ իր «թղթե շերեփով»...

Պ Ա Տ Գ Ա Մ

Մուգ կապույտ լաթակազմ, մեծադիր այս գիրքը, որի ոսկեդրոշմ խորագիրն է **Վազգեն Ա Հայրապետ Հայոց—Գիրք երրորդ**, փակում եմ սեղանիս լամպի տակ, դնում խաչքարի այս փոքրիկ բեկորի և Սևանից բերած այս մամուսպատ, գունագեղ քարերի միջև, որոնք միակ ու թանկագին զարդերն են սեղանիս:

Վեհափառն այս ժամին, ըստ իր սովորության, ինչպես ստում է գրքում, գուցե հանգստի ու խոկման իր պտույտն է՝ կատարում Վեհաբանի շուրջ. և ահա կանգ է առնում մի պահ, բարձրացնելով հայացքը՝ լուսնկա գիշերվա արծաթավուն երկնքի վրա ուրվագծվող Մայր տաճարին: Ամբողջ քսան տարի Նա կատարել է և շարունակում է կատարել այն «ոգեկան պեղումը», որով ձգտում է մշտապես «գտնել Էջմիածինը և ճանշնալ զայն իր ոգեկան ու գաղափարական խորհուրդով»: Քանի՜ անգամ Նա կանգնել ու նայել է այդպես, մինչև հարազատ գմբեթները լեզու են առել, իրենց հավերժական խորհուրդից մի պատգամ ևս ավանդելու համար: Եվ այդ պատգամները՝ հույզ, միտք և հորդոր դարձած, Հայրապետի խոսքերով հաղորդվել են հարազատ ժողովրդին և ամբողջ աշխարհին՝ ամենատարբեր բեմերից, երկրագնդի ամենատարբեր անկյուններում:

Տեսնում եմ Նրան այդպես կանգնած՝ հայացքը Մայր տաճարին, իսկ մտքումս դեռ հնչում է Վեհափառի ձայնը գրքի էջերից. մտքեր, մտքեր՝ խորունկ, ոգեշունչ և գործնական—մարդու և տիեզերքի մասին, ժողովրդի, պատմության, հայրենիքի, օտարության մասին, նաև հոգու, անձնավորության, մշակույթի, հասարակության, բարոյականության, իդեալի, ազատության, ինքնաճանաչման, կյանքի ու մահվան, հույսի ու հարության, տարակույսի և համոզմունքի, առաքիլության ու մոլության, հավատքի և բանականության, գիտության, արվեստի, երանգների ու գույների, երգի ու աղոթքի, մանուկների և դաստիարակության, սիրո և ատելության, կառուցման և ավերման, ներդաշնակության, ժամանակի...

Ժամանակի մասին.

«Վասնզի, Մեր տեսակետով, Էականը այն չէ, թե ի՞նչ է ժամանակը ինքն իր մեջ, թե առարկայական իրականության կհամապատասխանե՞ ան, թե՞ պարզապես մարդկային զգայականության մեկ կերպն է, այլ Էականը այն է, թե անսկիզբ ու անվախճան ժամանակի հավիտենական տևողության մեջ ամեն մեկս մեր ժամանակը ունինք... Եվ ահա մեծ հարցումը՝ ի՞նչպես ապրիլ մե՛ր ժամանակը»:

Վեհափառն ի՛ր ժամանակը ապրելու օրինակով պատասխանում է այդ մեծ հարցումին:

Օտարության մեջ ծնված հայորդի, գաղթական Աքրահամի և Սիրանուշի որդին, հավատքով ու համառ աշխատանքով իդեալ կերտած մարդ, նվիրյալ հոգևորական ու հայրենասեր, լայն մտահորիզոնի տեր մտածող, գործուն և անշահախնդիր մարդասեր՝ Նա եղավ 130-րդ գահակալը Լուսավորչի գահի և կարողացավ կորովի մի պատասխան դառնալ ժամանակի պայմաններին ու պահանջներին, կարողացավ իսկական վերածնունդ բերել տասնյոթ դարեր ապրած Էջմիածնին:

«Նկարագիրը իր լրիվ ու ճշմարիտ իմաստին մեջ ուրիշ բան չէ, եթե ոչ այն արահետը, որ կտանի մարդը դեպի անձնավորություն»,—գրել է Նա իր


երիտասարդության օրերին: Կամքի ուժով ու սրտի լիությամբ կերտելով Իր
նկարագիրը, Նա այդ արահետը դարձրել է պողոտա՝ դեպի Անձնավորու-
թյուն:

Եվ ահա Նրա վերջին գործը այսօր՝ ոսկեգիր Այբուբենը հայոց:

Նոր Վեհարանի մարմարակերտ գահաարահում, հյուսիսային պատին,
դռան երկու կողմերը, Վեհափառի մտահղացմամբ փորագրված են անուն-
ները անցյալի այն մեծագործ Հայրապետների և հոգևորականների, որոնք
մեր մշակույթի պատմության կաճառն են կազմում Մուշտոցից սկսած՝ իրենց
բազմապիսի գործերով: Վերջին անունն է՝ Կոմիտաս վարդապետ: Պատ-
մությունն, անկասկած, կավեղացնի այնտեղ Վազգեն անունը, որին ժողո-
վորդն արդեն Ծինարար տիտղոսն է տվել ինքնաբուխ կերպով:

ԿԱՐՊԻՍ ՍՈՒՐԵՆՅԱՆ





ԽԱՉԱՏՈՒՐ ԿԱՆԱՅԱՆ

ԷԶՄԻԱԾՆԻ ՆՎԻՐԱԿՈՒԹՅՈՒՆԸ ԺԸ ԴԱՐՈՒՄ (Պատմական ակնարկ)

Նվիրակության մասին շատ քիչ տեղեկություն ունենք. մեր եկեղեցական պատմության այդ մասը դեռ չէ ուսումնասիրված: Նվիրակության պատմության վերաբերյալ շատ ու քիչ նյութ ունենք ժԸ դարու Բ կիսից—այն էլ տ. Գյուտ քահանա Աղանյանի հրատարակած «Դիւաններից», որոնցից և մեծապես օգտվում ենք: Նվիրակության ծաղկման շրջանն էլ հենց այդ ժամանակամիջոցը պետք է համարել:

ԺԸ դարու նվիրակության պատմության Ա կիսի համար, հակառակ իմ ջանքերի, գրեթե չկարողացա քան գտնել. այնպես որ մի ընդհանուր տեսություն տալուց հետո՝ ինձ մնում է Ղազար Զահկեցի կաթողիկոսի ժամանակից (1737—1750) սկսել ու տանել մինչև Ղուկաս կաթողիկոս (1780—1799):

* Սիրով ենք հրատարակում ս. Էջմիածնի Գևորգյան ճեմարանի երբեմնի ուսանող, վաստակաշատ մանկավարժ, հմուտ գրականագետ-քանասեր և «Էջմիածին» ամսագրի հարգելի աշխատակից, հանձնարարաբար Կանաչանի արժեքավոր տույն պատմական ուսումնասիրությունը, որը սիրով խմբագրությանն են տրամադրել հանգուցյալի հարգատեղը:

I

Ընդհանուր տեսությունն նվիրակության մասին

Տասնևչորսերորդ դարու վերջերին, Լևոն Զ-ի մահվամբ (1393), հայը կորցրեց մի անգամ ընդ միշտ յուր քաղաքական անկախությունը և կապվեց այն մյուս մեծ կազմակերպության, որ եկեղեցին էր: Եկեղեցին, որ թագավորության գոյության ժամանակ ևս ուներ յուր ներգործական դերը հայ իրականության մեջ, ներկայանում էր որպես զորեղ կազմակերպություն՝ հայերին ի մի ձուլելու:

Քաղաքական անողորմ անկատարից հալածված հայությունը ցրվում է աշխարհի զանազան կողմերը: Սակայն կար Հայաստանում դեռ մի զորեղ Հաստատություն՝ հայոց եկեղեցին, որ կարող էր յուր ցրված հատվածների հանգուցը դառնալ:

Մեծ է եղել հայոց եկեղեցու դերը մեր պատմության մեջ: Հիմա ևս պետք է կարողանար աշխարհի չորս կողմում ցրված հայության համար հանդիսանալ պահպան հրեշտակ՝ գերծ պահելու նրան ամեն արհավիրքներից, պետք է կարողանար կատարյալ տարագիր որդոց մխիթարիչ համդիսանալ:

Եկեղեցական մեծ հիմնարկության կենտ-

րոնը ա. Էջմիածինն էր: Նա այն ջահն էր, որից լուսո շողեր էին տարածվում ցրված հայության խավարչտին անկյունները:

Այդ ժամանակվանից սկսած, ահա, ըստ անհնայն հավանականության, առաջ է գալիս մեր եկեղեցական կյանքում մի գործող գործոն, որ հայտնի է **նվիրակություն** անունով: Այդ գործոնի շնորհիվ այնուհետև շեղանում, պայծառանում է Էջմիածինը, սրա հետ կապվում են հայության բոլոր հատվածները, որոնք նրանով ոգևորվում, նրա սիրով արտահայտում էին իրենց ազգային հայրենասիրական զգացումները:

Այդ, իհնչ է **նվիրակությունը** և ուլքե՞ր էին նվիրակները:

Նվիրակ բառը անտարակույս առաջացել է նվեր բառից, որովհետև նվիրակության պաշտոնի մի մեծ իմաստն էլ այն էր, որ նվիրակներն իրենց շրջագայության միջոցին նվերներ էին հավաքում ժողովրդից Մայր Աթոռի համար. ուրեմն նվիրակ (երբեմն էլ նվիրակող) նշանակում է նվերներ հավաքող: Սակայն, նվիրակ բառը նվեր բառից ծագելով դարձել է արդեն մի հասկացողություն—եզր, որոշ գաղափարի արտահայտություն:

Նվիրակները եպիսկոպոսներ կամ վարդապետներ էին, որոնք ուղարկվում էին կաթողիկոսի հրամանով տարագիր և Էջմիածնի սահմաններից դուրս գտնված հայերի մեջ՝ նրանց հոգևոր մխիթարիչ լինելու կաթողիկոսի կողմից և բարեպաշտ ժողովրդի կամավոր տուրքը ժողովելու ի պայծառություն ա. Աթոռի:

Նվիրակները դուրս գալով Էջմիածնից վերցնում էին իրենց հետ **մյուռոն** ժողովրդից բաշխելու: Սուանց մյուռոնի նվիրակն Էջմիածնից դուրս չէր գա. նվիրակության պաշտոնի հետ անհրաժեշտորեն կապված է և մյուռոնի բաշխման դերը: Նվիրակները իրենց հետ ունենում են նաև **նվիրակական կոնդակ**, որով մի փաստաթուղթ է տրվում հոգևորականի ձեռքին՝ թե նա նվիրակ է և ա. Էջմիածնից, կաթողիկոսից է ուղարկված: Այդ կոնդակն ևս անհրաժեշտ է, որովհետև բազմաթիվ հոգևորականներ դեպից-դեպից դուրս են գալիս և նվիրակության անվան տակ սկսում են շահագործել ժողովուրդը և ա. Էջմիածնի վարկը զգում: Նվիրակներից նրանք, որոնք եպիսկոպոս էին, վերցնում էին իրենց հետ նաև մի-մի վարդապետ կամ սարկավագ որպես օգնական, կամ, ինչպես ասվում է սովորաբար, սպասավոր: Բայց պատահում է, որ վարդապետ նվիրակներն էլ ունենում են իրենց հոգևոր սպասավորները:

Այսպես՝ ծանրաբեռնված մյուռոնով, հայրապետական, սրբատառ կոնդակով, բազ-

մաթիվ թղթերով, որ գրում է կաթողիկոսը զանազան հայ իշխանների, նվիրակը դուրս է գալիս ա. Էջմիածնից և դիմում դեպի յուր վիճակը նվիրակելու:

Կային նվիրակության համար որոշ թեմեր¹, շրջաններ, որոնց յուրաքանչյուրի համար նշանակվում էր մի-մի նվիրակ: Նվիրակը սովորաբար պետք է իր գործը կատարեր և վերջացներ երեք տարվա ընթացքում, բայց նա երբեմն մնում էր երեք տարուց ավելի:

Գնում էին նվիրակները, սակայն նրանց համար ճանապարհին առաջանում էին դժվարություններ, արգելափոխ հանգամանքներ: Հաղորդակցությունը կատարվում էր կարավաններով, այլ միջոց չկար: Նվիրակները երբեմն ավագակային խմբերի ձեռն էին ընկնում, երբեմն բնության արհավիրքներից ենթարկվում. բայց տանում էին նրանք բոլոր տանջանքները և, հարթելով իրենց առաջ դուրս պրծած խոչընդոտները, մտնում էին վիճակներ² իրենց սրբազան պարտքը կատարելու: Նրանց կրած նեղությունների մասին իբրև օրինակ հիշեմք այստեղ Հնդկաստանի նվիրակին պատահած դեպքը ծովի վրա՝ Հնդկաստանի ճանապարհին: Հնդկաստանի այդ նվիրակը՝ **Հովհաննես եպիսկոպոս Պոնտացի**, որ ու-

¹ Նվիրակության թեմերի ցանկ կարելի է գտնել «Ջամբուում», էջ 44—51 և «Դիւան», Գ, էջ 793—806: «Դիւանի» մեջ եղած ցանկը կազմել է Սիմեոն կաթողիկոսի մահապատիվ սպասավոր Մկրտիչ արքեպիսկոպոսի սանիկ Երեմիա Օշականցի մոտաւոր, որը վերջը արքեպիսկոպոս դարձավ: Այս ցուցակը կրում է հետևյալ վերնագիրը. «Աստուածակառոյց մեծի Աթոռոյս արքայ Էջմիածնի համայն նուիրակաց յաղագս նուիրակական արդեանց շրջագայելի քաղաքն հանդերձ հուղաքաղաքօք նոցին, ըստ յատուկ յատուկ անուանց մի ըստ միոջէ ստորագրին»: Այնուհետև թվում է մեկ-մեկ նվիրակական յուրաքանչյուր թեմերը և դրանց մեջ եղած քաղաքները, գյուղերը կլն: «Ջամբուի» և «Դիւանի» ցուցակներն իրարից քիչ տարբեր են ձևի, անունների և մասամբ բովանդակության կողմից:

Նվիրակության թեմերի մեջ կան տեղեր, որ կոչվում են «Տէրունի»: «Տէրունի» կոչվում էին այն գյուղերը կամ քաղաքները և կամ համայնքները, որոնց հասույթն անմիջապես Մայր Աթոռ էր գնում և իրենք պատկանում էին անմիջապես ա. Էջմիածնին: «Տէրունի» կոչվում էին և կաթողիկոսական թեմերը, որոնց առաջնորդներին ինքը կաթողիկոսն էր նշանակում ուղղակի՝ և ոչ մի պետության չէին առաջարկվում հաստատության համար. այդ թեմերի եկամուտն էլ ա. Էջմիածնին էր պատկանում: Թուսահայոց թեմերից այսպիսի թեմ է հին ժամանակներից սկսած մինչև այժմ Երևանի թեմը (ծագութ. «Դիւան», Գ, § 56):

համար նվերներ հավաքելով նրանք վերահասու են լինում ժողովրդի ցավերին, քարոզում, մխիթարում են նրանց: Ահա մի տեղ հայտնվել է ճեզվիթ կրոնավորը, որ պղտորելով ժողովրդի միտքը, ուզում է դավանափոխ անել նրան. իսկույն վրա է հասնում Էջմիածնի նվիրակը և մոլորյալ ժողովրդին ուղիղ ճանապարհի բերում՝ հորդորելով հարազատ և հավատարիմ մնալ իրենց եկեղեցուն, հնազանդ Ամենայն Հայոց կաթողիկոսության: Որպեսզի նվիրակը կարողանա զերծ պահել ժողովրդին զանազան գաղաղակալ գաղաղակներից, օտար հավատի քարոզիչներից, պետք է որ ինքն էլ քաջ տեղյակ լինի հայոց եկեղեցու դավանության և նրա ուսմունքին:

Ժողովրդի մեջ ծագած վեճերի, կոնֆլիկտների հանդարտեցնողն է նվիրակը. իսկ եթե վերջինիս հետ է վեճ ունենում ժողովուրդը, այն ժամանակ նրանց դատող հաճմամբ է մեկ ուրիշ նվիրակի: Վերջին տեսակի նվիրակը, որ հաճախ ուղարկվում է շատ նվիրակների մոտ՝ նրանցից հավաքում հասույթները, կոչվում է «նուիրակ նուիրակաց»: Այսպիսի «նուիրակ նուիրակաց» է Ղազար կաթողիկոսի ժամանակ Աստապատից Ղազար վարդապետ (Դիան, Գ, էջ 27):

Նվիրակները հաստատուն բնակավայր չունեն՝ ինչպես առաջնորդները. նրանք շրջում են միշտ և վառ պահում ժողովրդի մեջ հայի հավատը. նրանք ներկայանում են տարագիր հայության մեջ որպես փոխաճորդներ կաթողիկոսի, վերջինս կողմից բերան են հանդիսանում ժողովրդին:

Չպետք է շփոթել այն ժամանակվա առաջնորդ և նվիրակ գաղափարները: Առաջնորդը նստում էր վանքում կամ քաղաքում և հանդիսանում էր Մայր Աթոռի ներկայացուցիչ՝ որպես վարչական պաշտոնյա, թե՛ հասարակական և թե՛ եկեղեցական գործերում. իսկ նվիրակները մնայուն վարչական պաշտոն չունեին, այլ նրանք լոկ քարոշական կողմի վերահսկիչներ էին ժողովրդի վրա: Դրանք նաև մի տեսակ վերաքննիչ էին և իրենց քննության եզրակացությունը հաղորդում էին անմիջապես կաթողիկոսին: Կաթողիկոսի և նվիրակի միջև եղած թղթակցությունն անպակաս է. նվիրակը յուր ամեն մի քայլի համար պետք է տեղեկություն տա թղթով կաթողիկոսին:

Յուրաքանչյուր նվիրապետական շրջան ունի յուր գանձարանը, ուր հավաքվում են Մայր Աթոռի անունով ժողովված բոլոր նվերները, թե՛ դրամական և թե՛ այլ տեսակի իրեր: Գանձարաններն ունեն իրենց գանձապետները կամ գանձապահները, որոնք նշանակվում են կաթողիկոսից անմիջապես կամ նվիրակի միջնորդությամբ՝

տեղացի հայտնի անձերից: Այսպես՝ նվիրակը յուր ժողոված արդյունքները, որ լինում էին փող, երկաթեղեն, ցորեն, գարի, զանազան թանկագին քարեր ու մետաղներ, կենդանիներ՝ ոչխար, ձի, էջ կն հաճմունք է գանձապետին, որը և փոխադրում է Էջմիածին, կամ վերադարձին նվիրակը ինքը յուր հետ տանում է Մայր Աթոռ հավաքած նվերները: Նվիրակը լինելով կաթողիկոսի ներկայացուցիչը՝ շատ անգամ յուր վկայությունն է հայտնում մի ինչ-որ վարդապետի եպիսկոպոս ձեռնադրելու արժանավորության կամ ապիկարության մասին: Նվիրակության միջոցին եպիսկոպոս նվիրակը յուր սպասավոր սարկավագին վարդապետ է ձեռնադրում ժողովրդի բազմության առաջ, որպեսզի այսպիսի հանդեսներից զուրկ չմնա ժողովուրդը: Բացի դրանից՝ նվիրակներն իրենց շրջաններում, թափառական լինելով, ձեռնարկում են զանազան բարեգործությունների: Նրանք օծում են եկեղեցիներ, շատ անգամ դպրոց են հիմնում և դասախոսություններ կարդում, գրել-կարդալ սովորեցնում ժողովրդի տգետ պատանիներին: Նրանք քարեայաշտ ժողովրդի առաջնընկած ուխտավորական խմբեր են բերում դեպի ս. Էջմիածին: Եվ այդ ուխտագնացությունը շատ հանդիսավոր էր: «Հնումը ս. Իջման տեղը ս. Էջմիածնում այն նշանակությունն ուներ, ինչպես Երուսաղեմի ս. Հարության տաճարում Փրկչի գերեզմանը և հայոց Հակոբյանց վանքում՝ Գլխադիրը: Նվիրակների առաջնորդությամբ ուխտավորները հեռավոր տեղերից ս. Հոփսիսի վանք տոներին ս. Էջմիածին ուխտ գալով, եկեղեցական թափորով առաջնորդվում էին դեպի տաճարը: Փակ դռան առաջ քաղվում էր «Խոստովան եղերուք» սաղմոսը մինչև «Բացեք» տունը. ապա եկեղեցու դուռը բացվում էր. «Զողորմութեանց քոց դուռն» շարականը երգելով՝ մտնում էին տաճար: Ս. Իջման սեղանի առաջ երգվում էր «Էջմիածինն ի Հօրե» շարականը: Հանդիսադիրը, որ լինում էր նվիրակը, քաղում էր փոխ առ փոխ «Ուրախ եղէ ես ոյք ասեին» ի տուն Տեառն երթիցուք» սաղմոսը. սարկավագը քարոզում էր «Սուրբ եկեղեցեաւս». հանդիսադիրն ասում էր «Ի մէջ տաճարիս» աղոթքը և երկրպագում ս. Անդանին համբուրելով խաչն ու Ավետարանը. ապա «Պահպանիչ»-ով օրհնում էր ուխտավորներին, որից հետո սկսվում էր նրանց ուխտադրությունը: Նվիրակության դադարելով՝ ասում է Հուսիկ եպիսկոպոս Մովսիսյան՝ հետզհետե վերջացավ ուխտավորների խմբովին ս. Էջմիածին գալն էլ, և ուխտավորների տաճար մտնելու այս արարողությունը

էլ դադարած պետք է համարել ժԹ դարի սկզբից»:

Այսպես տանջանքների, դժվարությունների ենթարկվելով և ժողովրդի մեջ եռանդուն գործելով, բնական է, որ ժողովուրդը պետք է հարգեր, սիրեր Էջմիածնի նվիրակներին և քերկրությամբ ընդուներ նրանց: Նվիրակներն այնպիսի տպավորություն են թողել ժողովրդի վրա, որ նրանց անձը բանաստեղծության, սքանչելի գրույցների նյութ է դարձրել: Նվիրակների թողած տպավորության մասին գաղափար կազմելու համար մեջքերենք ժԷ դարու սկզբին գրված մի բանաստեղծություն, որ գրել է Հովհաննես անունով մի քահանա⁵:

ԺԷ դարու սկզբին հոռուացոց աշխարհն՝
Բյուզանդիոն են գնում ա. Էջմիածնի 3 նվիրակներ՝
Հովհաննես եպիսկոպոս, Սարգիս եպիսկոպոս և Դավիթ աբեղա, որոնք իրենց գործունեությամբ սեր և հարգանք են առաջ քերում ժողովրդի մեջ դեպի իրենց և նույնիսկ նահատակվում են գործի համար, որով է մեծ տպավորություն թողնում ժողովրդի վրա: Բանաստեղծությունը պատմողական ձև ունի և սկսվում է այսպես.

«Ինքն հարիր Հայոց թուական,
Յիսուն և հինգ թի աւելեան,
Էջմիածնէն նուիրակք եկան,
Բոլոր աշխարհն Հոռուոց տան:
Յոյով մեռոն կայ ընդ ինքեան,
Մեծ նամակով և օրհնութեամբ,
Եկեալ հասին Բիւզանդիան,
Որ է Ստամպոլ՝ սրբոց կայան»:

Նրանց, ովքեր տեսնում են, իբրև հրեշտակ են ընդունում, ցնծում-զվարճանում են, վանքերն ու անապատներն իսկ ուրախանում են, երբ տեսնում են Էջմիածնից եկած «սրբոց նման» նվիրակներին: Նվիրակները կարդում են իրենց հետ քերած կաթողիկոսի օրհնության թուղթը, և ժողովուրդը քերկրում է, նրանց անունը տարածվում ամենուրեք:

«Անուանք նոցա համբաւեցան
Սուրբ օրհնութիւնք, որ կարդացուան,
Եկեղեցիք քերկրեալք ցնծան,
Եւ ժողովուրդս, որ օրհնեցան»:

⁵ «Տարագ», № 30, 1904 թ., Հուսիկ եպիսկոպոսի հոդվածից:

⁶ Ոտանալիորը տպված է «Հայոց նոր վկաները» գրքում, հատոր Բ, էջ 17. կազմեցին Մանանդյան Հակոբ և Անադյան Հրաչյա, հաս. Կ. Կոստանյանի «Նոր ժողովածու», Ա պրակ, Միջնադարյան հայոց տաղեր և ոտանավորներ, էջ 31:

Ամբողջ Կ. Պոլիս քաղաքը նվիրակում են և ապա նավում՝ դեպի Կաֆա քաղաքը, որ «Կաֆայեցիք խիստ ցնծացան, իբր զառաքեալսն տէրունականն»: Նվիրակները շարունակում են շրջել, մտնում են «Ղարապօլտան», «Սէշով» քաղաքը, «Իլով». այդ բոլոր տեղերում ցնծությամբ ընդունում են և նահապարհ դնում: Նրանք գալիս են «Աղքերման» և ապա դառնում են Կ. Պոլիս.

«Հիրեր եկին մեզ աննրման,
Զինչ ըզհրեշտակք Արքահամեան,
Ոնց Ստամպոլցիք գնուս տեսան,
Տեսուն Աստուծոյ շատ գոհացան»:

Այնուհետև նվիրակները դավադրության գոհ են գնում և փաշայից գլխատման դատապարտվում.

«Յովհաննու պէս զըլխատեցան
Կամ Յակոբու առաքելեան,
Որ է մարմինն ի ըսպանման,
Զառուս երրորդ անթաղ մընան:
Սրբոց մարմինքը, որ հոն կեցան,
Ոչ լեռններն թարշամեցան,
Լոյսն էր իջեալ աստղանման,
Զայն լոյս տեսքով շատ մըսըլման»:

Հետո հայերը գնում են, Վեզիր Ալի փաշայից խնդրում, որ թույլատրի սրբերի մարմինը թաղելու մեր եկեղեցական ծեսով. ստանում են թույլտվություն, ու կատարվում է հուղարկավորության մեծ հանդես. թաղման հանդեսին ներկա են և լավան կահայք, եղերամայրեր:

«Կանալք բազում ժողովեցան,
Լալկաններ ողբերգական,
Ծատ լացուցին զամենեսեան,
Մինչ սար ու ձոր ի լաց ելան»:

Երեք նահատակ նվիրակների աճյունները մի դամբարանի մեջ ամփոփում են:

Մովսես Գ. Խոտանանցի կամ Տաթևացի կաթողիկոսը (1629—1632) վարդապետական գավազան է տալիս Փիլիպպոսին (հետո կաթողիկոս) և եպիսկոպոս ձեռնադրելով ուղարկում է նվիրակության «Յունաց աշխարհը»: Նա յուր առաքինի վարք ու քարքով և յուր գործի հմտությամբ մեծ տպավորություն է թողնում ժողովրդի վրա, որով և նրա նկատմամբ կազմվում է հետևյալ գրույցը, որ լսել է Զաքարիա սարկավազը Կարինում:

Փիլիպպոսի նվիրակության ժամանակ Կարինում գտնվում էր Միևսա անունով մի վարդապետ, որ երաժշտության մեջ հմուտ էր, սակայն խիստ գոռոզ, հանդուգն, ինք-

նահալան և բնավ չէր խոնարհվում ոչ ոքի առաջ: Մի օր երեկոյան ժամասացությունն է կատարում, ներկա է և նվիրակը, որը նկատում է Միմաս վարդապետի սխալը, զգուշացնում է նրան, սակայն նա յուրն է անում և դուրս գալիս եկեղեցուց: Ժամասացության վերջում նվիրակը մի պատշաճին քարոզ է խոսում և ակնարկում Միմաս վարդապետի տգիտությունը եկեղեցական խորհուրդների մեջ և նրա քմահաճորեն վարվելը: Միմասը լսում է դռան մոտից այդ և նախանձով լցված գնում է իշխանի մոտ և Փիլիպպոսին չարախոսում, զրպարտում է ասելով. «Պարսից աշխարհից մի աքեղա է եկել այստեղ ու մեր երկրից շատ դրամ է հավաքել պարսիկներին սալու, որ գան ավերեն մեր աշխարհը. բացի դրանից անիծում և հայհոյում է ձեր ազգությունը. թե Օսմանին, թե Օսմարին նզովում է»: Զայրանում է փաշան, ուղարկում է 3 եմիշարի զինվոր, որ քարշ տալով բերեն նվիրակին: Եմիշարիները գալիս են, տեսնում Փիլիպպոսին շրջապատված քաղաքացիներով. հայտնում են փաշայի հրամանը. նա առնում է 2 մում՝ պահելով փիլոնի տակ գնում է, նրա հետ և բազմությունը. նվիրակը ներս է մտնում, գլուխ տալիս փաշային. սա հայտնում է Միմասի ասածները: Փիլիպպոսը, որ դժվարանում էր տանկերեն խոսել, թարգմանի բերանով ասում է, որ ինքը յուղավաճառ է և այդ միջոցով է փող հավաքել, իսկ Միմաս վարդապետի հաղորդածը՝ զրպարտություն միանգամայն. ապա փիլոնի տակից հանում-տալիս է փաշային 2 մումը, որոնք փաշայի ձեռքին կաշում են ու վառվել սկսում «սուրբ հոգու շնորհի»: Փաշան այդ հրաշքի վրա սոսկում է և վարդապետին ազատ արձակում. սակայն իսկույն հետ է կանչում՝ երբ շրջապատողներից իմանում է, որ նա սուրբ մարդ է և շատ հրաշքներ է գործում: Փաշան ասում է, որ երաշտ ժամանակ է, բոլոր երկիրը չորացել է, եթե կարող է, թող անձրև թափե: Վարդապետը պատասխանում է. «Ողորմությունն Աստուծոյ բազում է, բայց տաճիկ ոչ թողուն գնեզ աղօթել ըստ օրինաց մերոց»: Փաշան ապահովում է նրա աղօթքի ազատությունը: Փիլիպպոսը մտնում է «Միաբանից Աստուածածին» եկեղեցին. հրամայում է բոլոր եկեղեցականներին զգեստավորվել, ինքն էլ պատարագի զգեստներն է հագնում,—առնում է վրան եմփրոնը, թագը դնում գլխին և ձեռն առնում խաչը. Ավետարանով, խաչով, ծնծղայով, զանգակների հնչմամբ դուրս են գալիս եկեղեցուց ու սկսում շարական ասելով շրջել քաղաքում: Դուրս են գալիս քաղաքի հյուսիսային կողմը, որ ասվում է «Սուրբ Նշանի բլուր»: Երբ

երգում են՝ երկինքն սկսում է ամպել. հենց որ հասնում են սահմանված տեղը, «սկսում է ցոլել». երբ կարդում են Ավետարանը՝ 3 անգամ ամպը գոռում է. երբ թափորն սկսում են, երկինքը բացվում է և հորդ անձրև թափվում. թափորի ավարտմամբ՝ արդեն դաշտը ծով է դառնում: Այս երկու հրաշքները տեսնելով փաշան բռնում է չարախոս Միմաս վարդապետին և տուգանքի ենթարկում, որ մյուս անգամ զրպարտությունից հեռու մնա:

Թե՛ վերոհիշյալ բանաստեղծությունը, թե՛ այս գրույցը, գալիս են ապացուցելու, թե նվիրակներն ինչ սիրելի և օգտավետ գործիչներ էին մեր հավատացյալ ժողովրդի համար:

Սակայն մեր բոլոր նվիրակներն էլ հիանալի, օրինակելի անձնավորություններ չեն եղել, նրանց մեջ ևս պատահել են ապիկար հոգևորականներ, որոնք «նուիրակ» նվիրական անվան տակ գործել են շատ անհեթեթություններ, այդ անունով շահագործել են ժողովուրդը և բազմաթիվ զեղծումներ գործելով իրենց անձնական շահն են ի նկատի ունեցել: Դրանք, սակայն, չեն կարող, հարկավ, նսեմացնել «նուիրակություն» պատվական նշանակությունը:

Մեր մեջ գլխավորապես ավելի ապիկար նվիրակներ հանդես են գալիս Մելքիսեթ կաթողիկոսի ժամանակ. այն Մելքիսեթի, որ անձնական շահի համար տխրահռչակ Նիկոլ Թորոսովիչին եպիսկոպոս ձեռնադրեց ու լեհահայոց վրա առաջնորդ կարգեց, որն և եղավ պատճառ հայերի դավաճանության ու կորստյան: Մելքիսեթի ժամանակ ս. Էջմիածինը վատ դրության էր հասել. զարդերն, անոթները վաճառված էին կամ պարսիկ խաների մոտ գրավ դրված. եկեղեցականներն իրենց կոչման հակառակ ամեն գործի մեջ մտնում էին ու ձեռնարկում. գավառներումն էլ դրությունը նույնն էր: Սակայն համատարած թշվառության խավարի մեջ մեկ-մեկ ճրագներ էին պլպլում: Վասպուրականում, օրինակ, դեռ իրենց կոչման վրա բարձր կանգնած հոգեվորականներ կային, որոնք ժողովրդի ներկայացուցիչների հետ միասին մի մեղադրական թուղթ են ուղարկում Մելքիսեթին: Ի միջի այլ մեղադրական կետերի հիշված է և հետևյալը. «...Երկրորդ անկարգություն այն է, որ թե յինչ երկիր, որ նուիրակ յուղարկես՝ նա կու ընտրես՝ յոր տեղ, որ չար և լիրբ, անզգամ, անամօթ և ամբարտաւան

⁷ Այս գրույցը պատմում է Զաքարիա սարկավազին հիշյալ Միմաս վարդապետի աշակերտ Կարնեցի Հովհան վարդապետը: Զաքարիա սարկավազ, հատոր Բ, Վաղարշապատ, 1870 թ., էջ 20:

մի կայ, որ ոչ յԱստուծոյ երկնչի և ոչ ի մարդկանց ամաշէ, զայնպիսիքն կու առաքես, որ զարդարեալ երիվարօք և պճնեալ հանդերձիք և կրկին պաշտօնէիք գան և գոռոզաբար խրոխտան, և բազում ցոփութեամբ և անկարգութեամբ և արբեցողութեամբ զաշխարհս վրդովեն:

... Գրոց ամենկին անտեղեակ են և օրհնեաց բնախն անծանօթ, և բոլորովին ոչ ճանաչեն զհաւատս քրիստոնէութեան, թէ զինչ է: ... Զարդարն և զանմեղն դատաւարտեն վասն ընչից, և զանիրան իրաւացուցանեն վասն կաշառաց, և ազգապղծութեան հրաման տան վասն արծաթոյ: ... Գիտենք թէ տքա ի՞նչ կու հասուցանեն ի ս. Աթոռոյ ի ձեռս Վեհիդ, զի վասն ազաւորութեան իրեանց շրջին և ոչ վասն օգտի տուրք Տանդ, զի զինչ որ ժողովեն, ի զինս

այնպիսի երեւելի հանդերձի տան, որ ոչ վայել է քրիստոնէի և ոչ իշխանի, թող թէ կարգաւորի... Շրջին իբրեւ զբռնաւորս և պճնին, և ի կերակուրս և լըմպելիս ծախեն զժողովեալսն իրեանց, յոյլ կաշառս տան բռնաւորաց և բազում տուգանս ալլազգաց վասն հակառակաւէր բարուց իրեանց, վասն որոյ ազգս Հայոց տաղտկացեալ է ի զարշահոտութենէ վարուցն այսպիսեացս*:

Այդ ընդհանուր տեսությունից հետո, տեսնենք, յուրաքանչյուր կայսրության գործունեությունը նվիրականության ասպարեզում առանձին-առանձին:

(Ծարունակելի)

* Լեո, Հայկակ. տպագր., հատ. Ա, էջ 144—146: Այս մասին տես նաև Առաքել պատմագիր, գլ. Իթ, Եսև Լեո, Հայկ. տպ., Բ տիպ, էջ 82:

ԽԱՉԻ ԶԱՐԴԱՄՈՏԻՎՆԵՐԸ ԿԱՊԱԴՈՎԿԱՀԱՅ ԳՈՐԳԱՐՎԵՍՏՈՒՄ (13—15-ՐԴ ԴԴ.)

Կապադովկիան հայաշատ շրջան է եղել հնուց ի վեր: Այդ իսկ պատճառով հունական աղբյուրներում՝ ἡ μικρὰ Ἀρμενία¹, հռոմեականում՝ Armenia Minor², բյուզանդականում՝ Thema Armeniacon—Հայկական բանակաթեմ³, իսկ հայկական աղբյուրներում ՓՈՔՐ ՀԱՅՔ է անվանվել իր Առաջին և Երկրորդ Հայքերով⁴:

11-րդ դ. Վասպուրականից Արծրունիների, ապա Անիից և Կարսից Բագրատունիների զանգվածային բռնագաղթերով հայերն առավել ևս շատացան պատմա-աշխարհագրական լայն տարածքով Կապադովկիայում: Հետևաբար, սելջուկյան ներխուժումից առաջ, նրանց տիրապետության շրջանում (1074—1307 թթ.) և նրանց իշխանության քայքայումից հետո տվյալ տերիտորիայում թե՛ գերակշռող ազգաբնակչությամբ և թե՛ աշխատանքային ձեռներեցությամբ երկրի բազմաճյուղ արհեստների, արվեստների և ներքին ու արտաքին առևտրի բնագավառներում հայերն ունեցել են

զգալի մասնակցություն և մեծ դեր խաղացել դրանց հետագա զարգացման գործում: Տեղում հայերը զարգացրին նաև ինքնատիպ մի գորգարվեստ, որը հայ մշակույթի անբաժան մասն է կազմում, բայց անտեսված է մինչև օրս: Կոնիայում, Սեբաստիայում, Կեսարիայում և այլ շրջաններում հայերի կողմից պատրաստված բարձրարվեստ գորգերի մասին ակնանատեսի հանգամանքով հիշատակում են 13-րդ դ. եվրոպացի ճանապարհորդ Մարկո Պոլոն⁵ և ուրիշներ: Մասնագիտական գրականության մեջ 13—15-րդ դդ. վերագրվող այդ գորգերից որոշ թվով հայտնաբերվել են Կոնիայի և Բեյշեհիրի մզկիթներում, ինչպես նաև Ֆուստատի (հին Գահիրե) պեղումներից: Բայց կապադովկահայ այդ գորգերը վերագրում են սելջուկ-թուրքերին և եվրոպական թանգարաններում դասակարգում իսլամական արվեստի բաժնում⁶:

Վերոհիշյալ գորգերի պատմա-համեմատական ուսումնասիրությունը բացահայտում է, որ նրանց հորինվածքը, զարդամոտիվների արտաքին ձևն ու բովանդակությունը, ինչպես նաև նախշերի տեղադրության իմաստավորումը սերտ առնչություն ունեն հայկական ոճով և հայ վարպետ-արհեստավորների ձեռքով շինված սելջուկյան աշխարհիկ ու հոգևոր բնույթի բազմաթիվ

¹ Պրոկոպիոս Կեսարացի, Պատերազմների մասին, թարգմ. Հ. Բարթիկյան, Երևան, 1970, էջ 22, 44, 95, 193, 299:

² Полябий, Всеобщая история, 1895: Նաև Марк Туллий, Речи в двух томах, 1962, I, § 14:

³ Կապադովկիայի Երրանածին, Բանակաթեմերի մասին, թարգմ. Հ. Բարթիկյան, Երևան, 1970, էջ 167: Նաև Н. Адонц, Армения в эпоху Юстиниана, Ереван, 1971:


⁴ Մովսես Խորենացի, Պատմություն Հայոց, Երևան, 1963, էջ 96 և 117: Նաև Ս. Երեմյան, Հայաստանը ըստ «Աշխարհացույց»-ի, Երևան, 1968, էջ 100:

⁵ Марко Поло, Путешествие, Ленинград, 1940, стр. 17.

⁶ Oktay Aslanapa ve Yusuf Durul, Selçuklu halıları, İstanbul, 1973. Նաև Kürt Erdman, Oriental carpets, Tübingen (Germany), 1960, p. 17.

կառույցների հետ: Դրանց համար որպես նախօրինակ ծառայել են պատմական Հայաստանի ավելի վաղ շրջանի շինարարական ավանդույթները, վարպետությունն ու ոճերը: Հետևաբար, այդ գորգերի զարդա-

ձևերում, որոնք նախորդում են սելջուկյան ներխուժմանը: Վերոհիշյալ գորգերի զարդանուրբների արուսթին ձևերը, զաղափարական բովանդակությունն ու նրանց տեղադրման իմաստավորումը բացահայտում



Նկ. 1.

ձևերի բնօրինակներին հանդիպում ենք վաղ միջնադարյան հայկական ճարտարապետական զարդաբանականներում, խաչքարային արվեստում, հայկական մագաղաթյա ձեռագրերի մանրանկարչության և կիսատական այլ արվեստների բուսական, կենդանական և երկրաչափական զարդա-

ն ու նրանց հայկական բովանդակությունը և հայկական ձեռարվեստի ստեղծագործություններ լինելը:


Սելջուկյան անվանված կապաղովկահայ այդ գորգերի էական հատկանիշներից մեկն էլ այն է, որ դրանց մեջ հաճախակի են օգտագործված բազմատեսակ ոճավորված բազմաթիվ ԽԱՉԱՋԱՐԴԵՐ (տես գորգանկարներն ու գծանկարները): Չկա մի գորգ, որի վրա օգտագործված չլինի ԽԱՉԱՋԸ: Ծիշտ է, խաչանիշը միայն քրիստոնեության սեփականությունը չի եղել, և

¹ A. Saladin, Manuel d'Art Musulman: L'Architecture, Paris, 1907, t. 2, p. 456.

² N. F. Lynch, Armenia, vol. 2, 1901, London, page 289.

հնուց ի վեր այն իմաստավորել է բնության չորս ուժերը, բայց քրիստոնեությունը հեթանոսական բազմաթիվ սովորությունների հետ մեկտեղ յուրացրեց նաև խաչանիշը:

Թակա քոչվորական հորդանների հաճախակի արշավանքներին, ճնշման ու թալանին, իր ազգային գոյությունը շարունակելու համար որպես պաշարի միջոց անպաշտ-



Նկ. 2.

Այն սրբագործեց և իմաստավորեց Քրիստոսի խաչելության խորհրդով: Նոր բովանդակություն հաղորդեց նրա ձևին և խաչը դարձրեց իր խորհրդանիշը: Ողջ միջնադարը հագեցված է քրիստոնեական գաղափարախոսությամբ, որի աչքի ընկնող կենտրոններից էր հայաշատ Կապադովկիան:


Շրջափակված օտար տարրերով և են-

պան հայն ապավինեց խաչին՝ գոյության կոպում որպես մեցուկի: Ինչպես քրիստոնեությունը, այնպես էլ նրա սիմվոլիկ արտահայտությունը հանդիսացող խաչը հայը խորապես ազգայնացրեց՝ նրան հաղորդելով ազգային նոր ձև և նոր բովանդակություն:

Օտարության մեջ թե հայրենիքում, իր

անձնական թե հավաքական կյանքում, բազմապիսի դժվարությունների և արհաւիրքների դեպքում հայը, որպէս գոյության և ինքնապաշտպանության միջոց, հավատաց խաչի աստվածային գերհզորությանը, նրանով ամրապնդեց ու համախմբեց իր ազգային ֆիզիկական ու հոգեկան ուժերը՝ կյանքի անհավասար պայքարում:

Միջնադարում ազգային պետականությունը կորցրած և հաճախ իսլամի տիրապետության տակ բռնի հայատնեցված հայ ազգաբնակչության համար խաչանիշի հաճախակի օգտագործումը միաժամանակ տիրապետողից տարբերվելու գործնական նպատակ է ունեցել և այն դրոշմել է իր



Նկ. 3.

ստեղծագործություններում: Ավելին՝ հայ եկեղեցին ունի խաչանի հատակագիծ: Հայ շինականն իր դաշտերի քարիքը հանդիսացող ցորենից խաչքոտ է կազմում: Հայ մասիկն իր ամենօրյա հացը թխելիս խմորի վրա խաչանիշ է անում: Հայն իր որդիների ամուսնությունը նվիրագործում է խաչանիշով՝ որպէս սերունդների ժառանգության և հավերժության նշան: Խաչ է քանդակում եկեղեցիների պատերի և պատմական այլ հուշարձանների վրա: Խաչքարային բազմաթիվ անդամներն ստեղծագործություններ է կերտում որպէս ազգային յուրահատուկ արվեստ: Փայտի, մետաղի և հախճապակու մշակման ժամանակ խաչանիշն է օգտագործում որպէս զարդամոտիվ: Եկեղեցական անոթների և այլ առարկաների վրա խաչանիշ է դրոշմում: Քրիստոնեացած խաչին բազմաչափաբար հայ ժողովուրդը նույնիսկ տվեց ազգային յուրահատուկ նկարա-

գիր՝ հավատակից այլ ժողովուրդներից ևս տարբերվելու, չճշմունքի նպատակով: Իր ողջ պատմական կյանքի ընթացքում հայ ժողովուրդը ձգտել է ամեն կերպ պահպանել իր ազգային ինքնությունը, առանց սակայն այլամերժ լինելու:

Հայ ժողովրդի համար խաչը չի խորհրդանշել միայն չարչարանքներ, այլ միաժամանակ նրա մեջ տեսել է ապագայում հարության, հույսի և ազգային վերածննդի գաղափարի անխորտակ հավատքն ու գոյատևելու համատ պայքարի վճռականությունը: Այս պայմաններում հայն իր դրոշմած, քանդակած և գործած խաչանիշին տալիս է ազգային յուրահատուկ իմաստավորում. հետևաբար ազգային բովանդակություն է հաղորդում նրան և լայնորեն կիրառում իր կենցաղում:

Հայ ազգային բնորոշ սիմվոլիկ այս մտածողությունն իր լայն արտահայտությունն է գտել ազգային զարդարվեստում և կիրառական արվեստի բոլոր բնագավառներում, տվյալ դեպքում հատկապէս գորգարվեստում: Գորգն իր ամբողջական հորինվածքով, զարդանկերի ընտրությամբ և նրանց տեղադրության իմաստավորումով, ինչպէս նաև գույների ընտրությամբ և հարստությամբ իր ժամանակի և միջավայրի գեղարվեստական մտածողության, պատկերացման ու ճաշակի մարմնավորումն է. հետևաբար, գաղափարական սապեկոները սինթետիզում են կոնկրետ ոճական և արտահայտչական ձևերի մեջ:

Որպէս հայկական գորգերի ամենակարեւոր հատկանիշներից մեկը տիպոքաֆայ բանասեր Ա. Սազաւանը նշում է. «...այդ գորգերի վրա գոյությունն է որոշապես գծված խաչերի գործի գույր փնտրելու եւնք պարսկական գորգերի վրա և որոնց շատ քիչ ենք հանդիպում կովկասյան այն գորգերի վրա, որոնք հայկական շրջաններից չեն»⁹: Կապաղովկահայ գորգերում խաչանիշների բազմազանությունն օրինաչափորեն արդյունքն է գեղարվեստական տարբեր մտածողության և հնարքների: Հայր պատմության տարբեր ժամանակներում և միջավայրերում իր քաղաքական տեղերի համար, ինչպէս և առևտրական նպատակով ստիպված է եղել գործել բազմաթիվ գորգեր: Բայց գործել է իր գիտեցած ձևով՝ ազգային ոճով և զարդարվեստի ավանդույթներով, անշուշտ հաշվի է առել նաև տիրապետողի և պատվիրատուի ճաշակն ու ցանկությունները: Այժմ սելջուկյան ան-

⁹ A. Sakisian, Pages d'Art Arménien, Paris, 1940, page 27. Նույն ձ. Քյուրդյան, Գորգը Հայոց մոտ, Վնեսիկ, 1947:

վանված կապադովկահայ այդ գորգերում խաչազարդերի տիրապետող առկայությունն ինքնին մատնում է իր իսկական տերերին:

Կապադովկյան այդ գորգերում ֆանատիկ իսլամ տիրապետողների գայությունից խուսափելու համար հաջը հաճախ ոճավորել և անճանաչելի դարձնելու չափ ձևափոխել է խաչը, մույնիսկ հաճախ համադրել է այլ զարդաների հետ. բայց ուշադիր դիտողը կտեսնի էական զարդաներ՝ խաչանիշը: Սելջուկյան կոչված բոլոր գորգերն էլ, առավել թե պակաս չափով, իրենց զարդաներում անպայման ունեն խաչ: Բայց առհասարակ զարդարվածություն և տվյալ դեպքում կապադովկահայ գորգարվեստի ազգային նկարագիրը չի բացահայտվում միայն տարբեր ձևերի բազմաթիվ խաչազարդերի հաճախակի օգտագործումով, այլ ամենակարևորն այն է, որ նրանք իմաստավորվում և ազգային յուրահատուկ բովանդակություն են ստանում իրենց օգտագործման տեղով և նրանց հատկացված դերով: Դժվար թե իսլամ արհեստավորը, մոռացության տալով իր բուն ատելությունը, խաչին հատկացներ այնքան կարևոր տեղ...:

Սելջուկյան անվանված կապադովկահայ այդ գորգերի արտաքին ու ներքին գոտեզրերում խաչազարդերի շարանը հաճախ է օգտագործված որպես պահպանիչ: Նրանց դեր է վերապահված գորգը՝ հայի տունը, պահպանել դժբախտ պատահարներից ու չար աչքերից (գծանկարներ՝ 1, 2, 3, 4, 6, 7, 8, 10):

Կենտրոնական գորգադաշտում տեղադրված բուսական, կենդանական և երկրաչափական հարաբարություններով հարրտացած խաչանիշ զարդամոտիվները ներկայացնում են մեկ-մեկ կենաց ծառեր: Դրանք իմաստավորված են կյանքի հավերժության և անմահության գաղափարով (գծանկարներ՝ 21, 22, 23, 24):


Ոճավորված եռագնդաձև զարդամոտիվները և վարսանդապտղային գծանցված զարդաները նվիրագործված են խաչանիշերով (գծանկարներ՝ 14, 15, 16, 17): Թեփատարած արծիվ հիշեցնող ոճավորված քառանկյունը կամ ութանկյունը զարդարված է կովկասյան կեռազարդերով. իսկ վրան էլ դրոշմված է սովորական խաչանիշը կամ կեռ խաչը, մի դեպքում պոչին (գծանկար 18), այլ պարագային՝ կրծքին կամ կոնակին (գծանկարներ՝ 19 և 20): Տարբեր տիպի խաչեր են պատկերում գծանկարներ 5, 9, 11, 12 և 13-ը:

Ոճավորված վիշապը ամենահատկանշական զարդամոտիվն է սելջուկյան անվանված կապադովկահայ գորգարվեստում, որը

հետագայում շարունակվել է ոչ միայն կովկասյան-հայկական վիշապազարդերում, այլև 16—18-րդ դարերի անատոլյան ընդհանուր անվան տակ ծանոթ հայկական գորգերում: Հաճախ հեթանոսական վիշապազարդը, իր վրա ընդունելով խաչանիշը, քրիստոնեական բովանդակություն է ստացել: Արևմուտյան որոշ հեղինակներ, գծանցված վիշապները նմանեցնելով արաբական բլուֆի գրանիկ, զարդամոտիվները անհիմն կեր-

Մի շարք խաչազարդ նմուշներ

Կապադովկահայ գորգարվեստից
(XIII—XIV դդ.)



պով վերագրում են սելջուկներին և գորգերն էլ դասակարգում իսլամական արվեստի բաժնում:

Վերոհիշյալ գորգերում հաճախ նկատվում է բուսական և կենդանական զարդաների համադրում և դեպի երկրաչափական դեկորատիվ զարդամոտիվի անցում (գծանկար 25): Կենտրոնում բարձրանում է ոճավորված կենաց ծառը: Նրա երկու կողմերում դեմ-հանդիման կանգնած են գծանցված վիշապներ: Բայց հետագայում քրիստոնեությունը կենաց ծառը սրբագոր-

ծել է իր խաչանիշով՝ այն դրոշմելով նրա բնին: Հետևաբար, այս մեկ զարդամոտիվում հեթանոսական և քրիստոնեական ստանդոյությունները համադրվել են՝ արտահայտելով նույն գաղափարը: Նման միտքն առավել զգայնացված-դրստորված ենք տեսնում մի այլ զարդամոտիվում (զծանկար 27): Այստեղ դեմ-դիմաց կանգնած երկու վիշապներից ծնված և դեպի վեր շիտող վիշապների միախառնումը ավարտվում է խաչանիշով: Հետագայում զծանկար 25-ը լրիվ երկրաչափական զարդանի վե-



գլխ. 25



26



27



գլխ. 28



29



գլխ. 30



31



32



33

Նկ. 5.

րածված օգտագործվում է անատոլյան ընդհանուր անունով ծանոթ 15—16-րդ դարերի հայկական գորգերում (զծանկար 28): Դեմ-դիմաց վիշապների միջև տեղակայված է նույնպես ոճավորված ձուկ, որը խորհրդանշում է կյանքի սաղմը և հավերժությունը: Հետագայում այն նվիրագործված է խաչանիշով. իսկ վերևում նրան հսկում և հովանավորում է ութանկյուն խաչանիշը (զծանկար 26):

Իսլամական սուրբ գիրքը՝ Դուրանը, իր հավատացյալներին խստորեն արգելում է

մարդ կամ կենդանի էակ նկարել¹⁰: Գծանկար 29-ը պատկերում է մի թռչուն-վիշապ: Նրա կովկասյան կենսազարդերով ոճավորված թևերը սկիզբ են առնում կենդանու կոնակին դրոշմված հայկական Տ գրանի հեթանոսական զարդանից, որը խորհրդանշում է վիշապը: Միաժամանակ կենդանու մարմինը զարդարված է խաչանիշերի շարանով: Բայց առավել ուշագրավ է այն, որ կենդանին գլխին կատարի փոխարեն կրում է խաչանիշ, մի հանգամանք, որը նշում է կենդանու մատաղացու լինելը: Տվյալ զարդամոտիվի շարանով զարդարված գորգը հավանաբար պատրաստված է եղել եկեղեցում օգտագործելու նպատակով, բայց հետագայում, ինչ-ինչ պայմանների բերումով, հայտնաբերվել է Կոնիայի մրգ-կիթներից մեկում (զծանկար 29):

Խաչանիշը, զծայնացված այլ զարդանիշերի հետ համադրված, առաջացրել է բարդ երկրաչափական զարդանիշեր: Նրանց հորինվածքում ևս գերակշռում են խաչաճարդերը, որոնք իմաստավորում են այդ զարդամոտիվները (զծանկար 30, 31, 32):

Վիշապագորգերի աստիճանական զարգացման մի ճյուղը մեզ առաջնորդում է դեպի խորանագորգ: Դրա փոխանցման լավագույն օրինակներից է զծանկար 33-ը: Դեմ-հանդիման կանգնած երկու վիշապներից բարձրացող երկու այլ փոքր վիշապների միախառնումից առաջանում է ոճավորված մի կիսաշրջանակ: Որոշ հեղինակներ բռնագրոսիկորեն դա նմանեցնել են փորձում իսլամական մահիկի, անտեսելով տրվյալ զարդամոտիվի հորինվածքն ու էությունը: Ավելին՝ վերևից առկա է հավատքի, ուսման և ապագայի հույսի կանթերը, իր կողքերից առկա երկու այլ փոքր կանթերը, որոնց վրա ևս դրոշմված են խաչեր: Ներքևում տեղադրված է մի մեծ խաչաճարդ, իսկ նրանից ներքև՝ ութանկյուն աստղաճարդը, որի կենտրոնում դրոշմված է փոքր խաչանիշ:

Նկատի ունենալով, որ խաչը ո՛չ մի երկրում և ո՛չ մի ժամանակ իսլամի համար սիմվոլ չի հանդիսացել: Ոչ միայն սելջուկ-թուրքերից, այլև իսլամության ծնունդ տվող արաբներից առաջ հայերը գորգեր են գործել, ըստ արաբ պատմիչների վկայության, որոնք որպես կողոպուտ, որպես պետական սուրբ կամ հարկ, ինչպես նաև առևտրական նպատակներով ցրվել են աշխարհով մեկ: Այժմ հարց է առաջանում. եթե մաս-

¹⁰ Մարգարեի Սուենա օրինագիրքը և նրա կարծիքների ժողովածուում՝ Հատիսում: Տես՝ Կ. Պալյան, Եգիպտոս և արաբական ճարտարապետությունը, 1914, Կահիրե, էջ 192:

նագիտական գրականության մեջ այդ գորգերն ընդունվում են իսլամական, այն էլ «իսլամական աղոթքի գորգեր», ապա ինչո՞վ բացատրել խաչի այնքան բազմազան ու հաճախակի օգտագործումը և նրան հատկացված այնքան կարևոր տեղը: Ավելին՝ ինչպե՞ս հաշտվել այն գաղափարի հետ, որ իսլամ հավատացյալը ամենօրյա իր աղոթքների ժամանակ ծունկի գա խաչի առաջ և երկրպագելու ժամանակ խոնարհի ու իր գլուխը անընդհատ հպի խաչանիշին... այն էլ միջին դարերում, երբ իսլամական մոլեռանդությունն իր գագաթնակետին էր հասել:

Հետաքրքիր է նաև պատմա-լեզվական այն փաստը, որ ԽԱՀ բառը «բնիկ հայերենն բառ է» և հայերենից է փոխառյալ թուրքերեն **خاچ** **haç** և աղոթեցանքներն **xav** բառը՝ հայ¹¹ և օտար¹², ինչպես նաև թուրք լեզվաբանների վկայությամբ¹³: Հիշյալ լեզուներում նույն բառարմատից կազմված բազմաթիվ բարդ ու ածանցավոր բառեր կան. դա հետևանքն է երկու ժողովուրդների երկարատև ու փոխադարձ շփման և համատեղ կեցության. օրինակ՝ **خاچ ایتمک** **xaç itmek** կամ **haç çikarmak**—խաչ հանել կամ խաչակնքել, **خاچلاما** **xavlamak** կամ **haçlamak**—խաչել, **haçlamiş**—խաչեցյալ, **haç suya atmak**—խաչը ջուրը գցել (հայկական եկեղեցական ջրօրհնների արարողությունը): Սակայն առավել հետաքրքրական փաստեր են հայերեն մի շարք բառերի նույնությամբ օգտագործումը թուրքերենում. օրինակ՝ **خاچار**—**haçvar**—խաչվար (խաչաձև) կամ խաչվառ-խաչադրոշ կամ եկեղեցական դրոշ¹⁴: Եվրոպայի (Թուգատի) շրջանի երբեմնի հաչաշատ գլուղերում մինչև օրս օգտագործվում է **خاچوک** **Haçnık** «խաչուկ, գլուղական տների առիքներին խաչաձև դրոշված գերան», հայերենում նաև խեչակ:

خاچورگ—**Haçörget**, **Xačypret**—հայերեն **խաչերկաթ** թոնրի քերանին դրված խաչաձև թիթեղը: Գավառական այս բառը, ըստ Ա. ճառյանի, փոխ են առել Կեսարիայի թուրքերը և հույները, Եվրոպայի շրջանի թուրքերը և Սղերդի շրջանի արաբները: Հայերեն այս բառն անցել է նաև ռուսերենին **коверга**, ուկրաիներենին, լեհերենին, լիթվաներենին և այլ լեզուների: **Xaçmar**—խաչմար, որը մեղվի կյոցում խաչաձև դրվող փայտն է, իսկ շինարարության բնագավառում **xavımsı**, որը նշանակում է տան տանիքին գերանի փոխարեն խաչաձև դրվող ձող, նաև **xava** կամ **havva**, հայերեն խեչակ, որը երկճղի նեցուկ է նաև բույսերի համար¹⁵: «Խաչ բառը,—ասում է ակդ. Բ. Ա. Նուսթեյանը,—որ հայերենից անցել է վրացերենին, աղոթեցանքներին, պարսկերենին, քրդերենին»¹⁶, նաև Կենտրոնական Ասիական ժողովուրդների լեզուներին և աֆղաներենին, որոնք գորգի մի տեսակը խաչանիշ զարդամոտիվի պատճառով անվանում են «խաչլու Յումուտ»¹⁷, «խաչլու Բուխարա»¹⁸, «խաչլու թուրքուման»¹⁹ և «խաչլու աֆղան»²⁰: Հնուց ի վեր հայկական կիրառական արվեստների այլ բնագավառներում և հատկապես գորգարվեստում օգտագործված զարդամոտիվների մեջ տիրական տեղ է ունեցել խաչը:

Սելջուկյան անվանված գորգերի զարդամոտիվների հանգամանակից վերլուծությունն ինքնին ընթերցողին հանգեցնում է այն եզրակացության, որ կապադովկյան այդ գորգերը գործվել են միջնադարյան հայկական զարդարվեստի ավանդույթներով և հայ վարպետ-արհեստավորների ձեռքերով:

¹¹ Ա. ճառյան, Արմատական, հատոր 2, էջ 334:

¹² Բ. Նուսթեյան, Քաղաքները և արհեստները Հայաստանում IX—XIII դդ., Երևան, 1964, հատոր 1, էջ 162:

¹³ M. Campa na, Oriental carpets, 1969, Milan p. 136.

¹⁴ O. Pictus, Oriental carpets, 1968, Switzerland, pl. XVI.

¹⁵ H. Haak. Oriental rugs London, 1960, pl. 35.

¹⁶ P. Liebetrau, Oriental rugs in colour, 1970, Denmark, pl. 41.

¹¹ Հր. Աճառյան, Հայերեն արմատական բառարան, 1973, Երևան, էջ 333:

¹² Д. А. Магазаник, Турецко-Русский словарь, Москва, 1945, ст. 225.

¹³ M. Ali Ağakay, Türkçe sözlük, 1959, Ankara, s. 331.

¹⁴ Հին Հայկազյան բառարան, 1769, Վենետիկ, էջ 242:





ԽԱՂԱՂՈՒԹՅԱՆ ՔՐԻՍՏՈՆԵԱԿԱՆ ԿՈՆՖԵՐԱՆՍԻ ԳՈՐԾՈՒՆԵՈՒԹՅՈՒՆԸ 1976 ԹՎԱԿԱՆԻ ԸՆԹԱՑՔՈՒՄ

Ստորև ամփոփ գծերի մեջ ներկայացնում ենք պատկերն այն կարևոր իրադարձությունների, որոնք տեղի ունեցան Խաղաղության քրիստոնեական կոնֆերանսի կյանքում անցնող տարվա ընթացքում:

1976 թվականի փետրվար ամսին Ֆրիբաունք քաղաքում (Սիեռա-Լեոնե), եղբայրական մթնոլորտում, տեղի ունեցավ աստվածաբանական մի խորհրդակցություն, որին մասնակցեցին Արևմտյան Աֆրիկայի եկեղեցիների ներկայացուցիչները: Այդ խորհրդակցությունում խաղաղության և աֆրիկյան ժողովուրդների զարգացման հեռանկարներին վերաբերող մի շարք հարցերի քննարկումն արժեքավոր ներդրում հանդիսացավ Խաղաղության քրիստոնեական կոնֆերանսի աշխատանքներում: Հանդիսման ընթացքում աֆրիկյան եկեղեցիների կողմից առաջարկություններվեց տեղեփոխ աֆրիկյան երկրների համար Խաղաղության քրիստոնեական մի կոնֆերանս, որով աշխատանքի նոր հեռանկարներ կարող են բացվել ԽՔԿ-ի առաջ այդ ցամաքամասում: Ամենայն հավանականությամբ առաջիկա տարի հնարավոր կլինի իրականացնել այդ խոստումնալից ծրագիրը:

1976 թվականի ապրիլ ամսին Նյու-Վիդտորում (ԱՄՆ) ԽՔԿ-ի Աշխատանքային կոմիտեի հերթական նստաշրջանն իր ուշադրությունը կենտրոնացրեց զինաթափման այժմեական և հրատապ հարցերի վրա: Աշխատանքային կոմիտեի վերոհիշյալ հանդիպմանը զուգընթաց կազմակերպվեց մի երրորդ հանդիպում ամերիկյան եկեղեցիների և սոցիալիստական երկրների եկեղեցիների պատասխանատու ներկայացուցիչների միջև, որոնք հնարավորություն ունեցան առավել լավ ճանաչելու միմյանց և առավել սերտացնելու իրենց փոխհարաբերությունները:

Նյու-Վիդտորում գումարված Աշխատանքային կոմիտեի նստաշրջանը գոհունակու-

թյամբ արձանագրեց ժամանակակից աշխարհում տեղի ունեցած այն մեծ փոփոխությունը, որով հատկանշվում էր պետությունների միջև անբարեհաճության և առևակատման քաղաքականության փոխարինումը խաղաղ համագործակցության քաղաքականությամբ, որպես վճռական գործոն:

Աշխատանքային կոմիտեի երկրորդ հանդիպումը տեղի ունեցավ 1976 թվականի հոկտեմբերին ԳԴՀ-ում: Այդ հանդիպումն առաջընթաց կարևոր մի քայլ հանդիսացավ քրիստոնեական հավատի և սոցիալական առաջադիմության համար մղվող պայքարի միջև գոյություն ունեցող հարաբերությունների ուսումնասիրության բնագավառում: Հանդիպման ընթացքում ընդգծվեց, որ խաղաղության համար քրիստոնյաների պայքարն արդյունավետ կլինի այն դեպքում միայն, եթե այն զուգակցված լինի նույն նպատակի համար այլ համոզմունքների տեղ մարդկանց մղած պայքարին: Աշխատանքային կոմիտեի սույն հանդիպմանը հաջորդեց եղբայրական մի քանավե՛ր ԽՔԿ-ի ղեկավարների և ԳԴՀ-ի ավետարանական եկեղեցիների պատասխանատու ներկայացուցիչների միջև, որի ընթացքում երկու կողմերն էլ ընդգծեցին առավել սերտ մի համագործակցության կարևորությունը:

Անցնող տարվա ընթացքում ԽՔԿ-ի գործունեության մեջ պետք է հիշատակել նաև 1976 թվականի հունիսին Սոֆիայում կազմակերպված սեմինարը, որի թեման էր՝ «Եվրոպայի անվտանգության և համագործակցության կոնֆերանսի նշանակությունը երրորդ աշխարհի համար»: Այս հանդիպումն առաջ բերեց լայն հետաքրքրություն: Հանդիպման 70 մասնակիցներ, որոնք ժամանել էին աշխարհի բոլոր կողմերից, բատամենայնի գնահատեցին Հելսինկիի կոնֆերանսի ունեցած համաշխարհային կարեւոր նշանակությունը, կոնֆերանս, որի արդյունքը հանդիսացավ քաղաքական մի նոր

կլիմայի առաջացումը Եվրոպայում: Մեմֆիսի աշխատանքներին մեծապես նպաստեցին, իրենց գործուն մասնակցությամբ, Երրորդ աշխարհի երկրների եկեղեցիների ներկայացուցիչները:

Անցնող տարվա ընթացքում կարևոր միջոցառում հանդիսացավ ԽՔԿ-ի պատվիրակության կատարած այցը Ասիայի մի շարք երկրներ: Ծուրջ մեկ ամիս տևած իր ուղևորության ընթացքում պատվիրակությունը հնարավորություն ունեցավ ջերմ հանդիպումներ ու գրույցներ ունենալու Հնդկաստանի, Պակիստանի, Շրի Լանկայի, Հոնգկոնգի, Սինգապուրի, Ֆիլիպինների և Ճապոնիայի եկեղեցիների ղեկավար անձնավորությունների, ինչպես նաև Ասիայի Բրիտանական կոնֆերանսի ներկայացուցիչների հետ, որոնք մեծ հետաքրքրություն ցուցաբերեցին ԽՔԿ-ի աշխատանքների նկատմամբ: Այդ հանդիպումներն առիթ հանդիսացան ԽՔԿ-ի համար սերտացնելու իր հարաբերությունները վերոհիշյալ երկրների քրիստոնյաների հետ և միաժամանակ շփումներ հաստատելու բուդայական, մամեդական, հինդու և այլ կրոնների պատասխանատու ներկայացուցիչների հետ:

ԽՔԿ-ի ուսումնասիրությունների համաձայնագրովները նույնպես շարունակեցին կառնալոր կերպով գումարել իրենց հերթական հանդիպումները: Ցեղային խտրականության հարցով զբաղվող համաձայնագրովի տարեկան հանդիպումը, որը տեղի ունեցավ ԳՖՀ-ում, մանրամասնորեն քննության առավ Հարավային Աֆրիկայում վերջին ժամանակաշրջանում տեղի ունեցած իրադարձությունների զարգացումը: Երիտասարդության համաձայնագրովը, որը նմանապես գումարվեց ԳՖՀ-ում, լայն վերլուծության ենթարկեց այն հարցերի ամբողջությունը, որոնք վերաբերում են լարվածության թուլացման քաղաքականությանը և ազգերի առատագրության համար մղվող պայքարին: Աստվածաբանական համաձայնագրովի Հնդկաստանում գումարված հանդիպումն առաջընթաց կարևոր քաղաքականագրեց խաղաղության ի նպաստ քրիստոնյաների ծավալված գործունեության աստվածաբանական հիմքի մշակման գործում: Այս հանդիպումը լավագույն առիթ հանդիսացավ, որ ԽՔԿ-ի աստվածաբան ներկայացուցիչներն օգտակար կարծիքներ փոխանակեն աշխարհի զանազան կրոնների ներկայացուցիչների հետ խաղաղության համար միասնական ջանքերի գործադրման անհրաժեշտության վերաբերյալ:


Միջազգային հարցերի գծով գործող համաձայնագրովը, որի տարեկան նիստը գումարվեց Սովետական Միությունում, իր ու-

շաղրրությունը հիմնականում կենտրոնացրեց լարվածության թուլացման քաղաքականության և աշխարհի տարբեր մասերում նրա ունեցած արդյունքների վերլուծության վրա: Այդ նիստի մասնակիցներն ընդգծեցին այն կարևոր պատասխանատվությունը, որ ծանրանում է եկեղեցիների և քրիստոնյաների վրա՝ ազգերի միջև մերձեցումը խորացնելու և առաջ մղելու գործում: Տնտեսական և քաղաքական հարցերի գծով գործող համաձայնագրովն իր հերթական նիստը գումարեց Չեխոսլովակիայում և պաշտպանեց համաշխարհային մի նոր և արդարացի տնտեսական ստեղծելու վերաբերյալ առաջարկությունը, որով հնարավոր կլինեք վերջ դնել նոր զարգացող երկրների տնտեսական ներկա անբարենպաստ դրությանը: Զինաթափման հարցի գծով գործող ԽՔԿ-ի հատուկ ենթահամաձայնագրովի Ճապոնիայում կայացած հանդիպման կարևոր նշանակությունն այն եղավ, որ այդ հանդիպման ընթացքում ոչ միայն շարադրվեց զինաթափման արդի փնակի վերաբերյալ համակողմանի մի վերլուծություն, այլև միաժամանակ հանրային կարծիքի համար մշակվեցին կոնկրետ առաջարկություններ, որոնց նպատակն էր՝ գործոն օժանդակություն ցույց տալ զինաթափման ուղղությամբ կառավարությունների կողմից գործադրվող ջանքերին:

ԽՔԿ-ի գործակիցներն իրենց կարևոր օժանդակությունը բերեցին նաև Աշխարհի բոլոր կրոնների ներկայացուցիչների համաձայնագրովի նախապատրաստման աշխատանքներին, համաձայնով, որը գումարվելու է 1977 թվականի աշնանը Մոսկվայում ի նպաստ խաղաղության:


Անցնող տարվա ընթացքում մեծապես արդյունավետ եղավ նույնպես ԽՔԿ-ի գործակցությունը խաղաղության համար պայքարող աշխարհիկ կազմակերպությունների հետ: ԽՔԿ-ի ներկայացուցիչները կանոնավոր կերպով մասնակցեցին Միավորված ազգերի կազմակերպության, Խաղաղության համաշխարհային խորհրդի, Խաղաղասեր ուժերի համաշխարհային կոնգրեսի, Աֆրոասիական համերաշխության կազմակերպության, Բյուսելի ֆորումի և միջազգային այլ կազմակերպությունների զանազան կոնֆերանսներին:

ԽՔԿ-ի Աշխատանքային կոմիտեն որոշել է 1978 թվականին հրավիրել Բոլոր Բրիտանականների Խաղաղության Հինգերորդ Համաձայնագրովը, որի նախապատրաստման աշխատանքներին առաջիկա ամիսներից ըսկրսած իրենց մասնակցությունն են բերելու ԽՔԿ-ին անդամ բոլոր եկեղեցիները:



ՀԱՆԳԻՍՏ
ԱՐԺԱՆԱՊԱՏԻՎ Տ. ԶԱՎԵՆ ՔԶՆ. ՄՈՍԿՈՎՅԱՆԻ
(1922—1977)

Փետրվարի 5-ին, կիրակի օրը, իր բնակարանում ի Տեր հանգչավ տ. Զավեն քհն. Մոսկովյանը:



Հանգուցյալը ծնվել է 1922 թվականին Բեյրութում, բանվորի ընտանիքում: Սովորել և աշխատել է տեղի Մարաշ թաղամասի ազգային սրբոց Քառասնից Մանկանց միջնակարգ վարժարանը:


1946-ին նա իր ընտանիքով հայրենիք է վերադառնում և բնակություն հաստատում Կիրովական քաղաքում:

1964 թվականին, Կիրովականի հավատացյալ համայնքի համախոսականով, Ծիրակի թեմի նախկին առաջնորդ հանգուցյալ տ. Մաշտոց եպս. Թաջիրյանի ձեռամբ, Կիրովական քաղաքի ս. Աստվածածին եկեղեցու համար քահանա է ձեռնադրվում:

Տ. Զավեն քահանան եղել է անբասիր վարքի և անձնվեր ծառայության նվիրումով հոգևորականի տիպար: Նրա հոգևոր հովվությունը գնահատվել է Ծիրակի թեմի այժմուս առաջնորդ տ. Նարեկ եպս. Ծաքարյանի կողմից, որի միջնորդությամբ էլ Վեհափառ Հայրապետը 1974 թվականին նրան շնորհում է քահանայական լանջախաչ:

Հանգուցյալ տեր հոր թաղումը կատարվում է փետրվարի 6-ին, երկուշաբթի օրը: Հանգուցյալի վերջին օծումը կատարում է Ծիրակի թեմի առաջնորդ տ. Նարեկ եպս. Ծաքարյանը:

Հանգուցյալի աճյունը ամփոփվում է Կիրովականի քաղաքային գերեզմանատանը: «Յիշատակն արդարոյն օրհնութեամբ եղիցի»:



ԲՈՎԱՆ ԴԱԿՈՒԹՅՈՒՆ

ՎԵՀԱՓԱՌԻ ՀԱՅՐԱՊԵՏԻ կոնդակը Լոնդոնում «Հայ երաժշտական ինստիտուտ»-ի հիմնադրության առթիվ	3
Վեհափառ Հայրապետի ողջույնի և օրհնության գիրը՝ ուղղյալ Միացյալ Նախագահ հայոց արևելյան թեմի տարեկան թեմական պատգամավորական ժողովին	5
Վեհափառ Հայրապետի ողջույնի և օրհնության գիրը՝ ուղղյալ Միացյալ Նախագահ հայոց արևելյան թեմի հոգևորականաց համագումարին	7
Սրբոց Վարդանանց զորավարաց տոնը և Վեհափառ Հայրապետի անվանակոչու- թյան տարեդարձը Մայր Աթոռում	9
ՄԱՅՐ ԱԹՈՐՈՒՄ—Եկեղեցական բեմ. լուրեր	11
ՆԱՐԵԿ ԵՊԻՍԿՈՊՈՍ ՇԱՔԱՐՅԱՆ—Սուրբ Ղևոնդյանք	13
ՎԱԶԳԵՆ ՍԱՐԿԱՎԱԳ ԱՍԱՏՈՒՐՅԱՆ, ՍՈՐԻՆ ՍԱՐԿԱՎԱԳ ՄԱՆԴԱԼՅԱՆ—Մեծ պահոց խոհեր	16
Ա. Հ.—Սուրբ Աթանաս Հայրապետ Ալեքսանդրացի	20
ԿԱՐՊԻՍ ՍՈՒՐԵՆՅԱՆ—Վազգեն Ա Հայրապետ Հայոց	31
ԽԱՉԱՏՈՒՐ ԿԱՆԱՅԱՆ—Էջմիածնի նվիրակությունը ԺԸ դարում	48
ՀԱՐՈՒԹՅՈՒՆ ԳԱՅԱՅԱՆ—Խաչի զարդամոտիվները կապադովկաիայ գորգար- վեստում	55
Խաղաղության քրիստոնեական կոնֆերանսի գործունեությունը 1976 թվականի ընթացքում	62
Հանգիստ արժանապատիվ տ. Զավեն քհն. Մոսկովյանի	64



ԽՄԲԱԳՐՈՒԹՅԱՆ ՀԱՍՑԵՆ

ՀԱՅԿԱԿԱՆ ՍՍՀ, ԷՋՄԻԱԾԻՆ

«ԷՋՄԻԱԾԻՆ» ԱՄՍԱԳՐԻ ԽՄԲԱԳՐՈՒԹՅՈՒՆ

Армянская ССР, Эчмиадзин, Редакция журнала «Эчмиадзин».
Rédaction de la revue «Etchmiadzine», Etchmiadzine, Arménie, URSS

Հանձնված է արտադրության 23.2.1977 թ.: Ստորագրված է տպագրության 4.4.1977 թ.:
Տպագրական 4 մամուլ, թուղթ 60X84¹/₈, պատվեր 143:

Մայր Աթոռ և Էջմիածնի տպարան, 1977 թ.